

Tti Jian Joajné Jesucristo Que Dicjin Lucas

Quedonda Lucas dicjin joajna jihi

¹ Tsje chojni cjin historié Jesucristo inchin jehe conhe co jehe joinchehe ngataha nontte jihi.

² Jehe na cjin na inchin joinchecoanna na tti chojni que vicon cain tti joinchehe Jesús desde are nacoexinxon co cjoenguijna na Jesús para ndache na chojni tti jian joajna que joixin de ngain Dios.

³ Janha cai joanchiangui jian de ixin cain tti joinchehe Jesús desde coexinxin xé, co janha xaxanho que jian jí para que janha rrocjin na cain cosa jihi inchin conhe para ixin jaha Teófilo, ixin jaha tti compañerona que anto jian,

⁴ para que jaha jian rrochonxin tti ndoa que jointtacoanha jehe na.

Ná ángel de Dios joindačo ixin tsoncjihí Juan, tti vancheguitte chojni

⁵ Are Herodes vehe rey de ngain Judea, are mé vehe ná xidána que vinhi Zacarías. Jehe vehe ngain grupoe xidána que vinhi Abías. Co čhihi Zacarías vinhi nčha Elisabet. Co cayoi jehe na cjoí na de razé Aarón, tti cjoí saho xidána.

⁶ Jehe Zacarías conixin čhihi, Dios ndačo ixin jian na co jehe na vaguitticaon na cain tti coetonha Dios co jañá xonhi chojni vanichja que ixin jehe na jianha vanchehe na.

⁷ Pero jehe na xonhi chjan vinttechonda na, ixin Elisabet deporsín xonhi chjan vancheconcjihi, co cayoi jehe na anto ojonchjan vintte na.

⁸ Ngain ná tiempo grupoe Zacarías joinchehe tocado joinchehe xa de dána ngaxinhi ningoe Dios,

⁹ ixin jamé costumbre vinttechonda cain xidána ngain tiempo mé, mexinxin ngain sorteo vittotaon Zacarías para que jehe joixinhi ngaxinhi ningoe Dios para joicjaga tsjoca.

¹⁰ Ngoi rato que jiche tsjoca ngaxinhi nihngo, ndoja cain chojni joinchecoanxinhi na Dios.

¹¹ Co ngain rato mé Zacarías vicon ná ángel de Dios tajingattjen lado jian de ngain altar tti jichexin tsjoca.

¹² Are jehe vicon ángel mé, jehe ni inoeha quehe sinchehe ixin anto xaon.

¹³ Pero ángel mé ndacho ngain Zacarías:

—Zacarías xaonha, ixin Dios coinhi tti jaha joinchetsenhe ñao, mexinxin çhiha Elisabet sincheconcjihi ná chjan que jaha sincheguini xan Juan.

¹⁴ Co jaha anto rrochaha co anto çhjoin sarihi ngain vidá, co tsje chojni rroché na ixin tsoncjihi çhjan mé.

¹⁵ Ixin xanha mé sehe xan xí importante para ixin Dios. Chjan mé siha xan vino ni cosa que coanxin chojni, co rrochonda xan anto tsje joachaxín Espíritu Santo desde icha saho que tsoncjihi xan.

¹⁶ Co de ixin tti jehe xan sinchehe xan, tsje chojni de ngain nación Israel rrocjan na sinchesayehe na Dios de jehe na tti chonda cain joachaxin.

17 Jehe Juan jiji tti saho tsí que Cristo, co rrochonda xajeho espíritu co xajeho joachaxin que vechonda profeta Elías, para rrondache chojni quexén jehe na sinao na xenhe na, co para que tti chojni que ditticaonha Dios tsanguí na sitticaon na Dios. Jamé para que chojni nchao sayé na Cristo are jehe tsí.

18 Zacarías joanchiangui ngain ángel mé co ndacho:

—¿Quexén rrochondaxin seguro janha de ixin jiji? Ixin janha atto dachí na co cai chihna.

19 Angel mé ndacho:

—Janha Gabriel na, co rrinttaha cain tti tte-tonha Dios. Jehe tti coetonna para joidattjo tti jian joajna jiji.

20 Pero jai ixin jaha vitticaonha tti janha ndattjo, jaha tsottapo; choha rronichja hasta que tsoncjija xanha. Co jiji siconhe ngain mero tiempoe.

21 Co ngoi rato mé, cain chojni nttiha techonhe na jehe Zacarías ndoja, co vinttegoan na admirado ixin Zacarías anto conchjenhe ngaxinhi nihngo.

22 Co are jehe vaçhje, ichoha nichja ngain na; cottimeja xaxaon na que Dios cjoagoe ná cosa ngaxinhi ningoe Dios. Co jehe nichja ngain na conixin joxon seña ixin ndacottapo.

23 Are joexin cain nchanho de xé Zacarías ngain nihngo icha importante, Zacarías sacjoi para nchi-andoha.

24 Después de cain yá, çhihi jehe Zacarías oveyá ncha chjan, co de jamé vehe ncha, ivaçhjexinha ncha de nchiandoha ncha naho conittjao, co xaxaon ncha:

25 “Dios joanjo joachaxin para que janha rriyá chjan jai para que chojni itsjanoha na na.”

Ná ángel joindačo ixin tsoncjihí Jesús

26 Vittjaxon incjaon conittjao, Dios rroanha jehe ángel Gabriel ngain regioen Galilea ngain ná rajna que dinhi Nazaret,

27 para joitsjehe ná xannčí que vinhi María. Xannčí mé virgen xan co ovechonda xan compromiso de rrocottehe xan ná xí que vinhi José, razé rey David.

28 Ángel mé joixinhi tti nchia que jixinhi xannčí mé, co ndačo ngain xan:

—¡Janha joichjaha joajna jaha ixin Dios anto rinao jaha! Dios jí nganji jaha; Dios icha jointtanchaon jaha de cainxin nčí.

29 Pero are xannčí mé vicon xan jehe ángel mé co coinhi xan tti nichja ángel mé, jehe xan goan xan admirado co inoeha xan ixin quedonda jamé ndačo ángel ngain xan.

30 Cottimeja ángel mé ndačo:

—María, xañha, ixin Dios anto rinao jaha.

31 Jai jaha sariyaha ná chjan co are osincheconcjihí xan, jaha sincheguini xan JESÚS.

32 Chjan mé anto importante sehe xan ngain Dios, co sinhi xan Xenhe Dios que ttjen ngajni, co jehe Dios rrochjé xan joachaxin de sehe xan rey inchin ndogelitoe xan xančjen que vinhi David are saho.

33 Jamé para que jehe xan tsetonha xan ngain nación Israel para cainxin tiempo, co tti jehe xan tsetonha xan xonhi tiempo tsjexin.

³⁴ Cottimeja María joanchiangui ngain ángel mé co ndačo:

—¿Queñén tsonhe jiji, ixin janha ñonhi xí rriquinha?

³⁵ Angel ndačo ngain María:

—Espíritu Santo tsí nganji jaha co joachaxín Dios que ttjen ngajni sisiandanji jaha inchin ná ttjoi. Mexinxin tti chjan que jaha sincheconcjiji, sehe xan jian ngattoxon con Dios co sinhi xan Xenhe Dios.

³⁶ Cai nčhiprimá, Elisabet, sincheconcjiji nča ná chjan cai masqui onačhichjan nča, mexinxin tti nčí que ndačo chojni que čhoha ncheconcjiji chjan, jai jehe nča ochonda nča incjaon conittjao que jiyá nča xenhe nča.

³⁷ Para ixin Dios ñonhi cosa tangui.

³⁸ Cottimeja María ndačo:

—Janha ditticanho cainxin tti ttetonha Dios; co mexinxin Dios nchao sinchehe nganji na janha inchin jaha ndachjenji na.

Conixin jehó yá, ángel mé sacjoi.

María cjoí joitsjehe Elisabet

³⁹ Ngain tiempo mé María toin cjoí joitsjehe jehe Elisabet que vehe ngain ná rajna ngagaha jna ngain nonttehe Judea.

⁴⁰ Co are María joiči nttiha jehe joixinhi nchian-doha Zacarías co chjé joajna jehe Elisabet.

⁴¹ Are Elisabet coinhi joajné María, chjan que veyá Elisabet coingui xan ngaxinhi tsehe, co ngain rato mé Espíritu Santo joí conixin anto tsje joachaxin ngain jehe Elisabet.

⁴² Cottimeja Elisabet ndačo sén ngain María:

—Dios jointtanchaon jaha icha que cainxin nchí, co joinchenciaon xanha que rriyaha.

⁴³ ¿Quensen na janha para que joitsjena jaha janné tti Dios que chonda cain joachaxin nganji na janha?

⁴⁴ Ixin are janha coian joajná jaha, xanhna que rriyá, coingui xan ngaxinhi tsehe na ixin ché xan.

⁴⁵ Anto chjoin para ixin jaha ixin vitticaon ixin siconha inchin ndačo Dios.

⁴⁶ Cottimeja ndačo María:

Almana nchecoanxinhi Dios.

⁴⁷ Co ansenna ché ngain Dios, tti chjana vida naroaxin.

⁴⁸ Ixin Dios xaxaon de ixin janha, tti rrihi inchin ná ninchehe xa para ixin jehe, co jai pa ndaha chojni rrondačo na ixin anto chjoin vidana.

⁴⁹ Ixin Dios, tti chonda cain joachaxin, jian nganji na janha; tsosayehe nombré jehe.

⁵⁰ Jehe cainxin tiempo tsiaconoehe cain chojni que xaon ngain jehe.

⁵¹ Jehe joinchehe cosa anto importante; co joacha ngain tti chojni que tonohé orgulloso ngain ansén.

⁵² Tti chojni que chonda tsje joachaxin jehe joinchenontte de ngain joachaxin, co tti chojni que xonhi joachaxin chonda, jehe Dios chjé na importancia.

⁵³ Tti chojni noa jehe chjé na cosa jian, co tti chojni rico jehe cointtohe na texoaxon rá na.

⁵⁴ Jehe cjoenguijna nación Israel ixin mé ninchehe xé jehe;

jehe tjañeha de ttiaconoehe chojni mé,
⁵⁵ ixin jamé ndačo jehe ngain ndogoelitoa na
 xančhjen Abraham conixin cain xenhe ndo
 para cainxin tiempo.

⁵⁶ Co nttiha tavehe María ngain Elisabet inchin
 ní conittjao, cottimeja sacjan para nchiandoha.

Are concjihi Juan, tti vancheguitte chojni

⁵⁷ Después ovittja tiempo que Elisabet chonda
 que joincheconcjihi chjan, co jehe joincheconcjihi
 ná xanxí.

⁵⁸ Cain nivecinoe co nifamilié cjoí na joichjé na
 joajna ixin conohe na que Dios anto jian ngain
 Elisabet.

⁵⁹ Vittja jni nchanho, joichjé na xanxichjan mé
 tti xöhe que dinhi circuncisión, co joinao na rrogu-
 inhi xan Zacarías inchin vinhi ndodé xan.

⁶⁰ Pero janné xan ndačo jan:

—Nahi. Xanhna chonda que sinhi xan Juan.

⁶¹ Co jehe na ndačhao na ngain Elisabet:

—¿Quedonda? Xonhi nindoi dinhi jañá.

⁶² Cottimeja joanchiangui na conixin seña ngain
 ndodé xanxichjan mé para conohe na quexén ri-
 nao jehe ndo sinhi xan.

⁶³ Jehe ndodé xan joanchia ndo rioho tabla para
 coentaxin ndo, co nttiha jehe ndo cjin ndo: “Jehe
 xan sinhi xan Juan.” Co cainxin nite nttiha vintte-
 goan na admirado de ixin nombre yá.

⁶⁴ Ngain rato mé Zacarías cjan nichja iná, co
 coexinhi joinchecoanxinhi Dios.

⁶⁵ Conixin jihi, cain nivecinoe vinttegoan na
 admirado, co ngoixin región mé de ngagaha jna de
 Judea vaquequin chojni de ixin quehe conhe.

⁶⁶ Cain chojni que vaconohe jiji, vařaxaon na ixin quedonda jańá conhe co vajanchianguihi chó na co vandačo na:

—¿Quehe siguehe chjan yá?

Ixin ndoa Dios joinchenaon xan.

Tti joinchecoanxin Zacarías

⁶⁷ Espíritu Santo joí conixin joachaxin ngain Zacarías, ndodé xanxichjan mé, co Zacarías nichja tti palabra que Dios joanjo ngain co ndačo:

⁶⁸ Cainxin chojni jiquininxin sinchecoanxinhi na Dios de Israel, tti chonda cain joachaxin, ixin jehe joí nganji na ján na řo chojni jehe co joichjá na iná vida naroa.

⁶⁹ Jehe chjá na ná chojni que chonda tsje joachaxin que danjo iná vida naroa, co chojni jiji joixin de ngayé razé David, tti cjoí jian ninchehe řa para ixin Dios.

⁷⁰ Ixin Dios jehe jańá ndačo ngain profeta, co jehe profeta joindačo nganji ján na, desde ngain tiempo are saho:

⁷¹ que ixin Dios tsjenguijna na para ngain chojni que ningacoan na co ngain chojni que rinaoha na,

⁷² co joindačo profeta cai ixin Dios coiaconoehé nindogoelitoa na řančjen, co ixin jehe Dios řonhi tiempo rrotjańehé tti trato jian que jehe joinchekjian ngain na.

⁷³ Janhi tti ndačo Dios conixin juramento que sinchehe ngain ndogoelitoa na řančjen Abraham:

⁷⁴ que ixin jehe tsančjandaha na ján na para ngain tti chojni que ningacoan na,

para que rroxaonha na sinttosayehe na jehe,
 75 co sontte na chojni jian para sontte na chojni
 Dios cainxin nchanho que ján na sontte-
 chon na.

76 Co jaha, xanxichjanhna, jaha sinhi profeté Dios
 que ttjen ngajni,
 ixin jaha tti tsji icha saho que Cristo para
 rrondate chojni queẁén tsentoxinhí na
 vidé na, jamé jaha sinchechjian ná nttiha
 nao para ixin Cristo.

77 Co jaha tti sinchenohe chojni Israel que tti
 jianha que jehe na tenchehe na nchao sit-
 jañehe na,

co jamé Dios nchao rrochjé na iná vida naroa.

78 Ixin Dios de ján na, jehe anto rinao na co anto
 ttiaconoá na,
 co jehe rroanha tti joadingasán de ngajni para
 sinchegasenhe cain chojni;

79 para que sinchengasenhe tti chojni que te ngain
 tti naxin xehe ixin chojni mé rrocho que
 jehe na ondavenhe na,
 co para que tsjagoa na queẁén sonao na cain cho-
 jni.

80 Co xanxichjan mé vangui xan co cada
 nchanho icha cosoji xan de ngain Espíritu Santo.
 Co cainxin tiempo mé jehe xan vehe xan ngagaha
 jna tti xonhi chojni jí hasta que jehe xan coexinhi
 xan joinchecoenhe xan chojni Israel.

2

Are concijhi Jesús
(Mt. 1.18-25)

¹ Chiaon tiempo are concjihi Juan, xiempérador vinhi Augusto César, co jehe xa coetonha xa que cjoinhi ná censo para vinttetaxin cainxin chojni de ngoixin nonttehe chojni romano.

² Jihi tti saho censo que cjoinhi are Cirenio vehe gobernador ngain Siria.

³ Cainxin chojni que vintteha ngain rajné chonda que cjoí na ngain rajné na para vinttetaxin na.

⁴ Mexinxin José vachjexin de rajna Nazaret ngain regioen Galilea, co sacjoi para ngain regioen Judea ngain rajna Belén, tti diconcjixin David, ixin José razé David.

⁵ José cjoí para Belén para joiguetaxin jehe conixin María, tti ovehe de novia ngain José para tsottehe. Co are mé María oveýá chjan.

⁶ Co are jehe na nttiha ngain Belén, ovittja tiempo que María sincheconcjihi chjan mé.

⁷ Nttiha joincheconcjixin María tti saho xenhe, co jehe coensiha xan lonttochjenhe xan, co coenjoa xan nttiha ngá tti cajón que jinea coxinttá ixin xonhi cuarto vittja na ngain ni ná mesón nttiha.

Are ángel joinchenohe tti tettingaria coleco

⁸ Nttiha chian rajna Belén canxion xí que vaquingaria coleco vittoecaho xa colecoe xa nttiha ngataon jngui ngain ttie mé.

⁹ Co de repente jehe xa vicon xa joí ná ángel de Dios ngain xa, co chíxo de Dios que jehe joiaho joinchengasán ngoixin ngandanji xa; co jehe xa anto vintteñaon xa.

¹⁰ Pero ángel mé ndacho ngain xa:

—Xaonha ra ixin janha joiquian ná jian joajna nganji ra, que are tsinhi ícha chojni anto rroché na cainxin na.

¹¹ Co mé rrocho ixin jai ngain rajné David concijhi ná tti rrochjá ra iná vida naroaxin, co jehe mé CRISTO, tti chonda cainxin joachaxin.

¹² Co jiji ná señal para que jaha ra sigatsoan ra chjan mé: jaha ra sinchí ra chjan jiji jisía xan lonttochjenhe xan co tajijoa xan ngá cajón tti jinea coxintá.

¹³ Co ngain rato mé, nttiha ngaca ángel mé cononxin anto tsje icha ángel que joixin de ngajni, co tenchecoanxinhi Dios tendácho:

¹⁴ ¡Nttosayehe na Dios que ttjen ngajni, co ngataha nontte cain tti chojni que jehe Dios coinchiehe, que jehe na sinao chó na!

¹⁵ Cottimeja are cain ángel mé sacjoi para ngajni, jehe nitettingaria coleco ndache chó na:

—Chjin na para Belén, ditsjehe na tti conhe jiji, tti joindattjo na Dios.

¹⁶ Toin vinttecji na ndoa co nttiha vittjaxin na María co José, co vintteguicon na xannchinchjan tajijoa xa ngá cajón tti jinea coxintá.

¹⁷ Are jehe na vintteguicon na xannchinchjan, jehe na coequin na cain tti ndácho ángel ngain na de ixin jehe chjan mé.

¹⁸ Co cainxin chojni que coinhi tti jehe na ndácho na vinttegoan chojni mé admirado.

¹⁹ Pero María cain cosa jiji coenchjinha ngain ansén, co anto vařaxaon de ixin cain cosa jiji.

²⁰ Jehe nitettingaria coleco sacjan na tti cointtohe na coe na, co joinchecoanxinhi na co joinchesayehe na Dios de ixin tti coinhi na de ngain

ángel co ixin vicon na xannchinchjan jamé inchin ndaço ángel ngain na.

Are María co José joinchechienhe na Jesús ngain nihngo icha importante

²¹ Are vittja Jesús jni nchanho de concjihi, chjé na tti xóhe que dinhi circuncisión co joincheguinihi na JESÚS, jamé inchin coetonha ángel ngain María icha saho que rroqueyá chjan mé.

²² Co are xette nchanho para María cosoji inchin ttetonha ley que vaye Moisés, jehe co José sajoicao na xanxichjan mé ngain nihngo icha importante que jí ngain ciudad de Jerusalén para coequin-inxin na xan ngain Dios.

²³ Jehe na joinchehe na jañá ixin ngain ley de Dios jitaxin: “Xanxí que saho sincheconcjihi ná nchí, xan mé para ixin Dios.”

²⁴ Mexinxin María co José vinttecji na ngain nihngo icha importante para joicán na ngain altar inchin ttetonha ley de Dios; nntaohe yó coquín o yó coxentta.

²⁵ Ngain tiempo mé nntiha Jerusalén vehe ná xí que vinhi Simeón. Mé vehe ná xí anto jian de ngain ansén, co jehe vanchesayehe Dios, co vachonhe tti nchanho are Dios tsjenguijna chojni ngain nación Israel sachá na ngain chojni romano. Espíritu Santo vehe ngain Simeón,

²⁶ co Espíritu Santo mé joinchenohe que jehe Simeón senha hasta que jehe sicon Cristo tsí, tti rrorroanha Dios.

²⁷ Jehe Simeón jihi cjoí ngain nihngo mé ixin jamé coetonha Espíritu Santo. Co are María co José

joiicaho na Jesús nttiha para joinchehe na inchin ttetonha ley de Dios,

²⁸ are mé Simeón cjóa xanxichjan Jesús ngá rá co joinchecoanxinhi Dios co ndačo:

²⁹ Janché, soixin onchao tančhanda na senhe na, ixin janché ovicon janha tti soixin ndachjenji na.

³⁰ Janha oviconxin con tti joí para tsjenguijna na janha na,

³¹ que soixin rroanha ngattoxon con cain chojni.

³² Jehe chojni jihi tti joadingasán que sinchen-gasenhe chojni de icha nación, co de ixin jehe tsosayexin chojni Israel, chojnia soixin.

³³ José co María, janné Jesús, vinttegoan na admirado de ixin tti ndačo Simeón de ixin jehe Jesús.

³⁴ Cottimeja Simeón joinchetsenhe ñao Dios que sinchenciaon Jesús conixin María co José co ndačo ngain María, janné Jesús:

—Tsjexinxin, de ixin xanxichjan jihi Dios sinchecastigá tsje chojni Israel co icha na Dios rrochjé na iná vida nroaxin de ixin tti sinchehe xan. Co jehe xan ná señal que joixin de ngain Dios que anto tsje chojni sitticaonha na jehe xan.

³⁵ Co jamé rrořago tti řaxaon cada chojni ngain ansén na. Pero para jaha, cain jihi inchin ná espada que sattodoho almá, ixin anto joachjaon rrochonda.

³⁶ Nttiha vehe ná nčhí cai que vagayé nča joajna de ngain Dios, co vinhi nča Ana. Co mé nčhichjehe ná tti vinhi Fanuel, de ngain grupoe Aser de chojni Israel. Nčhí mé atto onačhichjan vehe nča are mé. Co atto řa chjan nča are

dicottehe n̄cha, co vecao n̄cha xixihi n̄cha jecho yáto nano.

³⁷ Co are ngain tiempo mé ovechonda ochenta y cuatro nano de ndavenhe xixihi n̄cha. Jehe n̄cha vagaçhjexinha n̄cha de ngaxinhi nihngo mé, ixin de ttie co de nchanho vanchesayehe n̄cha Dios; vaguecjáño n̄cha co vanchecoanxinhi n̄cha Dios.

³⁸ Co ngain rato mé conchienne jehe Ana co después de joanjo gracias ngain Dios de ixin Jesús, coexinhi ndache cain chojni de ixin Jesús, tti chojni que techonhe tti nchanho are Dios tsjenguijna chojni Israel para sachá na ngain chojni romano.

Are María co José sacjancaho na Jesús para Nazaret

³⁹ Are joexin joinchehe na cain tti ttetonha ley de Dios, cjan na ngain Nazaret, rajné na, ngain regioen Galilea.

⁴⁰ Co Jesús icha vangui, co icha cosoji, co icha venohe jian, co Dios anto joinchenciaon.

Are Jesús cjoí ngaxinhi nihngo icha importante

⁴¹ José co María, janné Jesús, cain nano vacji na ngain ciudad Jerusalén para ixin tti quiai dinhi páscua.

⁴² Are Jesús joinchexette tteyó nano, jehe co José, co María, janné, canio na cjoí na Jerusalén inchin costumbré na ngain quiai mé.

⁴³ Co are ojoexin quiai mé, jehe na sacjan na co Jesús ndadiguittohe nttiha Jerusalén, co José co María venoeha na.

⁴⁴ Jehe na žaxaon na que puede Jesús nttiha jóí ngayé chojni, co jamé sacjoí na ngoixin nchanho

mé. Pero are ondaconaxin xehe, jehe na cjoé na Jesús ngayé icha ni ichó co niamigoe na,

⁴⁵ co vittjaha na Jesús. Cottimeja sacjan na para Jerusalén iná para cjoé na Jesús nttiha.

⁴⁶ Vatto ní nchanho, cottimeja vittja na Jesús tají ngaxinhi nihngo icha importante, ngayé ximae-stroes ley tajittinhi tti tendačo xa co jehe danchi-angui ngain xa icha cosa de Dios.

⁴⁷ Cain chojni que coinhi tti ndačo jehe vint-tegoan na admirado ixin tti nichja jehe jian jí, co de cain pregunta que joanchiangui xa ngain, jehe nchao ndačo cain.

⁴⁸ Are José co María vicon na mé, vinttegoan na admirado, co janné ndačo jan ngain jehe:

—Hijo, ¿quedonda jañá joinchehe nganji na janha na? Ndodá conixin janha tettjé ra jaha co anto xaon na.

⁴⁹ Cottimeja Jesús ndačo:

—¿Quedonda ttjé ni ra? ¿Anoaha ra que janha chonda que sarihi ngain nihngo para ixin asunto de Ndodana?

⁵⁰ Pero jehe na coinxinha na tti ndačo Jesús ngain na.

⁵¹ Cottimeja Jesús conixin José co María sacjan na para Nazaret, co Jesús anto vanchehe sigue vaguitticaon ngain cayoi na. Co María, janné Jesús, cain jihi coenchjinha jan ngain ansén jan.

⁵² Co de cain tiempo mé Jesús icha vangui de ngain cuerpoe co de ngain joarrixaoen, co Dios, conixin cain chojni que chonxin jehe Jesús anto joinao na jehe.

3

Are Juan ndache chojni ngagaha jna joajné Dios (Mt. 3.1-12; Mr. 1.1-8; Jn. 1.19-28)

¹ Vittjaxon quince nanó de jittetonha xiemperador Tiberio César, are mé Poncio Pilato vehe gobernador ngain Judea, co Herodes vehe gobernador ngain Galilea, co xanchó Herodes que vinhi Felipe vehe gobernador ngain región que dinhi Iturea co ngain región que dinhi Traconite, co Lisantias vehe gobernador ngain regioen Abilinia.

² Co are mé ná tti vinhi Anás co iná tti vinhi Caifás nimé ni vintte xidána icha importante. Ngain tiempo mé, de ngagaha jna tti xonhi chojni te, Dios nichja ngain Juan, xenhe Zacarías,

³ co Juan vačhje cjoí ngain cain lugar de ngandehe río Jordán para ndache chojni ixin chonda na que tsentoxinhi na vidé na co siguitte na, para que cainxin tti jianha que nchehe na Dios sinchetjañehe na.

⁴ Cain jiji conhe inchin diquentaxin profeta Isaías janhi:

Tsinhi na ná tté chojni que tsoyaoxin de ngagaha jna co rrondačo:

“Nchechjian ra nttiha para ixin jehe tti chonda cain joachaxin;

danttjehe ra ná nttiha nao.

⁵ Cain tsaga singattea tsaga,

co cain jna co jnanchjan tsonataonxin;

cain nttiha que jeha nao, tsonao nttiha,

co cain nttiha que jeha nataonxin, tsonataonxin nttiha.

⁶ Cottimeja cainxin chojni sicon na tti rroanha Dios para tsjenguijna jehe na.”

⁷ Are chojni vaconchienne na para que Juan rrojincheguitte na, jehe vandačo ngain na:

—¡Jaha ra xenhe conché ra! ¿Quensen joint-tanoha jaha ra ixin nchao setanha ra tti castigo anto soji que jitonchian?

⁸ Saho nchehe ra jian para que jamé sicon icha chojni que ján ndoa coentoxinhi ra vidá ra co ndacheha chó ra: “Ján na razé Abraham na; mexinxin Dios tsjenguijna na”, ixin janha rrondattjo ra que hasta xó jihi Dios nchao sinchechjian xó chojni de razé Abraham.

⁹ Ojí listo hacha para tsončhinji nttá, co cain nttá que danjoha jian ttochjoin rročhinji nttá co rroche nttá ngain xóhi.

¹⁰ Cottimeja cain chojni mé joanchiangui na ngain Juan co ndačo na:

—Mexinxin, ¿quehe chonda na que sinttaha na remé?

¹¹ Juan ndačo ngain na:

—Xó chonda ra yó camisa chonda ra que sanjo ra ná camisa ngain tti chondaha ni ná camisa. Co xó chonda ra tti jintte ra, jinttecoho ra tti chojni que chondaha.

¹² Nttiha vintteconchienne canxion xicobrador de impuesto cai para que joiguitte xa, co joanchiangui xa ngain Juan co ndačo xa:

—Maestro, ¿quehe chonda na que sinttaha na janha na?

¹³ Co Juan ndačo ngain xa:

—Ncheha ra cobro icha de tti ttetonha ley.

¹⁴ Cai canxion xisoldado joanchianguihi xa Juan co ndačo xa:

—Co janha na, ¿quehe chonda na que sinttaha na?

Juan ndačo ngain xa:

—Dantsjeha ra tomí chojni afuerza, ni tjanguiha ra cosa que jehe na xonhi joinchehe na; jaha ra dintte ra contento conixin tti tomí que jaha ra tedacha ra.

¹⁵ Cain chojni mé anto joinao na conohe na ixin quensen Juan ixin xaxaon na que puede Juan jehe mé tti Cristo.

¹⁶ Pero Juan ndache cainxin na:

—Janha ndoa nttaguittexin chojni conixin jinda, pero toin tsí iná xí que sinttaguittexin ra conixin Espíritu Santo co Espíritu mé tsiaho xá xohi para sincheroa almá ra xá tonhe oro toroaxin ngain xohi. Co xí mé chonda xa anto icha tsje joachaxin que janha, ixin janha ni jiquininxinha na ni tsonxindangá corrié catté xa.

¹⁷ Xí mé ojyá xa palé xa, para tsjendoaxin xa trigo, co para sachjehe trigo paja. Sasicao xa cain trigo ngain nchiandoha xa, pero cain paja tsjaga xa ngain ná xohi que xonhi tiempo danga xoi.

¹⁸ Conixin jihi, co icanxin consejo, vandachexin Juan chojni tti jian joajna.

¹⁹ Co después, Juan joinchesattehe xigobernador Herodes ixin vecao xa jeho nchicoñadé xa que vinhi Herodías, mé cjoí chíhi Felipe, xichó jehe Herodes, co jehe Juan joinchesattehe Herodes de ixin icha cosa jianha cai que joinchehe Herodes.

²⁰ Pero Herodes vitticaonha. Co en lugar de rroguitticaon, joinchehe iná cosa jianha ixin jehe coiaxinhí Juan ngain cárcel.

*Are joiguitte Jesús
(Mt. 3.13-17; Mr. 1.9-11)*

²¹ Saho de viaxinhi Juan, ngain ná nchanho are Juan jincheguitte anto tsje chojni, cai Jesús cjoí para que Juan joincheguitte jehe. Co después que joiguitte Jesús, are jehe joinchecoanxinhi Dios, ngajni xiré

²² co Espíritu Santo xincanji xá ná conttoanajni ngataha Jesús co vicon na, co coinhi na tté Dios de ngajni que ndačo:

—Jaha tti Xanhna que janha anto rinaho, co de ixin jaha janha anto chahna.

*Cain nindogoelito xančhjen de Jesús
(Mt. 1.1-17)*

²³ Jesús vechonda inchin treinta nano are jehe coexinhi ndache chojni de ixin Dios. Cain chojni xaxaon na ixin jehe cjoí xenhe José. Jehe José mé cjoí chjan de Elí,

²⁴ co Elí cjoí chjan de Matat, co Matat cjoí chjan de Leví, co Leví cjoí chjan de Melqui, co Melqui cjoí chjan de Jana, co Jana cjoí chjan de José.

²⁵ José cjoí chjan de Matatías, co Matatías cjoí chjan de Amós, co Amós cjoí chjan de Nahum, co Nahum cjoí chjan de Esli, co Esli cjoí chjan de Nagai,

²⁶ Nagai cjoí chjan de Maat, co Maat cjoí chjan de Matatías, co Matatías cjoí chjan de Semei, co Semei cjoí chjan de José, co José cjoí chjan de Judá.

²⁷ Judá cjoí chjan de Joana, co Joana cjoí chjan de Resa, co Resa cjoí chjan de Zorobabel, co Zorobabel cjoí chjan de Salatíel, co Salatíel cjoí chjan de Neri.

28 Neri cjoï chjan de Melqui, co Melqui cjoï chjan de Adi, co Adi cjoï chjan de Cosam, co Cosam cjoï chjan de Elmodam, co Elmodam cjoï chjan de Er.

29 Er cjoï chjan de Josué, co Josué cjoï chjan de Eliezer, co Eliezer cjoï chjan de Jorim, co Jorim cjoï chjan de Matat.

30 Matat cjoï chjan de Leví, co Leví cjoï chjan de Simeón, co Simeón cjoï chjan de Judá, co Judá cjoï chjan de José, co José cjoï chjan de Jonán, co Jonán cjoï chjan de Eliaquim.

31 Eliaquim cjoï chjan de Melea, co Melea cjoï chjan de Mainán, co Mainán cjoï chjan de Matata, co Matata cjoï chjan de Natán.

32 Natán cjoï chjan de David, co David cjoï chjan de Isaí, co Isaí cjoï chjan de Obed, co Obed cjoï chjan de Booz, co Booz cjoï chjan de Salmón, co Salmón cjoï chjan de Naasón.

33 Naasón cjoï chjan de Aminadab, co Aminadab cjoï chjan de Aram, co Aram cjoï chjan de Esrom, co Esrom cjoï chjan de Fares, co Fares cjoï chjan de Judá.

34 Judá cjoï chjan de Jacob, co Jacob cjoï chjan de Isaac, co Isaac cjoï chjan de Abraham, co Abraham cjoï chjan de Taré, co Taré cjoï chjan de Nacor.

35 Nacor cjoï chjan de Serug, co Serug cjoï chjan de Ragau, co Ragau cjoï chjan de Peleg, co Peleg cjoï chjan de Heber, co Heber cjoï chjan de Sala.

36 Sala cjoï chjan de Cainán, co Cainán cjoï chjan de Arfaxad, co Arfaxad cjoï chjan de Sem, co Sem cjoï chjan de Noé, co Noé cjoï chjan de Lamec.

37 Lamec cjoï chjan de Matusalén, co Matusalén cjoï chjan de Enoc, co Enoc cjoï chjan de Jared, co

Jared cjoi chjan de Mahalaleel, co Mahalaleel cjoi chjan de Cainán.

³⁸ Cainán cjoi chjan de Enós, co Enós cjoi chjan de Set, co Set cjoi chjan de Adán, co Adán cjoi chjan de Dios.

4

Are inchínji jinao rrojincheyehe Jesús

(Mt. 4.1-11; Mr. 1.12-13)

¹ Espíritu Santo vittohe ngain Jesús, co joinchegayé Jesús anto tsje joachaxin. Are jehe cjanxin de rio Jordán Espíritu mé joicao Jesús para ngagaha jna tti xonhi chojni te.

² Nttiha vehe Jesús cuarenta nchanho, co inchínji joaquehe prueba ngain Jesús. Jesús xonhi joine de cainxin nchanho mé, co después Jesús venhe jinta.

³ Cottimeja inchínji ndačo ngain Jesús:

—Si ndoa jaha Xenhe Dios, ttetonha que xo tehe rrocjan xo niottja.

⁴ Jesús ndačo:

—Ngain tti jitaxin Palabré Dios ndačo: “Chojni techonxin jeoha de tti jine na sino que cai de cain palabra que Dios ndačo.”

⁵ Cottimeja inchínji sajoicao Jesús ngataha ná jna anto noi. Co de nttiha anto daca cjoa-goexin inchínji Jesús cainxin nación que jí ngoixin mundo.

⁶ Co inchínji ndačo ngain Jesús:

—Janha rrochjaha jaha cainxin joachaxin de tsetonhe cain nación yá, co cainxin cosa chjoin que jí ngain nación yá. Ixin janha vayá cainxin

yá, co janha rrochjaha cain yá tti chojni que janha rinaho rrochjaha.

⁷ Si jaha saritoxin nntajochjiha co sinchesayana janha, cain yá cosá jaha.

⁸ Pero Jesús ndačo ngain inchínji:

—Sattjixin de nganji na janha, Satanás, ixin ndačo ngain tti jitaxin Palabré Dios: “Nch-esayehe jehó Dios tti chonda joachaxin para ixin jaha co jehó jehe tti ditticaon jaha.”

⁹ Cottimeja jehe inchínji sajoicao Jesús para ngain ciudad de Jerusalén co nntiha inchínji joinchecani Jesús para ngataha techoe nihngo icha importante. Co ndačo ngain Jesús:

—Si ndoa jaha Xenhe Dios, daritsingaxin de nntihi hasta tti nontte;

¹⁰ ixin ngain tti jitaxin Palabré Dios ndačo: Dios tsetonhe ángel de jehe para senda jaha.

¹¹ Cain ángel mé rrocacha conixin rá, para que xonhi tti tsonihi rottea de ixin xo.

¹² Jesús ndačo ngain inchínji:

—Cai ndačo ngain tti jitaxin Palabré Dios: “Daqueha prueba ngain Dios tti chonda joachaxin para ixin jaha.”

¹³ Co jañá are inchínji čhoha joincheyehe Jesús, jehe sacjoixin de ngain Jesús para ná tiempo.

Jesús coexinxin xé ngain Galilea

(Mt. 4.12-17; Mr. 1.14-15)

¹⁴ Jesús cjan para Galilea conixin anto tsje joachaxín Espíritu Santo, co cainxin chojni de ngain región mé vanichja na de ixin tti jian que vanchehe Jesús.

¹⁵ Jehe vanchecoenhe chojni de ixin Dios ngain cain nihngo de cain lugar nttiha, co cainxin chojni nttiha joinchesayehe na Jesús.

Jesús ngain Nazaret

(Mt. 13.53-58; Mr. 6.1-6)

¹⁶ Cottimeja, Jesús cjoí para Nazaret, tti rajna vanguixin jehe. Ngain nchanho que nchejogaha ni, Jesús cjoí ngaxinhi nihngo nttiha inchin costumbré jehe, co nttiha vingattjen para tsjehe tti xón que jitaxin Palabré Dios.

¹⁷ Jehe na chjé na Jesús tti libro que dicjin profeta Isaías, co are jehe conxiré libro mé vittja tti jitaxin janhi:

¹⁸ Espíritu Santo de Dios jí nganji na janha, ixin Dios chjana xa de ndachjan tti jian joajna ngain chojni que inchin ondadiguenhe espíritu;

Dios rroanha na janha para sinttaxingamá tti chojni que tedetan tangui ngain ansén, co para rrochjaha libertad tti chojni que teaxinhi, co para rrochjaha jmacon tti chojni que diconha; co para de ixin janha tti chojni que detan tangui ngain icha chojni isetanha na tangui mé;

¹⁹ co para que rrondattjan chojni que ojoí tiempo que Dios tsjenguijna na.

²⁰ Cottimeja Jesús coejé libro mé, co joanjo libro ngain tti vacjenguijna chojni ngain servicio, co jehe tavehe. Co ixin cainxin chojni nttiha anto xóan na de ixin Jesús,

²¹ jehe coexinhi nichja co ndačo:

—Jai mismo joiconhe ngattoxon con ra tti jitaxin jihi.

²² Cain chojni nttiha nichja na jian de ixin Jesús, co vinttegoan na admirado de ixin tti palabra çhjoin que ndaço Jesús ngain na. Co jeha na joanchianguihi chó na co ndaço na:

—¿Ajeha jihi tti xitsihi José?

²³ Jesús ndaço ngain na:

—Seguro que jaha ra rrondachjenji ni ra janhi: “Jaha que danjo xoan, toxoanha jaho”; co rrondachjenji ni ra cai: “Tti coian na joinchehe jaha ngain rajna Capernaum, nchehe nttihi ngain rajná cai para sicon na janha na.”

²⁴ Cottimeja joinchehe sigue nichja, co ndaço:

—Rrondattjo ra ndoa que ni ná profeta sitti-caonha chojni de ngain rajné.

²⁵ Janha rrindattjo ra seguro que vintte tsje nçhiganha ngain nacioen Israel ngain tiempoe profeta Elías, are joiha çhin ní nano co rioho co anto vehe jintta ngoixin nación.

²⁶ Pero Dios rroanha Elías para joicjenguijna ni ná nçhiganha que vintte Israel, sino que jeha cjo para joicjenguijna ná nçhiganha que vehe ngain Sarepta, chiaon ciudad de Sidón.

²⁷ Cai vintte ngain Israel tsje chojni que vintteninxin chin lepra ngain tiempoe profeta Eliseo. Pero Eliseo joinchexingameha ni ná de jeha na, sino que jeha joinchexingamehe Naamán de ngain nonttehe Siria.

²⁸ Cain nite ngaxinhi nihngo nttiha are vinttequinhi na cain cosa yá, anto vinttegoñao na.

²⁹ Vingattjen na co vantsjexin na Jesús de nttiha, co joicao na hasta tti con jna nttiha, ngain tti jna

diconchjian ciudad mé, para rrocjabin na Jesús desde nttiha.

³⁰ Pero are orrocja na Jesús, jehe jion vatto ngayehe na co sacjoi.

*Ná xí que vechonda espíritu jianha
(Mr. 1.21-28)*

³¹ Cottimeja Jesús cjan para Capernaum, ngain nonttehe Galilea co nttiha cada nchanho que nchejogaha ni, jehe vacji ngain nihngo nttiha para vandache chojni de ixin Dios.

³² Chojni nttiha vaguinttegoan na admirado de ixin tti vandačo Jesús ixin vanichja conixin palabra de joachabin.

³³ Ná nchanho ngain nihngo nttiha dicji ná xí que vechonda xa espíritu jianha ngaxinhi cuerpoe xa, co espíritu mé coyao co ndačo:

³⁴ —Sattjixin de nganji na jaha Jesús de Nazaret. ¿Ajoihí jaha para santsjena ra joachabin que chonda na? Janha chonxin jaha co nona que jaha tti icha jian de ngain Dios.

³⁵ Jesús ndačo ngain espíritu jianha mé:

—¡Tencoá, co sattjixin de ngain xí yá!

Cottimeja jehe espíritu jianha joanca tti xí mé ngataha nontte ngattoxon con jehe na, co vačhjixin de ngaxinhi cuerpoe xí mé, co xonhi tti conihí cuerpoe xa.

³⁶ Cainxin chojni que vicon nttiha xon na, co vinttendache chó na:

—¿Quehe chonda palabré xí jihí? Ixin ttetonha xa conixin anto joachabin ngain espíritu jianha que jehe satsji co espíritu mé jamé sattji.

³⁷ Co cain rajna de ngoixin region mé conohe chojni tti jian que vanchehe Jesús.

Jesús joinchexingamehe jannché Simón Pedro
(Mt. 8.14-15; Mr. 1.29-31)

³⁸ Cottimeja Jesús vačhjexin de nihngo ntthiha co sacjoi para nchiandoha Simón Pedro. Are mé jannché Pedro jinihi jan ixin ná soa anto soji, mexinxin joinchetsenhe na ñao Jesús para joinchexingamehe naníta mé.

³⁹ Jesús joisé para ngain naníta mé, co nichjayé soa mé, co ngain rato mé ndavačhje soa mé, co naníta mé jaicoa vingattjen co joincheatendehe na.

Jesús joinchexingamehe tsje ninihi
(Mt. 8.16-17; Mr. 1.32-34)

⁴⁰ Are viataon nchanho mé, cain chojni que vinttechonda ninihi que vintteninxin de tsje chin, joiaho na cain chojni mé para ngain Jesús; co jehe coín rá ngataha cada na, co jamé Jesús joinchexingamehe cain na.

⁴¹ Tsje de jehe ninihi mé vinttechonda na espíritu jianha co are vačhjexin espíritu mé de ngaxinhi cuerpoe na, coyao co ndačho:

—Jaha tti Xenhe Dios.

Pero Jesús joinchesattehe espíritu jianha mé co Jesús coančjandaha espíritu mé para nichja espíritu icha ixin vinttenohe que Jesús jehe tti Cristo.

Jesús nichjé chojni ngain Galilea de ixin Dios
(Mr. 1.35-39)

⁴² Are ovingasán ngain nchanho iná, Jesús vačhjexin de ngain ciudad co sacjoi ngain ná lugar tti xonhi chojni te. Pero chojni cjoé na Jesús hasta

que vittja na tti jí, co joinchetsenhe na ñao Jesús ixin tarroguehe nttiha Capernaum ngain na.

⁴³ Pero jehe ndačo ngain na:

—Janha chonda que sindattjan chojni ngain icanxin lugar ixin ojoí tiempo are Dios tsetonha ngain ansén na ixin para mé rroanxin na Dios janha.

⁴⁴ Co jañá vacji Jesús ngain cain nihngo ngoixin regioen Galilea para vandache chojni de ixin Dios.

5

Are Jesús joinchehe milagro para que jehe na tse na copescado

(Mt. 4.18-22; Mr. 1.16-20)

¹ Ná nttiha, Jesús tají ngandehe lago que dinhi Genesaret, co nttiha xatte anto tsje chojni que hasta conttedoguehe Jesús ixin cain na joinao na coinhi na joajné Dios.

² Co Jesús vicon nttiha tate yó barco ngandehe jinda que xonhi chojni teringa rato mé ixin xí que tse copescado ovania xa de barco mé co tatettjén xa nonchaha.

³ Cottimeja Jesús joixinhi ná de tti yó barco mé, co barco mé barcoe Simón Pedro, co Jesús ndačo ngain Pedro que sinchengaxinton barco de ngandehe nda. Cottimeja nttiha tavetaha Jesús ngataha barco co de nttiha ndachexin Jesús cain chojni que te ngandehe jinda de ixin Dios.

⁴ Are joexin nichja Jesús, jehe ndačo ngain Simón Pedro:

—Ttjiho barco ngain jinda tti icha nihnga, co nttiha dancahngui ra nonchá ra para rrotse ra copescado.

⁵ Pedro ndaĉho ngain Jesús:

—Maestro, ngoixin ttie jointtaha na ĵa co ĵonhi copescado tse na; pero jaxon soixin rrit-tetonna, mexinxin janha sigancahngui nonchaha iná ngain jinda.

⁶ Are jamé joinchehe na, ndoa anto tsje copescado tse na que hasta ocoexinhi ĉhintaon nonchaha.

⁷ Cottimeja joinchehe na seña xicompañeroe na que teringa ngain barco jngo para que joinchechienhe na barco mé para cjoenguijna chó na. Co cayoi barco joinchecaon na de copescado que hasta joinao sarroxincajingui barco jinda.

⁸ Are vicon Simón Pedro jihi, jehe vettoxin nttajochjihi ngain Jesús co ndaĉho:

—Nttatsanha ñao sattjixin soixin de nganji na janha ixin janha anto tsje cosa jianha jointtaha.

⁹ Simón Pedro ndaĉho jañá ixin jehe anto ĵaon conixin cain chojni que te ngain, ixin anto tsje copescado tse na.

¹⁰ Cai Jacobo co Juan, cayoi xenhe Zebedeo, tti xicompañeroe Pedro, anto vintteĵaon xa cai. Pero Jesús ndaĉho ngain Pedro:

—Ĵaonha jaha ixin jai pa ndaha en lugar de copescado, jaha satse chojni para ixin Dios.

¹¹ Cottimeja are joinchechienhe na barco ngandehe ndachaon, vintteganía na co ntthiha cointtohe na cainxin cosé na co savinttecji na conixin Jesús.

*Jesús joinchexingamehe ná tti vechonda lepra
(Mt. 8.1-4; Mr. 1.40-45)*

¹² Are Jesús vehe ngain ná rajna nttiha, conchienne ná xí ngain Jesús. Xí mé vechonda xa chin lepra. Co are vicon xa Jesús, jehe xa vettoxin nttajochjihi xa co visé xa hasta tti ngataha nontte co joinchetsenhe xa ñao Jesús co ndačo xa:

—Si soixin rinao, nchao sinchexingamana de chin que rrichonda.

¹³ Cottimeja Jesús catte xí mé co ndačo ngain xa:

—Ján rinaho; xingamaha.

Co ngain rato mé ndavitján tti chin lepra que vechonda xí mé.

¹⁴ Cottimeja Jesús coetonhe xí mé que xonhi chojni rrondache xa. Jesús ndačo ngain xí mé:

—Jeho ttji ngain xidána para que jehe xa sicon xa que jaha ixonhi chin chonda co danjo cosa ngain Dios inchin ttetonha ley que vayé Moisés para que cainxin chojni tsonohe na ixin jaha ixonhi chin chonda.

¹⁵ Pero nchanho co nchanho icha tsje chojni vaconohe de ixin tti jian que vanchehe Jesús. Co anto tsje chojni vaçatte ngain para vaquinhi na de ixin Dios, co para que Jesús vanchexingamehe na de quexeho chin que vinttechonda na.

¹⁶ Pero Jesús tsje nttiha vagaçhjenda savacji ngain lugar tti xonhi chojni te, co nttiha jehe vanchecoanxinhi Dios.

Jesús joinchexingamehe ná tti çhoha vacji

(Mt. 9.1-8; Mr. 2.1-12)

¹⁷ Ná nchanho Jesús tajindache tsje chojni de ixin Dios, co no nttiha tate canxion xifariseo co canxion ximaestroey ley que vinttequixin de cainxin rajna de ngain regioen Galilea co de ngain

regioen Judea co de ngain ciudad de Jerusalén. Co are mé Jesús cjoago que joachaxín Dios jí ngain jehe ixin joinchexingamehe tsje chojni nihi.

¹⁸ Are mé, vinttequí canxion xí que vinttequiaoxin xa camilla ná tti čhoħa vacji, co joinao chojni mé rroħanxinhi na jehe tti nihi mé ngaxinhí nchia tti jí Jesús co rroquín na nttiha ngat toxon con Jesús.

¹⁹ Pero čhoħa vixinhi na ixin anto tsje chojni te ngandanguí nchia mé. Cottimeja coani na ngataha techoe nchia co vinttjian na canxion teja, para que nttiha joinchexincanjinxin na tti nihi conixin camilla ngayehe chojni para vehe ngat toxon con Jesús.

²⁰ Are Jesús vicon que cain xí mé chonda xa seguro que Jesús sinchexingamehe jehe tti nihi mé, Jesús ndačo ngain tti nihi:

—Cain tti jianha que jaha joinchehe, janha ojointtatjañaha.

²¹ Cottimeja cain ximaestroe ley que te nttiha, co xifariseo vintteħaxaon xa: “¿Quensen xí jihi, que nchaoha jinichja xa para ixin Dios? ħonhi chojni nchao sinchetjañehe iná chojni tti jianha que nchehe na, jehο Dios tti nchao sinchehe mé.”

²² Pero Jesús ovenohe tti teħaxaon xa co ndačo ngain xa:

—¿Quedonda ħaxaon ra jañá?

²³ ¿Quexehe tti icha tanguiha rrondattjan ná tti nihi: “Tti jianha que jaha joinchehe janha ojointtatjañaha”, o rrondattjan: “Dingattjen co sattji”?

²⁴ Nchao jí remé, janha tsjagoha jaha ra que janha, tti Xí que joixin de ngajni, chonda

joachaxin nttihi ngataha nontte para nttatjañá chojni tti jianha que nchehe na.

Cottimeja Jesús cjan ngain tti nihi mé co ndačo:

—Janha rrindattjo jaha que dingattjen, co tsinhi camillá co sattji para nchiandoi.

²⁵ Ngain rato mé jehe tti čhoha vacji mé vingattjen ngattoxon con cain chojni nttiha, co tsín camillé tti vetsingataha co sacjoi para nchian-doha. Co ngoixin sacjoi jehe joinchecoanxinhi Dios.

²⁶ Cain chojni que te nttiha vinttegoan na admirado co cain na joinchecoanxinhi na Dios cai, co hasta teᵗaon na ndačo na:

—Jai gocon na cosa čhjoin que ni ná nchanho goconha na jihi.

Jesús nichjé Leví

(Mt. 9.9-13; Mr. 2.13-17)

²⁷ Después de cain jihi Jesús vačhjexin de nttiha, co jehe vicon ná xicobrador de impuesto que vinhi Leví. Jehe xí mé tají xa ngain mesa tti xengaxin hna impuesto, co Jesús ndačo ngain xí mé:

—Āacoi chjin na.

²⁸ Cottimeja jehe Leví, ngain rato mé vingattjen co nttiha cointtohe cain, co sarroé Jesús.

²⁹ Después Leví coín ná fiesta jie ngain nchian-doha para ixin Jesús, co nttiha joincaho na tsje xicobrador de impuesto ngain nacoa mesa co icha chojni cai.

³⁰ Pero tsje xifariseo co ximaestroe ley coexinhi xa nichja xa feo ngain tti chojni que vacao Jesús, ndačo xa ngain na:

—¿Quedonda jinttecoho ra co dicoho ra xico-brador de impuesto co icha chojni que nchehe jianha?

³¹ Jesús ndačo ngain xa:

—Chojni que niha, chojni mé rrogondeha xincheñoan, jecho tti chojni nihi, mé tti rrogondehe xincheñoan.

³² Janha joiha para joinichjá tti chojni que tenchehe jian, sino que chojni que tenchehe jianha para que jehe na tsentoxinhi na vidé na para isincheha na cosa jianha.

Are joanchianguihi na Jesús ixin quedonda chojni jehe dinttecjáño na

(Mt. 9.14-17; Mr. 2.18-22)

³³ Cottimeja jehe xa joanchianguihi xa Jesús co ndačo xa:

—¿Quedonda chojni que xicao Juan co chojni xifariseo anto dinttecjáño na co anto nchecoanxinhi na Dios, pero chojni que čhjiho jaha cainxin nchanho jine na co dihi na?

³⁴ Jesús ndačo ngain xa:

—¿Apoco jaha ra nchao sinchecjáño ra tti chojni que rrondache ra siji ngain ná vandango tti totehe na are xinovio řa jí xa ngain na?

³⁵ Pero tsí rato que chojni sasicao na xinovio, cottimeja jehe na sinttecjáño na.

³⁶ Cai ndačo Jesús ejemplo jihi ngain xa:

—Xonhi chojni ttinchje rioho lontto naroa para tteyehe lontto nttaxichjan. Si ná chojni sinchehe jamé, jehe ndasinchetján lontto naroa; co deporsín rioho lontto naroa čhjoinha dicon ni ngain lontto nttaxichjan.

³⁷ Cai čho ha si quia ná řan que jidatsoxinhi ngá roanřan nttaxí, ixin si jamé tsonhe, tti řan que jidatsoxinhi tsončhintaon řan roanřan, co řan co roanřan cayoixin ndasitján.

³⁸ Mexinxin řan que jidatsoxinhi chonda que si quia řan ngá roanřan naroaxin, co jamé cayoi cosa xonhi tsonhe.

³⁹ Co řonhi chojni que dihi řantsja, cottimeja sincheřoxinhi sihi řan que dica tsjen, ixin ndačo na: “řantsja, řan mé tti icha jian.” Jańá tti costume que jaha ra chonda ra jiha de acuerdo ngain tti janha rrindattjo ra.

6

Chojni que vacao Jesús cončhinji na trigo ngain nchanho que nchejogaha ni
(Mt. 12.1-8; Mr. 2.23-28)

¹ Ná nchanho que nchejogaha ni, Jesús co tti chojni que vacao vatto na canxion jngui que diguinga trigo, co chojni que vacao Jesús cončhinji na canxion ninchjan de trigo, co ngá rá na joincheroaxin na trigo co joine na noanchjan.

² Co canxion xifariseo joanchiangui xa ngain na co ndačo xa:

—¿Quedonda jaha ra nchehe ra ná řa que jiquinxinha sinchehe ni ngain tti nchanho que nchejogaha ni?

³ Cottimeja Jesús ndačo ngain xa:

—¿Adiconha jaha ra tti jitaxin ngain Palabré Dios de ixin queřen joinchehe David, jehe conixin cain xicompañeroe ngain ná nchanho are anto vinteguenhe na jintta?

⁴ David conixin cain xicompañeroe joixinhi na nihngo icha importante co David coá tti niottja que joixin ngataha alté Dios co joine nio, co joanjo nio ngain cain xicompañeroe que joicao. Co niottja mé jehó xidána jiquininxin vane xa nio.

⁵ Cai ndačo Jesús ngain xa:

—Janha, tti Xí que joixin de ngajni, chonda joachaxin cai para tti nchanho que nchejogaha ni.

*Tti xí que ndadixemadoho ná rá
(Mt. 12.9-14; Mr. 3.1-6)*

⁶ Iná nchanho que nchejogaha ni, Jesús joixinhi iná nihngo co coexinhi joinchecoenhe chojni de ixin Dios. Co nttiha tají ná xí que ndadixemadoho ná rá xa, ra jian.

⁷ Co ximaestroey ley, co xifariseo tatetsayehe xa Jesús para sicon xa asinhexingamehe xí mé ngain nchanho que nchejogaha ni, para jamé rrochonda xa quehe rrocjanguixin xa Jesús.

⁸ Pero Jesús ovenohe quehe teŕaxaon ximaestroey ley co xifariseo, co jehé ndache tti xí que ndadixemadoho ná rá:

—Dingattjen co darihi ngosine.

Tti xí vingattjen co cjoí vengattjen ngosine.

⁹ Cottimeja Jesús ndačo ngain ximaestroey ley co xifariseo:

—Janha sanchianguiha ra ná cosa: ¿Quehe jiquininxin sinchehe ni ngain nchanho que nchejogaha ni; asinchehe ni jian, o asinchehe ni tti jianha? ¿Atsančhjandaha ni chojni ndasenhe, o ani nasoenxon ni?

¹⁰ Cottimeja Jesús tsjehe ngain nite ngandanji jehé, co ndačo ngain tti xí mé:

—Ttinxe rá.

Co tti xí coinxe rá, co ngain rato mé ixonhi chin vechonda rá tti xí mé; ondaxingamehe.

¹¹ Pero xicanxin anto vinttegoñao xa co coexinhi xa joanchianguihi chó xa ixin quehe sinchehe xa ngain Jesús.

*Jesús coinchiehe tti tteyó chojni que vacao
(Mt. 10.1-4; Mr. 3.13-19)*

¹² Ná nchanho ngain tiempo mé Jesús sacjoi ngagaha ná jna para joinchecoanxinhi Dios, co ngoixin ttie mé Jesús joinchecoanxinhi Dios.

¹³ Are vingasán, jehe vayé cain chojni que vacao, co coinchiehe tteyó de jehe na, tti ni jehe joincheguini representanté jehe.

¹⁴ Co nombré na cada na janhi: “Simón, tti jehe Jesús joincheguini Pedro; Andrés xanchó Simón; Jacobo co Juan, Felipe co Bartolomé,

¹⁵ Mateo co Tomás, Jacobo, tti xenhe Alfeo; Simón jehe ná de tti partidoe chojni politico que vaquetocaho chojni romano;

¹⁶ Judas tti xanchó Jacobo; co Judas Iscariot tti joindačo para tse na Jesús.

*Are Jesús cjoagoe tsje chojni de ixin Dios
(Mt. 4.23-25)*

¹⁷ Jesús xincanjinxin de ngagaha jna conixin tti tteyó chojni co tavintte na ngataon ná jngui, jehe conixin chojni. Co xatte anto tsje chojni de ngoi región de Judea co de ciudad de Jerusalén co de ngoixin ngandehe ndachaon ngain regioen ciudad de Tiro co Sidón. Cain chojni mé conchienne na para joiquinhi na tti nichja Jesús de ixin Dios co para joixingamehe na de ixin quexeho chin que techonda na.

18 Tti nivinttechonda espíritu jianha ngaxinhi cuerpoe, cai xingamehe na.

19 Cain chojni joinao na catte na Jesús, ixin jehe vanchexingamehe cain chojni conixin joachaxín Dios que jehe chonda.

Quensen tti čhjoin sehe ngain vidé co quensen tangui tsonhe

(Mt. 5.1-12)

20 Cottimeja Jesús tsjehe tti chojni que vacao co ndačo ngain na:

—Anto čhjoin para ixin jaha ra xó noa ra ixin jiquininxin ra ngajni tti ttetonha Dios.

21 'Anto čhjoin para ixin jaha ra xó denhe ra jintta jai, ixin después jaha ra tsojaha ra.

'Anto čhjoin para ixin jaha ra xó tsjanga ra jai, ixin después jaha ra tsjano ra.

22 'Anto čhjoin para ixin jaha ra are chojni tsoñao nganji ra co are sengui ra na, co are rronichja na feo nganji ra, co are rronichja na jianha de ixin jaha ra ixin jaha ra chojnina janha, tti Xí que joixin de ngajni.

23 Are tsonha ra jamé jaha ra chaha ra co anto čhjoin tonoha ra, ixin ngajni rrochonda ra ná cosa anto jian, ixin cain chojni que sinchehe jamé nganji ra, jamé joinchehe nigoelitoe na xančhen ngain cain profeta que jói are saho.

24 'Pero anto tangui tsonha jaha ra xó chonda ra tsje, ixin jaha ra ochaha ra nttihi ngataha nontte.

25 'Anto tangui tsonha jaha ra xó jai chonda ra tsje para sintte ra, ixin después jaha ra senhe ra jintta.

'Anto tangui tsonha jaha ra xo tjano ra jai, ixin después jaha ra rrotsjanga ra de joachjaon.

²⁶ 'Anto tangui tsonha jaha ra are caín chojni rronichja na jian de ixin jaha ra ixin jañá cain nigoelitoe na xančhjen vanchesayehe na tti chojni que jaha ndoa profeté Dios.

Jesús ndačho chonda que sinao ni chojni que ningaconhe ni

(Mt. 5.38-48; 7.12)

²⁷ 'Nganji ra xo tettinna ra janha rrondattjo ra: Rinao ra tti chojni que ningaconha ra, nchehe ra jian ngain tti chojni que toñao nganji ra,

²⁸ nchetsenhe ra ñao Dios ixin jehe sinchenchaon tti chojni que nichja jianha de ixin jaha ra, co nchetsenhe ra ñao Dios para ixin tti chojni que nichja feo nganji ra.

²⁹ Si čhonja chojni rrožanguiha ná manazo ngá con, dittoaxin que rrožanguiha iná manazo. Si čhonja tti santsjaha chamarrá, danjo cai hasta camisá.

³⁰ Co quexeho chojni que sanchiaha ná cosa jaha chjehe; co are santsjaha na cosá, idanchieha na cosa mé iná.

³¹ Nchehe ra ngain chojni inchin jaha ra rinao ra sinchehe jehe na nganji ra.

³² 'Si jaha ra rinao ra jeho tti chojni que rinao jaha ra, ¿quehe jian tenchehe ra? Ixin hasta tti chojni que nchehe jianha, jehe na nchehe na jañá cai.

³³ Co si jeho nchehe ra jian ngain tti chojni que nchehe jian nganji ra, cai ¿quehe jian tenchehe ra? Ixin cai tti chojni que nchehe jianha nchehe na jamé cai.

³⁴ O si nhecjen ra tomi jeho tti chojni que nchao tsjengaha ra hna, cai jeha jian tenchehe ra, ixin hasta tti chojni que nchehe jianha nhecjen tomi ngain icha chojni que nchehe jianha, ixin chonda na seguro que tsjenguehe chó na hna.

³⁵ Jaha ra chonda ra que rinao ra chojni que ningaonha ra, co chonda ra que sinchehe ra jian ngain na, co nhecjen ra na cosá ra, co xaxaonha ra ixin sacha ra çhonja cosa. Co jamé ngajni ntiiha rroxengaxin ra hna icha jian, co jaha ra sintte ra xenhe Dios que ttjen ngajni, ixin Dios jehe cai danjo cain cosa ngain tti chojni jianha co tti ni xonhi tiempo chjé gracias.

³⁶ Ttiaconoehe ra icha chojni, jañá inchin Ndodá na que ttjen ngajni ttiaconoehe Ndo cain chojni.

Ncheha ra juzgado iná chojni
(Mt. 7.1-5)

³⁷ 'Ncheha ra juzgado iná chojni, para que Dios sincheha juzgado nganji ra. Ncheha ra condenado iná chojni para que Dios sinttaha ra condenado jaha ra. Nchetjañehe ra cain chojni, para que jamé Dios sinttatjañaha jaha ra cai.

³⁸ Chjehe ra tti chojni que rrongondehe, co Dios rrochjá ra tti rrongondaha ra. Dios rrochjá ra ngain bolsá ra ná medida jian, que tsonttedo jian, tsontsjenga ra jian co rrocaon jian. Ixin inchin medida que jaha ra dattechoaxin ra, Dios jamé sattechoha ra cai.

³⁹ Jesús ndaço ejemplo jiji ngain na:

—¿Apoco ná tti chejo nchao sicao noxon ntiiha iná tti chejo? Seguro que cayoixin chojni mé sinttjian ngain ná ttoe.

⁴⁰ Ni ná tti jitangui jeha icha nohe que ximaestro, masqui are tsjexin tsangui jehe sehe inchin ximaestro.

⁴¹ ¿Quedonda ttjiho cuidado de ixin tti anto nchín caxineno que jingangui jmacon iná chojni co ttjioha cuidado de ixin tti nttá jie que jingangui jmacon jaha?

⁴² Si jaha diconha tti nttá jie que jingangui jmacon, ¿quedonda ndačo ngain iná chojni ixin jehe sittoexin para que jaha santsjenguihi caxineno nchín que jingangui jmacon jehe? ¡Jaha ná chojni jianha que ncheyaxon! Saho dantsjengui tti nttá jie que jingangui jmacon para que jamé nchao sicon jian para santsjengui caxineno nchín que jingangui jmacon iná chojni.

Nttattochjoin datsoan ni ntta de ixin ttochjoín ntta

(Mt. 7.17-20; 12.33-35)

⁴³ Xonhi nttattochjoin jian que sinchechjian ntta ttochjoin que xonhi xé, ni nttatochjoin que xonhi xé sinchechjian ntta ttochjoin jian.

⁴⁴ Naná nttattochjoin datsoan ni ntta de ixin ttochjoin que nchechjian ntta. Nttanchaha nchechjianha ntta higo, ni canchaha nchechjianha ca uva.

⁴⁵ Tti chojni jian, jehe nichja cosa jian ixin tti jian jí ngain ansén; co tti chojni jianha, jehe nichja cosa jianha ixin tti jianha jí ngain ansén. Mexinxin cain tti jí ngain ansén chojni, mé tti nichja rroha.

Tti nchia que jingattjen ngataha ttjao co tti nchia que jingattjen ngataha jinchexonda

(Mt. 7.24-27)

⁴⁶ 'Jaha ra, ¿quedonda ndačo ra ixin janha tte-tonha nganji ra co ncheha ra tti janha ndattjo ra?

⁴⁷ Tti chojni que tsí nganji janha, co jehe na tsinhi na tti rrondattjan na co sitticaon na,

⁴⁸ chojni mé inchin ná xí que ngue anto nihnga para que cjoenga xa basé nchiandoha xa ngataha ná ttjao. Are coyé jinda ngain río, soji vingué nda nchia mé, pero čhoha coingui nchia mé ixin soji jixenga nchia ngataha ttjao.

⁴⁹ Pero tti chojni que ttinhi tti janha ndačhjan co ditticaonha na na, chojni mé inchin tti joinchexhjian nchiandoha ngatacoa jincheřonda ni cjoavaha ttjarioho. Co are coyé jinda ngain río, soji vingué nda nchia mé, co ndacjamangui nchia. Jamé ndaxantte ngoixin nchia mé.

7

Jesús joinchexingamehe ná xinchehe xé ná xicapitán romano

(Mt. 8.5-13)

¹ Are Jesús joexin ndache chojni cain jihi, jehe sacjan para rajna Capernaum.

² Nttiha vehe ná xicapitán romano vechonda xa ná tti nchehe xé xa que jehe xa anto vajinao xa, co jehe tti nchehe řa mé ondajidenhe.

³ Are xicapitán mé coinhi xa de ixin Jesús, jehe xa rroanha xa canxion nijudío que vinttechonda joachaxin ngain ningoe na para joinchetsenhe na ñao Jesús para que jehe rrocji rrojinchexingamehe tti nchehe xé xa mé.

⁴ Cain nimé conchienenhe na ngain Jesús co coex-inhi na anto joinchetsenhe na ñao co vinttendačo na ngain:

—Xicapitán jihi jiquininxin que soixin tsjenguijna xa,

⁵ ixin jehe xa anto rinao na xa ján na žo judío na, co jehe xa mismo cjoenga xa hna para conchjian ná ningona na.

⁶ Cottimeja joicao na Jesús. Pero are ochian joihi na ngain nchiandoha xicapitán mé, jehe xa coetonhe xa canxion xiamigoe xa para joindačo xa ngain Jesús:

—Idoanha molestado soixin, ixin xicapitán ndačo xa que jehe xa jiquininxinha xa para soixin sixinhi nchiandoha xa.

⁷ Mexinxin jehe xa ni joiha xa para joichoanxin xa ngatja nttiha. Jehe xa rinao xa que jecho ttetonha soixin para tti nchehe žé xa orroxingamehe.

⁸ Jehe xa nohe xa jamé ixin jehe xa mismo chonda que ditticaon xa ngain tti icha ttetonha de jehe xa, cai jehe xa chonda xa joachaxin de ttetonha xa ngain cain xisoldadoe xa. Are jehe xa ttetonhe xa ná de jehe xisoldado que tsji xa quexeho parte, jehe xa ttji xa. Co are jehe xa ttetonha xa que tsí xa, jehe xa ttí xa. Co are ttetonhe xinchehe žé xa que sinchehe xa quexeho ža jehe xa nchehe xa ža.

⁹ Are Jesús coinhi jihi, jehe goan admirado de ixin jehe xa co ngaria tsjehe ngain chojni que terroé, co ndačo ngain na:

—Ndoa, ni de ngacjan cainxin chojni judío viconha janha ná chojni que anto ditticaon inchin xicapitán jihi.

10 Are cain xiamigoe xicapitán mé cjan xa nchia, vintteguicon xa jehe tti nchehe xa mé odixingamehe; ixonhi chin jichonda.

Jesús joinchexechon xanxichjenhe ná nchiganha

11 Después de cain jihi, Jesús sacjoi para ngain ná rajna dinhi Naín conixin chojni que vacao co tsje icha chojni cai.

12 Are ojoiji na chian ngain rajna mé, jehe vicon que tedicjavá na ná chojni ndadiguenhe que mé tti nacoaxinxon xanxichjenhe naníta janné xan, co jehe naníta mé, ganha. Anto tsje chojni de ngain rajna mé tedicao jehe naníta para tedicjavá na xenhe.

13 Are Jesús vicon naníta, jehe coiaconoehe co ndačo ngain:

—Itsjangaha.

14 Cottimeja Jesús conchienne co cante cajón, co tti chojni que tedicao cajón tavinttengattjen na. Co Jesús ndache tti ndadiguenhe:

—Janha rrondattjo jaha: ¡Dingattjen!

15 Cottimeja jehe tti ndadiguenhe xendoa vengá chinttihi co ocoexinhi nichja, co jamé Jesús joanjo xanxí mé ngain janné xan.

16 Are chojni vicon na jihi, cainxin na anto xaon na co coexinhi na joinchecoanxinhi na Dios co ndačo na:

—Ná profeta anto importante ngattoxon con Dios cononxin gayá na.

Cai ndačo na:

—Dios joí para joicjenguijna chojni jehe.

17 Co ngoixin regioen Judea co icha región que te ngandanji regioen Judea conohe chojni ixin quehe joinchehe Jesús.

Tti chojni que rroanha Juan
(Mt. 11.2-19)

¹⁸ Juan, tti vancheguitte chojni, conohe cain jihi ixin chojni que vacao coequín na jehe. Cottimeja jehe vayé yó de jehe na,

¹⁹ co jehe rroanha na para ngain Jesús para joiganchianguihi na Jesús si ndoa jehe tti Cristo tti chonda que tsí, o ni chonda que rrochonhe na iná.

²⁰ Tti chojni que rroanha Juan vintteconchienne na ngain Jesús, co ndačo na ngain:

—Juan coetonna na para joiganchiangui na nganji jaha si ndoa jaha tti Cristo tti chonda que tsí, o ni řa chonda na que rrochoan na iná.

²¹ Ngain rato que jehe na joihi na, Jesús joinchexingamehe anto tsje chojni que vinttechonda ojejé chin, co tti vinttechonda espíritu jianha, co cai chjé jmacon tsje chojni chejo.

²² Mexinxin Jesús ndačo ngain chojni que rroanha Juan:

—Ttji ra co dindache ra Juan tti jaha ra vicon ra co tti jaha ra coinhi ra. Ttequinhi ra ixin tti chojni chejo, jai onchao dicon na, co tti chojni rrengo, jai onchao čhi na, co tti chojni que vinttechonda chin lepra, jai iřonhi chin mé techonda na, co tti chojni que vaquina, jai onchao ttinhi na, co tti chojni que ondavenhe, jai xechon na, co tti chojni que inchin ndadiguenhe de ngain espiritue, jai ocoinhi na ixin Dios rrochjé na iná vida naroaxin.

²³ Co anto čhjoin para ixin tti chojni que sitti-caon nganji na janha cain tiempo.

24 Are savinttecji tti chojni que rroanha Juan, Jesús coexinhi ndache cain chojni que vittohe ntiha de ixin Juan, co ndačo:

—Are cjoí ra ngagaha jna tti xonhi chojni te para joitsjehe ra Juan, ¿quehe xaxaon ra rroguicon ra ngain jehe? ¿Axaxaon ra ixin joarrixaoen seguroha inchin ná nttaxiji que nchequingui chintto?

25 Si jeha jamé, ¿quehe xaxaon ra rroguicon ra? ¿Aná xí que jingá lontto anto rentte? ¡Nahi, jeha jamé! Jaha ra chonxin ra ixin tti chojni que tengá lontto rentte, mé te ngain nchiandoha rey, chojni mé teha ngagaha jna.

26 Mexinxin ¿quehe tipo de chojni xaxaon ra rroguicon ra? ¿Ani ná profeta de Dios? ¡ján ndoa, co xí mé icha rentte que ná profeta!

27 Juan, mé tti jindačoxin ngain tti jitaxin Palabré Dios:

Icha saho que jaha tsji, janha rrorroanha ná tti sicao joajnana,

para que jehe mé sinchechjian nttiha para ixin jaha.

28 Janha rrindattjo ra que de cainxin chojni xonhi iná profeta icha importante joí que jeha Juan tti ncheguite chojni; pero masqui jamé, tti chojni que icha importanteha ngain tti parte que ttonha Dios ngain ansén chojni, mé tti icha importante que Juan.

29 Are coinhi na jihi, cain chojni co cain xicobrador de impuesto que joiguite ngain Juan joatsoan na que Dios nchehe cain cosa inchin jiquininxin.

³⁰ Pero xifariseo co ximaestro ley que čho ha xa para que Juan rrojincheguitte xa, joınaoha xa tti jian que ndačo Dios rrojinchehe ngain xa.

³¹ Co Jesús ndačo:

—¿Quehe sinttacinixin chojni de ngain tiempo jiji? ¿Quežén te joarrixaoen na?

³² Joarrixaoen na te inchin joarrixaoen xan-nchinnchinchjan que dintte xan tsontaon xan ngain ndásin, co toyaotte xan icha xan amigoe xan co ndačo xan: “Janha na jointtachjian na són conixin ná nttaxo pero jaha ra tteha ra, mexinxin janha na tsje na canto que ttiaho joachjaon pero jaha ra tsjangaha ra.”

³³ Ixin Juan, tti ncheguitte chojni joí, co jehe jineha tsje ni diha vino, co jaha ra ndačo ra ixin jehe chonda ná espíritu jianha.

³⁴ Cottimeja joihi janha, tti Xí que joixin de ngaini, que jine co dihi vino, pero jaha ra ndačo ra ixin janha anto jine co anto dihi hasta coan na co ixin janha amigoe cain chojni que nchehe jianha, co cain xicobrador de impuesto.

³⁵ Pero tti nohe Dios, mé jian ixin chojni que Dios nchequinixin nchehe na jian.

Are Jesús ngain nchiandoha Simón, tti cjoí ná xifariseo

³⁶ Ná de xifariseo ndache xa Jesús ixin joijine ngain nchiandoha xa co jehe Jesús cjoí ngain nchiandoha xa, co are onttiha, jehe vehe ngain mesa.

³⁷ Co nttiha ngain rajna mé vehe ná nčhí que vanchehe nča jianha; co are conohe nča ixin Jesús cjoí joijine ngain nchiandoha xifariseo mé,

jehe n̄cha cjoí n̄cha conixin ná xoxao de marmol jiche de aceite xajni.

³⁸ Co joí n̄cha toenxin rotté Jesús, vettoxin ntajochjihi n̄cha co tsjanga n̄cha. Mexinxin vinttjitte ndacon n̄cha rotté Jesús. Cottimeja jehe n̄cha joinchexemanxin n̄cha rotté Jesús conixin xajá n̄cha co coetoxin n̄cha rotté Jesús. Cottimeja coinga n̄cha aceite xajni rotté Jesús.

³⁹ Are xifariseo mé vicon xa cain jihi, jehe xa xaxaon xa: “Si xí jihi rrocji xa ná profeta ndoa, jehe xa rroconohe xa quensen jicatte xa, co quehe clase de n̄chí yá; rroconohe xa ixin n̄chí yá anto tsje cosa jianha nchehe n̄cha.”

⁴⁰ Cottimeja Jesús ndacho ngain xifariseo mé:

—Simón, janha chonda ná cosa que rrondattjo jaha.

Xifariseo mé ndacho xa:

—Ndachjenji na, Maestro.

⁴¹ Jesús ndacho:

—Vehe yó tti xí vintteca tomi ngain ná tti vacjadoa tomi. Ná de tti xí mé veca naho ciento de tomi, co tti iná veca cincuenta.

⁴² Pero ixin xonhi tomi vinttechonda cayoi tti xí mé, jehe tti cjadoa tomi, joinchetjañehe cayoi tti xí mé tti tomi que jehe vintteca. Jai ndachjenji na jaha, ¿quexehe de cayoi tti xí mé icha sinao jehe tti vanjo tomi mé?

⁴³ Simón mé ndacho ngain Jesús:

—Janha xaxanho que tti xí que vitjañehe icha tsje tomi.

Jesús ndacho:

—Ndoa tti ndacho.

44 Cottimeja Jesús tsjehe ngain nchí mé co ndačo ngain Simón:

—¿Adicon jaha nchí jihi? Janha joixinhi nchiandoi, co jaha chjanaha jinda para cjoenxin rottena; pero nchí jihi cjoenna ncha rottena conixin ndacon ncha, co joinchexemanxin ncha conixin xajá ncha.

45 Jaha coetoxinha na de joajna, pero jehe ncha, desde que janha joixinhi nchiandoi coexinhí ncha coetoxin ncha rottena hasta jaxon.

46 Jaha coingaha na aceite ngataha jana; pero jehe ncha cointjtite ncha aceite xajni ngain rottena.

47 Mexinxin janha ndattjo que ixin jehe ncha anto rinao na ncha janha, co mé xago que tti anto tsje jianha que jehe ncha joinchehe ncha jai ovitjañehe ncha; pero tti chojni que tsjeha jianha vitjañehe, cai tjago que antoha rinao na janha.

48 Cottimeja ndačo Jesús ngain tti nchí mé:

—Cain tti jianha que joinchehe ovitjañaha.

49 Co cain chojni que te ngain mesa nttiha conixin Jesús coexinhí na ndache chó na:

—¿Quensen xí jihi, que hasta nchao nchetjañehe xa tti jianha que nchehe chojni?

50 Pero Jesús ndačo ngain tti nchí:

—Jaha ochonda vida naroxin ixin vitticaon na janha; mexinxin sattji contenta.

8

Cain nchí que vacjenguijna Jesús

1 Después de cain jihi, Jesús vangaria ngain tsje rajna conixin tsje rajnanchjan para joindache

chojni de ixin Dios co ixin Dios otsetonha ngain ansén na. Co vacao tti tteyó nirepresentanté jehe.

² Co nttiha vacao canxion nčí cai que jehe venguixin espíritu jianha de ngaxinhi cuerpoe ncha co vinttjian cain chin que vinttechonda cada ncha. Co de cain nčí mé, nttiha vehe María Magdalena tti vachjexin yáto espíritu jianha de ngain cuerpoe.

³ Co cai nttiha vehe Juana, nchičihi ná tattíta vinhi Chuza tti vaquetonha ngain nchiandoha Herodes; co cai nttiha vehe Susana co icha nčí que vacjenguijna ncha Jesús conixin tti jehe ncha vachonda ncha, jehe conixin tti chojni que vacao.

*Ejemploe tti joiquenga trigo ngataon jngui
(Mt. 13.1-9; Mr. 4.1-9)*

⁴ Tsje chojni de ngain tsje rajna cjoí na para joitsjehe na Jesús, co are oxatte tsje chojni ngain Jesús, jehe nichjé na de ixin ejemplo; co ndačo ngain na:

⁵ —Ná xí cjoí xa joiquenga xa trigo ngataon jngui. Are jehe xa coexinhi xa cjoa xa trigo ngataon jngui, canxion noanchjan de trigo vinttji ngá nttiha, co are vatto chojni, ngachje na trigo mé. Co cai conttoa vittja va trigo mé co ndajoine va noanchjan mé.

⁶ Co ittoha noanchjan de trigo vinttji ngataha tti jí ttjao, co are trigo mé činhi, anto daca ndaxema ixin xonhi tjao vechonda ttjao.

⁷ Co ittoha noanchjan de trigo vinttji ngacjan canchaha co canchaha činhi ca co icha daca vangui ca; icoančjandaha ca trigo vangui trigo.

⁸ Pero icha noanchjan de trigo vinttji noa tti jí jian jinche. Co are vangui trigo mé joanjo

jian cosecha, ixin de ná noanchjan de trigo que vetsinga joinchechjian hasta cien noanchjan.

Are Jesús jindačo cain jihi, jehe nichja soji ngain na, co ndačo:

—Si jaha ra ttinxin ra, ttinhi ra jian.

*Quedonda Jesús joinchegonda tsje ejemplo
(Mt. 13.10-17; Mr. 4.10-12)*

⁹ Cottimeja tti chojni que vacao Jesús joanchian-guihi na Jesús ixin quehe rročo ejemplo jihi.

¹⁰ Jehe ndačo ngain na:

—Jaha ra, Dios nttanoha ra tti jima de ixin quexén Dios tsetonha ngain ansén chojni; pero are janha nichjá icha chojni, nichjá na de ixin ejemplo para que are sicon na, sittohe na inchin rroguiconha na, co are tsinhi na, jehe na tsinxinha na.

*Jesús ndačo quehe rročo ejemploe tti
joiquenga trigo
(Mt. 13.18-23; Mr. 4.13-20)*

¹¹ Jihi tti rročo ejemploe tti joiquenga trigo: Tti trigo rročo joajné Dios:

¹² co tti trigo que vinttji ngá nttiha, mé rročo tti chojni que ttinhi joajné Dios, pero ttí inchínji co ndanchetjánji na de ngain ansén na tti joajna que coinhi na para que sitticaonha na co rrochondaha na iná vida naroaxin.

¹³ Co tti trigo que vinttji ngataha tti jí ttjao, mé rročo tti chojni que are ttinhi na joajné Dios, jehe na anto čhjoin tonohé na dayé na joajna mé, pero ixin palabra mé techondaha na tsje noehé ngain ansén na, ditticaon na jehó nchion, co are Dios

daquehe prueba ngain na, jehe na incheha na tti ttetonha Dios.

¹⁴ Co tti trigo que vinttji ngagaha canchaha, mé rrocho tti chojni que ttinhi na joajné Dios, pero jehe na ncheha na caso. Jehe na nchehe na sigue inchin te na ngain vidé na, co icha xaxaon na ngain problemé na, co ngain cosé na, co ngain cosa chjoin que jí nttihi ngataha nontte. Cain cosa jihí tančhjandaha na para ditticaon na joajné Dios, co jamé chojni mé idanguiha na de ngain espiritue na.

¹⁵ Pero tti trigo que vinttji ngain jinche jian, mé tti chojni jian de ngain ansén, co anto rinao na ttinhi na co nchehe na caso joajné Dios. Co jamé ditticaon na cainxin tiempo, co jehe na anto dangui na de ngain espiritue na ixin ttenchjinha na palabré Dios.

Ejemplo lámpara
(Mr. 4.21-25)

¹⁶ Xonhi chojni sinchegacaon ná lámpara cottimeja jehe tsjanotaon lámpara o rroxanguí lámpara ngangui saoen, sino que chojni mé chonda que saquehe lámpara ngataha ná cosa noi para que cain chojni que sixinhi nchia mé nchao sicon na joadingasán.

¹⁷ Xonhi cosa jima que tsononxinha, co xonhi cosa jima que texaxaon ni ngain ansén ni que chojni tsonoeha; cain cosa chonda que tsononxin cosa.

¹⁸ Mexinxin jaha ra ttinhi ra jian; ixin tti chojni que chonda, Dios tsjenguijna para que rrochonda icha, pero tti chojni que xonhi chonda, Dios santsjehe hasta tti jehe xaxaon que ochonda.

Janné Jesús co xanchó
(Mt. 12.46-50; Mr. 3.31-35)

¹⁹ Cottimeja janné Jesús conixin canxion xanchó Jesús joihi na tti jí Jesús, pero čho ha conchienne na hasta tti ngaca Jesús ixin anto tsje chojni te nttiha.

²⁰ Cottimeja ná chojni viquetonhe Jesús:

—Janná conixin xanchó nttimé ndoja te na, co rinao na rronichjaha na jaha.

²¹ Pero Jesús ndačo:

—Cain tti chojni que ttinhi quehe ndačo joajné Dios co nchehe na inchin ndačo joajna jihi, cain chojni mé inchin jannana co xanchian.

Jesús tajoaquehe čhintto conixin olé lago
(Mt. 8.23-27; Mr. 4.35-41)

²² Ná nchanho Jesús conixin tti chojni que vacao joixinhi na ngaxinhi ná barco, co nttiha jehe ndačo ngain na:

—Sachjin na toenxin lago jihi.

Co sajcoi na.

²³ Co are jehe na tatetaonhe na jinda, Jesús tavejoa ngaxinhi barco. Co are de repente cjoa ná čhintto anto soji, que hasta ocoexinhi viquia jinda ngá barco, co ojoinao sarroxincanjingui barco jinda.

²⁴ Cottimeja vinttecji tti chojni que vacao Jesús para joinchexingamehe na Jesús, co ndačo na ngain:

—¡Maestro! ¡Maestro! ¡Ndatexincanjingui na jinda!

Cottimeja vingattjen Jesús co jehe coetonhe čhintto co olé lago que tasehe, co cayoi cosa mé jaicoa tavehe; icjoaha čhintto co icjoinha olé lago.

²⁵ Cottimeja jehe ndačo ngain tti chojni que vacao:

—¿Quedonda jaha ra chondaha ra confianza nganji na?

Pero jehe na anto vintteñaon na, co vinttegoan na admirado, co vintteganchianguihi chó na, naná na, co ndačo na:

—¿Quensen xí jihi, que jehe xa ttetonhe xa čhintto co jinda, co tonhe inchin jehe xa ndačo xa?

Tti xí de ngain nontte Gadara que vechonda espíritu jianha

(Mt. 8.28-34; Mr. 5.1-20)

²⁶ Cottimeja joihi na ngain nontte Gadara que jí toenixin lago mé, čhica Galilea.

²⁷ Are Jesús vanianxin de barco mé conchienne ngain jehe ná xí de ngain ná rajna de ngain nontte Gadara. Anto sé xí jihi chonda xa tsje espíritu jianha. xonhi lontto vengá xa, ni jeha ngain ná nchia vehe xa, sino que jehe xa vehe xa nganguinihi tti vacjavá chó chojni que ndavaguenhe.

²⁸ Are jehe xí mé vicon xa Jesús, jehe xa vettoxin nntajochjihhi xa ngain Jesús co espíritu jianha joinchecoyao xa co joinchenichja xa co ndačo xa:

—¿Quedonda dixintte nganji na, jaha Jesús, Xenhe Dios que ttjen ngajni? Nttatsanha ñao que ncheguetanha na tangui janha.

²⁹ Jehe xí mé ndačo xa jañá ixin Jesús ojittetonhe espíritu jianha que sačhjexin de ngain xí mé. Otsje nntiha espíritu jianha tse xa. Co masqui chojni vaquiixin na xa conixin cadena de rá xa co de rotté xa para vaguečhoa xa; pero are espíritu jianha vatse xa, jehe xa vacončhintaon xa cadena

co espíritu jianha savanchequinga xa para ngá tsaga o ngagaha jna tti xonhi chojni te.

³⁰ Jesús joanchianguihi xí mé:

—¿Quexén dinhi jaha?

Co jehe xa ndačo xa:

—Janha dinhi na Legión.

Jehe xa ndačo xa jañá ixin anto tsje espíritu jianha vehe ngaxinhi cuerpoe xa.

³¹ Co cain espíritu mé ndache Jesús ixin rinaoha tsji infierno co joinchetsenhe ñao Jesús que jehe rrorroanha para ngain infierno.

³² Co ixin nttiha chian tene tsje cocochi ngain ná jnanchjan, cain espíritu jianha mé joinchetsenhe ñao Jesús ixin jehe tsančhanda cain espíritu mé sixinhi ngaxinhi cain cocochi mé. Co Jesús joanjo joachaxin.

³³ Cottimeja cain espíritu jianha mé vačhjexin de ngaxinhi cuerpoe xí jihi co savintteguixinhi ngaxinhi cocochi. Co cain cocochi jihi savinttecant-tjenhngui va jinda, co nttiha ndavintteguenxin cainxin va ixin vinttecjonhe va jinda.

³⁴ Cain tti chojni que vaquingaria cocochi, are jehe na vicon na cocochi tecjonhe va jinda, jehe na anto xäon na co coinga na joindache na chojni ngain rajna co cai nite nchiandoha ngataon jngui.

³⁵ Co cain chojni mé cjoí na joitsjehe na quehe conhe nttiha. Co are joiji na tti jí Jesús, vicon na nttiha tají tti xí que vačhjexin cain espíritu jianha de ngaxinhi cuerpoe; tají xa čhica rotté Jesús, co ojingá xa lonttoe xa, co joarrixäoen xa ondacoa jí; co cain chojni mé vinttexäon na.

³⁶ Co cain chojni que vicon quehe conhe nttiha ndaço na queñén xingamehe tti xí que vechonda espíritu jianha.

³⁷ Mexinxin cainxin chojni de ngain regioen Gadara joinchetsenhe na ñao Jesús ixin jehe sat-sjixin de nttiha, ixin jehe na anto vintteñaon na. Mexinxin Jesús coani barco co sacjoi.

³⁸ Tti xí que vaçhjexin cain espíritu jianha de ngain cuerpoe joinchetsenhe xa ñao Jesús para que Jesús rroganjo joachaxin sarrojicaó xa ngain jehe, pero Jesús coetonhe xí mé que sittohe xa, co ndaço ngain xa:

³⁹ —Cjan para nchiandoi, co ttequinhi cain chojni cain tti joinchehe Dios nganji.

Co tti xí mé sacjoi co coequín cain chojni ngoixin rajna tti joinchehe Jesús ngain jehe.

Are xingamehe xannchichjenhe Jairo, conixin ná nchí que catte lonttoe Jesús

(Mt. 9.18-26; Mr. 5.21-43)

⁴⁰ Are Jesús cjan para toenxin lago mé, cain chojni que te nttiha anto ché na ixin joiji Jesús, ixin cainxin na techonhe na Jesús.

⁴¹ Cottimeja joí ná xí que vinhi Jairo, xí mé vaquetonha xa ngain nihngo nttiha. Xí jihi vettoxin nttajochjihi xa ngain Jesús co joinchetsenhe xa ñao ixin jehe rrocji nchiandoha xa

⁴² ixin jehe xí mé vechonda xa nacoaxinxon xannchichjenhe xa que vechonda xan tteyó nano. Co are mé ondajindenhe xannchichjenhe xa. Are Jesús sacjoi nchiandoha Jairo conixin jehe Jairo, rroé anto tsje chojni que hasta anto conttedo na ngaca Jesús.

43 Co de ngacjén cain chojni mé nttiha conchienne ná nchí que venihi ncha tteyó nano. Jehé ncha veguenguihi ncha jni, co jehé nchí mé ojoehe ncha joinchexinhi ncha de ngain xincheñoan cainxin tti vechonda ncha, pero ni ná xincheñoan čoha joinchexingameha xa ncha.

44 Jehé nchí mé conchienne ncha ngaca Jesús notonxin co catte ncha rioho ngandehe lonttoe Jesús que jitsá. Co rato mé tavehe tti jni que venguihi ncha.

45 Cottimeja Jesús joanchiangui co ndačo:

—¿Quensen catte na?

Pero ixin cain chojni ndačo na xonhi quensen, mexinxin Pedro conixin cain xicompañeroe ndačo xa:

—Maestro, cain chojni tonttedo na ngaca soixin, co tonxinca na de ná lado co iná lado, mexinxin ¿quedonda soixin xa danchiangui quensen catte?

46 Pero Jesús ndačo:

—Jí ná chojni que catte na, ixin janha conona que jointtaxingamá ná chojni conixin joachaxin que janha chonda.

47 Nchí mé are conohe ncha ixin conohe Jesús, jehé ncha conchienne ncha jixanga ncha de joaxaon, co vettoxin nttajochjihi ncha ngaca rotté Jesús. Co ngattoxon con cain chojni nttiha ndačo ncha ngain Jesús ixin quedonda jehé ncha catte ncha co quexen ngain rato mé ndacoñoenhe ncha.

48 Cottimeja Jesús ndačo ngain ncha:

—Jaha coñoanha ixin vitticaon na. Jai sattji contenta.

⁴⁹ ǵa jinichja Jesús yá, are ojoí ná chojni de ngain nchiandoha Jairo, tti vaquetonha ngain nihngo nttiha; co ndačo chojni mé ngain Jairo:

—Xannčhichjanha ondavene xan; inchemolestaha ximaestro.

⁵⁰ Pero are Jesús coinhi yá, jehe ndačo ngain Jairo:

—Jaha ǵaonha; jeho ditticaon na janha, co xanha rroxingamehe xan.

⁵¹ Are joiji na nchiandoha Jairo, Jesús coančhjangaha vixinhi ni ná chojni, jeho jehe, Pedro, Jacobo, Juan, co jehe ndodé xannčhichjan conixin janné xan.

⁵² Cain chojni que te nttiha tetsjanga na co tetaxin na xan joachjaon. Pero Jesús ndačo ngain na:

—Tsjangaha ra; xannčhichjan ndadiguenha xan; sino que tajjoa xan.

⁵³ Pero jehe na cjoanoa na Jesús ixin ndačo jañá, ixin cain na venohe na que xannčhichjan ondavenhe xan.

⁵⁴ Cottimeja Jesús tsehe rachjenhe xannčhichjan co ndačo sén ngain xan:

—Jaha xannčhichjan, dingattjen.

⁵⁵ Co jehe xannčhichjan xechon xan iná, co ngain rato mé jehe xan vingattjen xan. Co Jesús coetonha rrochjé na xan sine xan.

⁵⁶ Nindoha xannčhichjan anto vinttegoan na admirado, pero Jesús coetonhe na ixin ǵonhi chojni rrondate na tti joinchehe jehe.

9

*Are Jesús rroanha tti tteyó chojni que vacao
(Mt. 10.5-15; Mr. 6.7-13)*

¹ Jesús nichjé tti tteyó chojni que vacao, co jehe joanjo joachaxin ngain na para que jehe na nchao senguixin na cain clase de espíritu jianha de ngax-inhi cuerpoe chojni, co para sinchexingamehe na chojni nihi de ixin chin que chonda.

² Jehe rroanha na para joindache na chojni ixin Dios osiquetonha ngain ansén na, co para joinchexingamehe na chojni nihi.

³ Jehe ndačo ngain na:

—Xonhi ttjiho ra de tti sondaha ra ngatja nttiha, ni nttacotto, ni bolsa ni niottja, ni tomi. Ttjiho ra jeho nacoa camisa que tengaha ra co ttjioha ra yó camisa.

⁴ Cada rajna que saso ra dittoha ra jeho nacoa nchia hasta que satsjixin ra de ngain rajna mé.

⁵ Si čhonja rajna sinaoha na tsinhi na tti jian joajna que jaha ra tsjiho ra jaha ra sattjixin ra de nttiha, co tontsjenga ra jinche que yá rottea ra, mé ná señal que vitticaonha na jaha ra.

⁶ Jamé sacjoi cain chojni mé, cjoi na ná co ná rajna, joindache na chojni tti jian joajna co joinchexingamehe na chojni nihi.

*Are ndavenhe Juan, tti vancheguitte chojni
(Mt. 14.1-12; Mr. 6.14-29)*

⁷ Are xigobernador Herodes conohe xa cain tti jian que vanchehe Jesús, jehe xa anto xaon xa, ni inoeha xa quehe xaxaon xa ixin canxion chojni ndačo na que mé Juan, tti vancheguitte chojni, co jai xechon.

⁸ Icanxin na vandačo na ixin Jesús, jehe tti profeta Elías que cononxin iná, co icanxin na vandačo na que ixin Jesús ná de tti profeta que joí are icha saho co jai xechon.

⁹ Pero Herodes ndačo:

—Janha mismo coetonha čhinji já Juan, tti vancheguitte chojni. Mexinxin ¿quensen xí jihi que chojni ttequin na anto tsje cosa jian que jehe xa rridinchehe xa?

Co Herodes anto cjoé quežén para que jehe rroguicon Jesús.

*Are Jesús joanjo joine naho mil xí
(Mt. 14.13-21; Mr. 6.30-44; Jn. 6.1-14)*

¹⁰ Are tti tteyó chojni que rroanha Jesús cjanxin na de tti joindačo na tti jian joajna, jehe na ndačo na ngain Jesús tti jehe na joinchehe na. Cottimeja Jesús sajoicao na ngain ná lugar tti xonhi chojni te, chian ngain rajna Betsaida.

¹¹ Pero are conohe icha chojni ixin ttinó sacjoi Jesús, jehe na rroé na co jehe nichjé cain na, co ndačo ngain na ixin quežén siquetonha Dios ngain ansén na, co joinchexingamehe cain ninihi.

¹² Co are ondacotsocjin, conchienne tti tteyó chojni que vacao Jesús, co ndačo na ngain:

—Ndache cain chojni que satsji na, para sas-inchejogaha na co siquehna na tti sine na ngain rajna o nchia que te chian, ixin nttihi tti te na xonhi jí.

¹³ Pero Jesús ndačo ngain na:

—Jaha ra danjo ra tti sine na.

Jehe na vinttendačo na:

—Janha na xonhi chonda na, jeho naho niottja co yó copescado, o çapoco janha na siquehna na tti sine cainxin chojni jihi?

¹⁴ Ixin cain chojni mé, jeho xí inchin naho mil xa. Pero Jesús ndaço ngain tti chojni que vacao:

—Ndache ra na tasintte na de cincuenta na cada grupochjan.

¹⁵ Co jamé joinchehe na; tavintte na cainxin na.

¹⁶ Cottimeja Jesús coá tti naho niottja mé co tti yó copescado. Co jehe tsjehe para ngajni, joanjo gracias ngain Dios de ixin niottja mé conixin copescado, co después de váña niottja, jehe joanjo nio ngain tti chojni que vacao, para que jehe na conchjejehe na cainxin chojni mé jehe niottja conixin copescado.

¹⁷ Cainxin chojni mé joine na co cojehe na jian, co después xa joinchecaon na tteyó ntaça de ixin tti niottja rioho que xexin joine na.

*Pedro ndaço que ixin Jesús, mé tti Cristo
(Mt. 16.13-19; Mr. 8.27-29)*

¹⁸ Ná nchanho are Jesús jincheoanxinhi Dios, co jeho tti chojni que vacao nttiha tate na ngain, jehe joanchiangui ngain na co ndaço:

—¿Quehe ndaço chojni ixin quensen na janha?

¹⁹ Jehe na vinttendaço na:

—Canxion na ndaço na que ixin soixin Juan, tti vancheguitte chojni; icanxin na ndaço na que ixin soixin tti profeta Elías; co icanxin na ndaço na que ixin soixin ná de tti profeta que vacji are saho.

²⁰ Cottimeja Jesús joanchiangui ngain jehe na, co ndaço:

—Co jaha ra ¿quehe ndačo ra ixin quensen na janha?

Co Pedro ndačo ngain Jesús:

—Soixin tti Cristo que joixin de ngain Dios.

Are Jesús ndačo ixin jehe ndasenhe

(Mt. 16.20-28; Mr. 8.30—9.1)

²¹ Pero Jesús anto coetonhe na ixin xonhi chojni rrondate na.

²² Cottimeja Jesús ndačo ngain tti chojni que vacao:

—Janha, tti Xí que joixin de ngajni, chonda que anto tsje cosa tangui tsonna, co cain xittetonha ngain nihngo, co cain xidána que ttetonha ngain icha xidána, conixin cain ximaestroe ley Israel, sinaoha na xa. Co nasoenxon na xa, pero ngain nchanho nixin janha rroxechon na.

²³ Después jehe ndačo ngain cain chojni que te nttiha:

—Si çhonja chojni rinao sitticaon na janha, pero chonda que rrotjañehe tti jehe icha rinao para sitticaon na janha cainxin nchanho, masqui tangui tsonhe co hasta puede nasenxon de ixin causananxin janha.

²⁴ Ixin tti chojni que rinao xonhi tsonhe vidé, mé ndasinchetján vidé; pero tti chojni que sinchetján vidé de ixin causananxin janha, chojni mé rrochonda iná vida nroaxin.

²⁵ Ixin xonhi xé que ná chojni sachá cainxin cosa que jí ngain mundo jiji co ndasitján jehe mismo.

²⁶ Ixin tti chojni que tosoé de ixin janha co de ixin palabrana, cai janha, tti Xí que joixin de ngajni, tsosoahna de ixin jehe chojni mé are janha sihi inchin ná Rey conixin cain gloria que chonda

Ndodana co que chonda cain ángel que te ngain Ndo.

²⁷ Atto seguro tti rrindattjo ra, que çhonja de jaha ra xo te ra nttihi jai, xa senha ra hasta que siconja ra que Dios siquetonha ngain ansén çhoni.

*Are vicon na Jesús anto ojé
(Mt. 17.1-8; Mr. 9.2-8)*

²⁸ Inchin jni nchanho después de Jesús ndaço cain jihi, jehe coani ná jna para joinchecoanxinhi Dios co joicao Pedro, Jacobo co Juan.

²⁹ Co are Jesús jincheoanxinhi Dios, ngá con Jesús ndavitoxinhi co lonttoe ndacjan lontto anto roa co hasta jidaquima lontto.

³⁰ Cottimeja cononxin yó xí que tatetjao xa Jesús, co cayoi xí mé, ná Moisés co iná Elías.

³¹ Co ngoixin ngandanji na vehe ná joadingasán anto çhjoin. Co çjoao na ixin queçén ndasenhe Jesús ngain Jerusalén, co ixin anto tangui ndasenhe.

³² Masqui Pedro co tti cayoi xicompañeroe anto çhjé na cottaçhin, pero jehe na tavinttetsjehe na co vicon na gloria que chonda Jesús, co vicon na tti yó xí canxin que joí ngain Jesús.

³³ Are cayoi xí mé saconcjin xa de ngain Jesús, cottimeja Pedro ndaço ngain Jesús:

—Maestro, atto nchao ixin te na janha na nttihi, janha na sinttachjian na ní nchiachjan; ná para ixin soixin, ná para ixin Moisés, co iná nchiachjan para ixin Elías.

Pero Pedro noeha quehe ndaço ngain rato mé.

³⁴ Co Pedro xa jinichja jañá are joí ná ttjoi ngain na co jehe na ndavittohe na ngacjan ttjoi mé. Pedro co cayoi xicompañeroe vintteñaon ixin ndavittohe na ngacjan ttjoi mé.

³⁵ Cottimeja de ngacjan ttjoi mé coinxin na tté Dios que ndačo:

—Yá tti Xanhna que anto rinaho. Ditticaon ra tti rronhattjo ra Xan.

³⁶ Después que nichja Dios jañá, vicon na que Jesús jecho tají nttiha. Jehe na vinttetencoá na, co xonhi chojni coequín na tti jehe na vicon na.

Jesús joinchexingamehe ná xanxichjan que vechonda espíritu jianha

(Mt. 17.14-21; Mr. 9.14-29)

³⁷ Ndoexin are vanianxin na de ngain jna mé, anto tsje chojni joichoenxin na Jesús ngatja nttiha.

³⁸ De ngayé cain chojni mé, ná xí nichja xa sén co ndačo xa ngain Jesús:

—Maestro, nttatsanha ñao, tsjehe xanxichjanhna ixin jecho xan jihi chonda.

³⁹ Ná espíritu jianha tse xan co nchecoyao xan, co tadetsinga xan xá ndadenhe xan co hasta ttočhjo ttixin rroha xan. Anto ncheguetan xan tangui co xonhi rato tačhanda xan para tadehe xan čhjoin.

⁴⁰ Janha ojointtatsán ñao chojnia que čhjiho ixin rrogantsje na espíritu jianha yá, pero coixinha na.

⁴¹ Jesús ndačo:

—¡Jaha ra xo chojni que ditticaonha ra co jianha ra! ¿Hasta tti quesa chonda que sarihi nganji ra co tsixinna nganji ra? Sicohna xanha nttihi.

⁴² Pero are jehe xanxichjan mé jitonchienhe xan ngain Jesús, espíritu jianha mé joincheguenda xan, co joanca xan ngataha nontte. Pero Jesús joinchesattehe espíritu jianha mé, co jehe joinchexingamehe xanxichjan co joanjo xan ngain ndodé xan.

⁴³ Co cainxin chojni que te nttiha anto vinttegoan na admirado de ixin tti anto tsje joachaxin que chonda Dios.

*Jesús ndačo iná ixin jehe ndasenhe
(Mt. 17.22-23; Mr. 9.30-32)*

Are cain chojni mé xa teřaxaon na de ixin tti jian que joinchehe Jesús, jehe ndačo ngain tti chojni que vacao:

⁴⁴ —Ttinhí ra jian tti janha rrondattjo ra, co tjañaha ra que janha, tti Xí que joixin de ngajni, sinchechienhe na na ngain xí jianha.

⁴⁵ Pero tti chojni que vacao vaquinxinha na tti jehe vandačo ngain na, ixin xa řonhi joachaxin vinttechonda na para coinxin na. Co jehe na řaoncoa na para joanchianguihi na Jesús ixin quehe rročo tti jehe ndačo.

*¿Quensen tti icha importante?
(Mt. 18.1-5; Mr. 9.33-37)*

⁴⁶ Cottimeja tti chojni que vacao Jesús, coexinhi na cjoao chó na ixin quensen de jehe na tti icha importante,

⁴⁷ pero Jesús conohe quehe tendache chó na. Cottimeja jehe cjóa ná xanxichjan co joaquehe xan ngaca jehe,

⁴⁸ co ndačo ngain jehe na:

—Tti chojni que sayé ná chjan inchin xanxichjan jihi conixin nombrena ixin ditticaon na janha; chojni mé sayehna janha cai. Co tti chojni que sayehna janha, cai sayé tti rroanha na janha. ¿Ari-nao ra tsonoha ra quensen icha importante? Tti rrocjan icha importanteha ngayaha ra, mé tti sehe icha importante ngattoxon con na janha.

Tti chojni que ningacoanha na, chojni mé jí nganji na

(Mr. 9.38-40)

⁴⁹ Cottimeja Juan ndačo ngain Jesús:

—Maestro, janha na vicon na ná tti jidengui espíritu jianha conixin joachaxín nombrea; co janha na ndattjan na que isincheha jamé, ixin jehe čjjiha nganji na.

⁵⁰ Pero Jesús ndačo:

—Cayacoenha ra chojni mé, ixin tti chojni que ningacoanha na, jehe jí nganji na.

Jesús joinchesattehe Jacobo co Juan

⁵¹ Are ojoiconchiaon tiempo que Jesús saccojín para ngajni, jehe řaonha para sacjoi ngain Jerusalén.

⁵² Jehe rroanha canxion chojni que joicao joajné icha saho, co chojni mé cjoí na ngain ná rajna ngain regioen Samaria para joicjé na ná nchia tti sintte jehe na conixin Jesús.

⁵³ Pero chojni samaritano mé čhoha na joanjo na joachaxin nttiha ixin chonxin na que chojní Jesús conixin jehe satettji na para Jerusalén.

⁵⁴ Are Jacobo co Juan conohe que ixin nisamaritano čhoha na danjo na joachaxin, jehe ndačo ngain Jesús:

—¿Arinao soixin que tsetonha na janha na que rroxincanji xohi de ngajni, para soen cain chojni yá inchin joinchehe profeta Elías?

⁵⁵ Cottimeja Jesús ngaria tsjehe na, co joinchesattehe na, ndačo:

—Jaha ra noaha ra quehe clase de espíritu chonda ra.

⁵⁶ Ixin janha, tti Xí que joixin de ngajni, joiha para nasoenxon chojni, sino que para rrochjaha na vida naroaxin.

Cottimeja sacjoi na para ngain iná rajna.

Tti chojni que joinao rrogacao Jesús

(Mt. 8.19-22)

⁵⁷ Are tettji na ngatja nttiha, ná xí ndačo xa ngain Jesús:

—Janha rinaho sacjin na cain lugar tti soixin sacji.

⁵⁸ Jesús ndačo ngain tti xí mé:

—Cain condanixa chonda va cuevé va, co cain conttoa chonda va caqué va, pero janha, tti Xí que joixin de ngajni, chondaha ni ttinó saričhin.

⁵⁹ Jesús ndačo ngain iná tti xí:

—Jaha chjin na.

Pero tti xí mé ndačo:

—Nttatsanha ñao, chonna na saho ndasenja ndodana para que janha tsjavá ndo.

⁶⁰ Jesús ndačo:

—Tančhjanda tti chojni que chondaha vida naroaxin tsjavá chó na; pero jaha ttji co dindache chojni ixin Dios osiquetonha ngain ansén na.

⁶¹ Cottimeja iná tti xí ndačo ngain Jesús:

—Janha rinaho satsjin na, pero saho chonna na tsji sinttanoa ninchiania.

62 Pero Jesús ndačho:

—Tti jitse ningue, cottimeja tsjehe para noton, chojni mé xonhi xé para ngain tti ttetonha Dios.

10

Are Jesús rroanha tti setenta chojni

¹ Después de cain jiji, Jesús coinchiehe isetenta chojni, co jehe saho rroanha de yó na co yó na ngain cain rajna co icha lugar chian nttiha tti jehe chonda que cjoí después.

² Co ndačho ngain na:

—Atto seguro tti rrondattjo ra, que coseché Dios atto tsje, pero ninchehe xa tsjeha na. Mexinxin nchetsenhe ra ñao Xinajni para que jehe rrorroanha icha ninchehe xa para tsjejo na cain cosecha jiji.

³ Ttji ra jai jaha ra co xaxaon ra que janha rroanha ra inchin coleco ngayé condanixa.

⁴ Ttjioha ra bolsa, ni tomi, ni icha catte que jehó tti ca jaha ra techjanga ra. Co tadinttengattjenha ra para chjehe ra chojni joajna ngatja nttiha, ixin jamé sinchetjanguí ra tiempo.

⁵ Are saso ra ngain ná nchia, saho danjo ra joajna co ndačho ra: “Que chojni de ngain nchia jiji tsonohe čhjoin ngain ansén.”

⁶ Co si ngain nchia mé te chojni jian, ján, chojni mé tequininxin tti joajna que jaha ra sanjo ra; pero si nahi, joajná ra mé sarrocjan nganji ra.

⁷ Are saso ra ngain ná rajna, dittoha ra jehó ngain nacoa nchia co jintte ra co dihi ra tti rrochjá ra na de ngain nchia mé. Ixin tti nchehe xa

jiquininxin rroxenguehe hna. Chondaha ra que sittoha ra ojejé nchia.

⁸ Are saso ra ngain ná rajna tti chojni ján sayaha ra, jintte ra cain tti rrochjá ra na.

⁹ Nchexingamehe ra chojni nihi que te ngain rajna mé, co ndache ra na: “Ochian joí tiempo para Dios siquetonha ngain ansean ra.”

¹⁰ Pero si saso ra ngain ná rajna tti rroçhoha chojni sayaha ra na, jaha ra daçhje ra para ngá nttiha co ndaço ra:

¹¹ “Hasta tti jinche de ngain rajná ra jahi que tse rotna na, tsontsjenga na para ná señal que jaha ra vitticaonha ra joajna que joiquianha ra. Pero çaxaon ra que tti ttetonha Dios ochian joí nganji ra.”

¹² Janha rrindattjo ra seguro, que para ngain nchanho que Dios sinchejuzguehe cainxin chojni, are mé chojni de ngain rajna que vitticaonha na joajné Dios icha soji castigo sayé na que tti castigo que vayé chojni de ngain ciudad de Sodoma.

Rajna que vintteguitticaonha

(Mt. 11.20-24)

¹³ ¡Anto tangui tsonha jaha ra chojni de ngain rajna Corazín! ¡Co anto tangui tsonha jaha ra, chojni de ngain rajna Betsaida! Ixin si cain milagro que jointtaha ngayaha ra rroconhe ngayé chojni de ngain ciudad de Tiro co Sidón, seguro que chojni mé osé rroquentoxinhi na vidé na de tti jianha que vanchehe na. Co para rrocjago na ixin jehe na orroquentoxinhi na vidé na, rroguinttengá na lonto ttie co rroguinga na nntesoguihi.

¹⁴ Pero ngain tti nchanho que Dios sinchejuzguehe cainxin chojni, are mé jaha ra

sayehe ra castigo icha soji que chojni de ngain Tiro co Sidón.

¹⁵ Co jaha ra de ngain rajna Capernaum, ¿Añaxaon ra que jaha ra tsji ra para ngajni? Nahi, jeha jamé, ixin jaha ra tsjixin já ra ngain infierno.

¹⁶ Jesús ãa ndaço ngain chojni:

—Tti chojni que sitticaon tti rrondaço jaha ra, cai sitticaon na na janha. Co tti chojni que sitticaonha tti rrondaço ra, cai chojni mé sitticaonha na na janha. Co tti chojni que sitticaonha na janha, cai sitticaonha na tti rroanha na janha.

Are cjan tti setenta chojni

¹⁷ Cottimeja sacjoi tti setenta chojni co después cjan na anto contento, co ndaço na:

—Hasta cain espíritu jianha vitticaon joinchehe tti ndačhjan na are nichja na conixin joachaxín nombrea soixin.

¹⁸ Jesús ndaço ngain na:

—Ján, ixin janha vicon queñén vetsingaxin Satanás de ngajni inchin ná rayo.

¹⁹ Janha chjaha ra joachaxin para tsingachje ra conché conixin contanchia, co para tsixinha ra ngain tti jianha, co ãonhi tsonha ra.

²⁰ Pero tonoaha ra çhjoin ixin espíritu jianha ditticaon co nchehe tti ndaço ra, sino que ixin nombrea ra ojitaxin ngajni.

*Ndodaha conixin Xenhe Ndo
(Mt. 11.25-27; 13.16-17)*

²¹ Ngain rato mé, Jesús anto ché de ixin Espíritu Santo, co jehe ndaço:

—Janha rrinttacoanxinha soixin, que joinchechjian nontte co joinchechjian ngajni,

ixin tti chojni que chonda confianza nganji soixin inchin nchinnchinchjan chonda confianza ngain ndodé, soixin cjoagohe chojni mé tti soixin coemehe tti chojni que anto nohe co tti chojni que anto ttinxin. Ján, Padre, jañá joinchehe soixin ixin jañá rinao.

²² 'Ndodana Ndo chjana joachaxin para tte-tonha cainxin cosa. xonhi chojni nohe quensen tti Xenhe jehe Ndo, sino que jehe Ndo mismo nohe Ndo quensen mé. Co xonhi chojni nohe quensen jehe Ndo, sino que jehe Xenhe Ndo, tti Xan nohe, conixin cain tti chojni que jehe Xan sino Xan sinchegatsoan Xan jehe Ndo.

²³ Cottimeja Jesús tsjehe ngain chojni que vacao co ndačo ngain jeho na:

—Anto čhjoin para ixin tti chojni que tedicon tti jaha ra tedicon ra jai,

²⁴ ixin tsje profeta co tsje rey joinao na rrogu- icon na jihi, tti jaha ra tedicon ra, pero jehe na viconha na. Co jehe na joinao na rroquinhi na tti jaha ra ttettinhi ra jai, pero coinha na.

Ejemploe ná chojni jian de ngain Samaria

²⁵ Cottimeja ná ximaestroe ley Israel cjoí xa joitsjehe xa Jesús jeho para joincheyehe xa Jesús, co joanchiangui xa ngain co ndačo xa:

—Maestro, ¿quehe sinttaha janha para rro- chonda iná vida naroaxin?

²⁶ Jesús ndačo ngain xa:

—¿Quehe jitaxin ngain ley que vayé Moisés? ¿Quexén čo ley mé?

²⁷ Jehe ximaestroe ley mé ndačo xa:

—Ngain ley mé jindačo: “Rinao Dios conixin ngoi ansean, conixin ngain almá, conixin ngoi fuerzá, conixin ngoi joarrixaoan; co rinao cainxin nivecinoa inchin rinao cuerpoa jaha.”

²⁸ Cottimeja Jesús ndačo ngain xa:

—Nchao jí tti jaha ndačo. Si jaha sinchehe cain yá, ján rrochonda iná vida naroaxin.

²⁹ Pero ximaestroe ley mé joinao xa rroguittohe xa jian ngattoxon con Jesús de ixin tti ndačo xa, mexinxin joanchiangui xa ngain Jesús co ndačo xa:

—Pero, ¿quensen vecinona?

³⁰ Cottimeja ndačo Jesús ngain xa:

—Ná xí joixin xa de Jerusalén para sajittji xa ngain rajna Jericó, co ngatja nttiha cayacoen xa canxion xichehe, co cain xichehe mé coehe xa jehe tti xí mé cainxin tomí co hasta lonttoe que jingá, co anto goen xa jehe tti xí mé, hasta merocoa narrogoenxon xa. Cottimeja savintteci xa.

³¹ Co nchion después nttiha vatto ná xidána judío, pero are jehe xa vicon xa que nttiha tajitsinga tti xí mé, jehe xidána mé vatto ojé lado.

³² Cai nonttiha vatto ná chojni razé Leví, pero are jehe vicon tti xí que tajitsinga nttiha, cai vatto ojé lado.

³³ Pero nchion después nttiha vatto ná xí samaritano, co are jehe xa vicon xa tti xí judío que tajitsinga ngandehe nttiha mé, jehe xa coiaco-noehe xa.

³⁴ Cottimeja jehe xa conchiennehe xa ngaca tti xí mé, co joincheñoenhe xa cain tti diconihi ngain cuerpoe conixin aceite co vino, co coensia xa jian. Cottimeja jehe xa joinchetaha xa colochoe xa co

sajoicao xa ngain ná nchia, co nttiha jehe xa venda xa.

³⁵ Co ndoexin are jehe xí mé sacjoi xa, joantsje xa yó tomi que anto rentte co joanjo xa ngain tti nchiandoha mé, co ndačo xa ngain: “Darinda xí jihi, co si jaha sinchexinhi icha tomi ixin jehe xa, janha tsjengaha hna are rrocjan na.”

³⁶ Mexinxin ndachjenji na ¿quexehe de tti ní xí mé tti joinchehe inchin ná nivecinoe tti xí que nihi?

³⁷ Ximaestroe ley ndačo xa:

—Tti xí que coiaconoehe jehe tti nihi mé.

Cottimeja Jesús ndačo ngain xa:

—Janché, jaha cai ttji co nchehe jamé.

Are Jesús ngain nchiandoha Marta co María

³⁸ Jesús joinchehe sigue sacjoi, co joiji ngain ná rajna nchín, co nttiha ná nchí que vinhi Marta joanjo ncha nchiandoha ncha tti vittohe Jesús.

³⁹ Jehe Marta vechonda ná xanchó que vinhi María, co are mé, jehe María tavehe čica rotté Jesús para que coinhi quehe ndačo Jesús.

⁴⁰ Pero Marta anto jidoan purado de jinchechjian comida, ixin jeho jinchehe xa, mexinxin conchienne co ndačo ngain Jesús:

—¿Ařaxaonha que ixin xanchian ttinttona xan janho rrinttaha cain xa jihi? Ndache xan que tsjenguijna na xan.

⁴¹ Pero Jesús ndačo ngain Marta:

—Marta, Marta, jaha anto řaxaon de ixin cain cosa yá,

⁴² pero jí jeho nacoa cosa que anto importante. Co María ocoinchiehe tti cosa icha importante mé, co řonhi chojni santsjehe cosa mé.

11

*Are Jesús cjoago quexén sinchecoanxinhi ni Dios
(Mt. 6.9-15; 7.7-11)*

¹ Ná nchanho Jesús jinchecoanxinhi Dios ngain ná lugar, co are joexin joinchecoanxinhi Dios, ná de tti chojni que vacao ndačo ngain:

—Nchecoanna ni ra sinttacoanxian na Dios, jaña inchin Juan, tti vanchequite chojni, joinchecoenhe chojni que vacao.

² Jesús ndačo:

—Are sinchecoanxinhi ra Dios, ndačo ra:

Padre soixin que ttjen ngajni,
nombrea soixin jiquininxin tsosayehe.
Siquetonha nttihi soixin.

Co tsonhe inchin soixin rinao nttihi ngataha nontte, jaña inchin tonhe nttiha ngajni.

³ Chjana ra jai tti sine na que rrogondana na.

⁴ Nchetjañana ni ra tti jianha que jointtaha na, ixin janha na cai nttatjaña na tti chojni que nchehe jianha nganji na.

Nchegattoha ni ra tangui: tančhjandaha ni ra ngain tti jianha.

⁵ Cai ndačo Jesús ngain na:

—Tsín na ná ejemplo, que ná de jaha ra chonda ra ná xiamigoa ra, co ngosine ttie siji xa nchiandai ra co rrondattjo ra xa: “Amigo, nhecjen na ní niottja,

⁶ ixin ná xiamigona nandá joixin xa viaje, co joiji xa nchiania co janha xonhi chonda que rrochjaha xa.”

⁷ Co si jaha ra rrondačo ra desde ngaxinhi nchiandai ra: “Nchemolestaha na; ocoejá puerta co

otarrichinquinha xanhna ngataha cama; čho ha singattjen para rrochjaha tti jaha rinao.”

⁸ Pero si xiamigoa ra mé sinchehe xa sigue rronichjaha ra xa jaha ra singattjen ra co rrochjehe ra xa tti jehe xa rinao xa pero ijeha ixin amigo ra, sino que jaha ra sanjo ra mé para que isincheha xa sigue sinttamolestá ra xa icha.

⁹ Mexinxin janha rrindattjo ra: Danchia ra co Dios rrochjá ra; ttjé ra co sinchí ra; dinga ra puerta, co puerta mé rroxiré puerta.

¹⁰ Ixin tti danchia, jehe dayé; co tti ttjé, jehe dittja; co tti dinga puerta, puerta xiré puerta para ixin jehe.

¹¹ ¿Apoco čhonja de jaha ra que ochonda ra xanha ra anchao rrochjehe ra xan ná xo are sanchiaha ra xan niottja? ¿O arrochjehe ra xan ntaohe conché are jehe xan sanchia ra xan ntaohe copescado?

¹² ¿O arrochjehe ra xan ná conttanchia are sanchiaha ra xan joja?

¹³ Mexinxin si jaha ra masqui chojni jianha ra pero noha ra danjo ra cosa jian ngain xanha ra, ¡mé Ndodá na que ttjen ngajni xijanjo ha Ndo Espíritu Santo ngain tti chojni que sanchia ngain Ndo!

Are ndačo chojni ixin Jesús chonda joachaxín inchínji

(Mt. 12.22-30; Mr. 3.19-27)

¹⁴ Ná nchanho Jesús vengui ná espíritu jianha de ngaxinhi cuerpoe ná xí que ndadicottapo xa de ixin jehe espíritu mé; co are espíritu jianha

ovačhjexin de ngaxinhi cuerpoe xa, jehe xa onchao nichja xa. Tsje chojni que te nttiha vinttegoan na admirado de ixin tti joinchehe Jesús.

¹⁵ Pero icanxin na ndačo na:

—Xí jihi dengui xa espíritu jianha de ixin joachaxín Satanás, tti cai dinhi Beelzebú, tti tte-tonha ngain cain espíritu jianha.

¹⁶ Co icanxin na para rrojincheyehe na Jesús, joanchiehe na que ixin jehe rrojinchehe ná milagro que ttixin de ngajni.

¹⁷ Pero jehe ovenohe quehe teřaxaon na, co jehe ndačo ngain na:

—Quexeho gobierno que chjéa para ttetocaho chó, gobierno mé toin ndattjexin, co si ná nindoha ngain ná nchia, si atto tteto na, cai toin ndachje-qué na.

¹⁸ Jañá cai, si Satanás tseto jehó, ¿quexén tsončjenhe joachaxin que jehe chonda? Jihi ndačhjan janha, ixin jaha ra ndačo ra que janha dehngui espíritu jianha de ixin joachaxín Satanás.

¹⁹ Pero si janha jamé na, ¿quensen chjé chojnia ra joachaxin para dengui na espíritu jianha? Mexinxin jehó na tjago na que ndoaha tti teřaxaon ra.

²⁰ Pero janha dehngui espíritu jianha de ixin joachaxín Dios, co jihi rročo que tti ttetonha Dios ochian joí nganji ra.

²¹ 'Are ná xí tsanga jinda xa nchiandoha xa conixin tsje espada co lanza, are mé cain cosé xa que jichonda xa jí seguro.

²² Pero si tsí iná xí icha tsanga que jehe xa co tsixinha xa ngain xí mé, ndasantsjehe xa cain espadé xa co lanzé xa que chonda xa, cottimeja nchao sasicao xa cosé xí mé que jichjian.

²³ 'Tti chojni que rinaoha na janha, chojni mé ningaonna janha; co tti chojni que ttenchjianha tti janha rrindačhjan, chojni mé ttingo na palabrana inchin chojni que ttingo caxineno.

Tti espíritu jianha que cjan
(Mt. 12.43-45)

²⁴ 'Are ná espíritu jianha dačhjexin de ngain cuerpoe ná chojni, espíritu jihi sattji ngain lugar xema dicjé ná lugar tti jehe sinchejogaha. Co are idiraha lugar mé, jehe xaxaon: "Janha sarrocjan na ngain nchiania tti vačhjexin."

²⁵ Are espíritu mé cjan, jehe dittja cuerpoe chojni mé inchin ná nchia que diganjo na čhjoin, co čhjoin diconchjian ngaxinhi nchia mé.

²⁶ Cottimeja espíritu jianha mé dirroé iyáto espíritu icha jianha que jehe espíritu mé, co cain espíritu mé sadixinhi ngaxinhi cuerpoe chojni mé para tadintte cai. Co después, chojni mé icha tangui tonhe que are saho.

Quensen tonohé čhjoin ngain vidé

²⁷ Are Jesús jindačo cain cosa jihi, ná nčí nttiha ngayé chojni ndačo nča sén:

—¡Anto čhjoin para ixin tti nčí que jointtacon-cjiha co jointtagangui!

²⁸ Pero Jesús ndačo:

—¡Icha čhjoin para ixin tti chojni que ttihi tti ndačo Dios co ditticaon na!

Are chojni jianha joanchia na ná milagro
(Mt. 12.38-42; Mr. 8.12)

²⁹ Chojni joinchehe na sigue xatte na ngandanji Jesús, co jehe coexinhi nichja co ndačo:

—Cain chojni ngain tiempo jiji, jehe na jianha na co danchia na sicon na ná señal de milagro; pero xonhi icha señal sicon na que jeho tti señal que vattohe profeta Jonás.

³⁰ Ixin jañá inchin Jonás cjoí ná señal para ixin chojni que vintte ngain ciudad de Nínive, jamé janha cai, tti Xí que joixin de ngajni, janha ná señal para ixin chojni de ngain tiempo que te na jai.

³¹ Are chojni de tiempo jiji soenhe na juzgado, tti reina que joixin de ngain nontte Sabá icha sur singattjen co jehe reina mé rrocho jie para ixin chojni jiji ixin jehe reina mé joixin anto cjin para joiquinhi tti venohe Salomón, co nttihi jí nganji ra ná tti icha importante que Salomón pero xonhi chojni nchehe caso.

³² Co chojni que vintte ngain ciudad de Nínive singattjen na ngain tti nchanho que Dios sinchejuzguehe cain chojni, para rrocho na jie para ixin chojni de tiempo jiji ixin cain chojni de ngain Nínive coentoxinhi na vidé na are Jonás joindache na joajné Dios, co nttihi jí ná tti icha importante que Jonás pero xonhi chojni nchehe caso.

*Jmacon ni, mé tti lamparé cuerpoe ni
(Mt. 5.15; 6.22-23)*

³³ Xonhi chojni nchengasán ná lámpara para ttema lámpara ni para daquehe ngaxinhi ná cajón, sino que dehe lámpara noi para que cain chojni que dixinhi nchia dingasenhe na.

³⁴ Jmacon ni inchin ná lámpara para ngain cuerpoe ni. Mexinxin si jmacon jaha jian, cai ngoixin

cuerpoa chonda joadingasán. Rrocho si joadingasán que Dios rroanha jí ngain ansean, jaha chojni jian. Pero si jmacon jianha, cai ngoixin cuerpoa jí ngain tti naxin xehe.

³⁵ Ttjiho cuidado para que tti joadingasán que rrichonda rrocjanha inchin tti naxin xehe.

³⁶ Ixin si ngoixin cuerpoa jichonda joadingasán, ni rioho de ngain cuerpoa jichondaha ni rioho tti naxin xehe; cain cosa jaha sicon jian xajeho inchin are ná lámpara jinttangasañaha conixin xóí.

Are Jesús joinchesattehe xifariseo co ximaestroe ley

(Mt. 23.1-36; Mr. 12.38-40; Lc. 20.45-47)

³⁷ Are Jesús joexin ndacho cain yá, ná xifariseo ndache xa Jesús ixin sinecaho xa ngain nchian-doha xa. Jesús cjoí nchiandoha xa co joixinhi vehe ngain mesa.

³⁸ Jehe xifariseo mé goan xa admirado ixin vicon xa que Jesús vehe joine co conttiha jinda tsje nttiha inchin costumbré icha chojni judío.

³⁹ Pero Jesús ndacho ngain xa:

—Jaha ra xifariseo ra inchin vaso co láto que chojni ncheroa de ngama, pero de ngaxinhi ansean ra tecaon ra de cain cosa jianha ixin ttehe ra cosé chojni co nchehe ra icha cosa jianha.

⁴⁰ ¡Jaha ra tonto ra! ¿Anoaha ra que Dios tti joinchechjian ngama ra, cai joinchechjian ngaxinxin ra?

⁴¹ Are danjo ra tomi ngain chojni noa, cai danjo ra de ngain ansean ra, co jamé tsoroa almá ra.

⁴² ¡Anto tangui tsonha ra jaha ra xifariseo! Ixin jaha ra danjo ra ngain Dios tti ttexin parte de ca

que dinhi menta, co de caruda, co de icha clase de ca, pero ncheha ra caso de tti jian que nchehe ra ngain vidá ra co rinaoha ra Dios. Co jiji tti chonda ra que sinchehe ra co cai nchehe ra sigue danjo ra tti ttexin parte de cain ca mé.

⁴³ ¡Anto tangui tsonha ra, jaha ra xifariseo! Jaha ra nntařoxinha ra dayehe ra nntaxintaon icha importante ngaxinhi nihngo, co nntařoxinha ra dayehe ra joajna conixin anto respeto are ngatja nntiha.

⁴⁴ ¡Anto tangui tsonha ra jaha ra ximaestroe ley co jaha ra xifariseo, řo ncheha ra inchin ndařo ra! Ixin jaha ra te ra řá sepultura que idiconha ni co chojni datto na ngataha nntiha pero noeha na ixin nntiha jixavá cosa dirrenga.

⁴⁵ Cottimeja ná ximaestroe ley, ndařo xa ngain Jesús:

—Maestro, are soixin ndařo yá, rrinichja feo de ixin janha na cai.

⁴⁶ Pero Jesús ndařo:

—¡Cai jaha ra anto tangui tsonha ra jaha ra řo maestro ley! Ixin jaha ra tti ttetonhe ra icha chojni que sinchehe na para ixin Dios cosa anto tangui, co mé ná carga anto ye para ixin jehe na ixin ttixinha na nchehe na cain mé, co jaha ra ttjenguijnaha ra na para sinchehe na cain tti jaha ra ttetonha ra.

⁴⁷ ¡Anto tangui tsonha ra jaha ra! Ixin jaha ra nchechjian ra monumento anto řhjoin ngataha tti teřavá cuerpoe cain profeta que nindogoelitoa ra řanřhjen nagoenxon na are saho.

⁴⁸ Conixin yá jaha ra tjago ra, que nntařoxinha ra tti joinchehe nindogoelitoa ra řanřhjen, ixin

jehe na vinttegoen na profeta are saho co jaha ra nchechjian ra čhjoin ngataha tti teřavá cuerpoe profeta.

⁴⁹ Mexinxin Dios ixin jehe anto jian nohe, mexinxin ndačo: “Rrorroanha ra profetana co representantena nganji ra, co jaha ra nasoenxon ra čhonja de jehe na co ittoha na feo sinchehe ra ngain na.”

⁵⁰ Mexinxin chojni de ngain tiempo jihi jehe na niteca vidé cain profeta que vintteguenhe desde are nontte conchjian hasta jai;

⁵¹ rročo desde are ndavenhe Abel hasta are joiguenhe Zacarías, tti goenxin na ngain lugar entre altar co lugar santísimo. Yá tti rrindattjoxin ra janha, que chojni de ngain tiempo jihi tti teca na cain yá.

⁵² ¡Anto tangui tsonha ra jaha ra, řo maestroe ley! Ixin jaha ra chonda ra tti řón que jitaxin cain tti ttetonha Dios. Pero jaha ra mismo rinaoha ra ttinxin ra, ni tančhjandaha ra icha chojni que rinao tsinxin řón mé.

⁵³ Are Jesús ndačo cain cosa jihi ngain xa, ximaestroe ley co xifariseo anto vinttegoňao xa ngain Jesús, cottimeja joanchianguihi xa Jesús anto tsje pregunta,

⁵⁴ para que rroguiconxin xa si jehe rronichja ná cosa ndoaha, para que jehe xa nchao rrocjanguihi xa Jesús.

12

Jesús cjoagoe chojni ixin cainxin cosa, masqui jimao, pero tsononxin

¹ Ngain rato mé, xatte anto tsje miles de chojni nttiha que hasta conxinca chó na soji. Co Jesús coexinhí ndačo saho ngain tti chojni que vacao:

—Ttjiho ra cuidado de ixin levaduré xifariseo, rročo tti jeha ndoa que jehe xa ndačo xa.

² Ixin xonhi ná cosa que ttema chojni que tsononxinha, co xonhi ná cosa jimao que tsononxinha.

³ Mexinxin, cain tti jaha ra nichja ra are naxin xehe, tsononxin are osingasán; co cain tti jaha ra nichja ra jimao are puerté nchia tajijé, pero cai tsononxinxin desde noi ngataha nchiandoi ra.

*Quensen jiquininxin rroxagoen ni
(Mt. 10.28-31)*

⁴ Nganji jaha ra, xiamigona ra, janha rrindattjo ra que chondaha ra que rroxagonhe ra tti chojni que natjayaxon ngain cuerpoe ni, ixin chojni mé čoha nasoenxon almé ni.

⁵ Pero janha rrondattjo ra quensen tti chonda que rroxagonhe ra: xagonhe ra jeho Dios, ixin jeho jehe tti nchao nasoenxon cuerpoa ra co rror-roanha almá ra para ngain infierno. Ján seguro que xagonhe ra jehe Dios.

⁶ ¿Quejanhi rentte naho conttoachjan? Jeho yó tomichjan que anto rentteha. Pero Dios tjañeha ni ná de jehe va.

⁷ Ixin Dios, jehe nohe hasta quejanhi xajá ra chonda ra. Mexinxin jaha ra xaonha ra, ixin jaha ra icha rentte ra que tsje conttoachjan.

*Tti chojni que ndačo ngattoxon con icha chojni
ixin Jesús jian
(Mt. 10.32-33; 12.32; 10.19-20)*

⁸ 'Janha rrondattjo ra que quexeho chojni que rrondačo nttihi ngataha nontte ixin amigoe na janha, cai jahna, tti Xí que joixin de ngajni, rrondačhjan ngattoxon con cain ángel de Dios que ixin jehe na amigona na cai.

⁹ Pero tti chojni que rrondačo ngattoxon con icha chojni que ixin jehe chonxinha de ixin janha, cai janha rrondačhjan ngattoxon con cain ángel de Dios que ixin chonxinha jehe mé.

¹⁰ 'Co quexeho chojni rronichja jianha de ixin janha, tti Xí que joixin de ngajni, nchao sitjañehe chojni mé; pero tti chojni que rronichja jianha de ixin Espíritu Santo, xonhi tiempo sitjañehe chojni mé.

¹¹ 'Are tsjiho ra na ngain nihngo, o ngain xijuez, o ngain icha xittetonha, taha ra joachjaon de ixin quexén rrondačo ra ngain xa de ixin tti joinchehe ra, co taha ra joachjaon de ixin quexén rronichja ra,

¹² ixin are sinqué momento que jaha ra rronichja ra, Espíritu Santo tti sinttařaxaon ra quehe rrondačo ra.

Tti rico que řaxaon cosa que xonhi řé

¹³ De ngayé cain chojni nttiha, ná chojni ndačo ngain Jesús:

—Maestro, ndache xanchian que rrochjana xan tti partena que jiquinixin na de herencia.

¹⁴ Pero Jesús ndačo:

—¿Quensen coín na janha de juez ngain cosa yá?

¹⁵ Cai ndačo Jesús:

—Ttjiho ra cuidado que antoha sinao ra tomi, ixin vidé chojni tsixinha de ixin tti tsje tomi que rrochonda ni.

¹⁶ Cottimeja Jesús ndache na ejemplo jiji:

—Vehe ná xí rico, co ngoixin jnguihi xa anto goan noa.

¹⁷ Cottimeja tti rico mé vehe xaxaon: “¿Quexén sinttaha janha? Chondaha ttinó tsenchjianxin cain cosechana.”

¹⁸ Ngain rato mé jehe xaxaon: “Onona quexén sinttaha. Sinttaxantte granerona que chonda para sinttachjian iná granero icha jie, co nttiha tsenchjinha cainxin cosechana, co cainxin cosa que janha chonda.

¹⁹ Cottimeja rroundattjan almana: Alma, jaha ochonda anto tsje cosa jichjian para anto tsje nano. Jai nchejogaha, jintte co dihi, co chaha.”

²⁰ Pero Dios ndačo ngain xí mé: “Jaha tonto. Ngain ttie jiji senhe jaha; co cain tti coenchjinha, ¿para ixin quensen?”

²¹ Jañá tonhe tti chojni que anto datse tomi co icha cosa que jehe dondehe, pero que xonhi chonda para ngain Dios.

Dios jinda cain xenhe

(Mt. 6.25-34)

²² Despues ndačo Jesús ngain chojni que vacao:

—Janha rroundattjo ra que taha ra joachjaon de ixin tti sintte ra para sinttechonxin ra, ni de ixin lonto que sinttetsí ra.

²³ Vidé ni icha rentte que tti jine ni, co cuerpoe ni icha rentte que lontoe ni.

²⁴ Tsjehe ra conttaha, que co mé ni xonhi ttenga va, ni xonhi cosecha datsín va, ni chondaha va

graneroe va, pero ixinha mé, Dios chjé va tti jine va. ¡Co para ixin Dios jaha ra icha rentte ra que conttoa!

²⁵ Co ¿Apoco ná de jaha ra, ixin anto ta ra joachjaon, anchao sahngui ra irioho metro icha de tti jininxin ra?

²⁶ Mexinxin si čhoha nchehe ra cosa tanguiha ¿quedonda ta ra joachjaon de ngain cosa tanguí?

²⁷ 'Xaxaon ra jian queXén dangui cain tsjo ngataon jngui, cain tsjo mé ncheha tsjo xa ni tajinha tsjo chjon. Co janha rrondattjo ra que ni rey Salomón, que jehe anto čhjoin vaguitsá, pero xonhi tiempo vetsá inchin ná de jehe tsjo jihi.

²⁸ Si Dios jañá nchetsá cain ca que jehó jai jí ngataon jngui co ndoe ondarroche ca ngain xohi, ¡mé jaha ra xichjaha ra Dios cain tti rrogondaha ra, masqui jaha ra xa antoha jian ditticaon ra ngain Dios!

²⁹ Mexinxin, taha ra joachjaon de ixin quehe sintte ra ni de quehe sihi ra.

³⁰ Ixin chojni de ngain mundo jihi ta na joachjaon de ixin cain cosa yá; pero jaha ra chonda ra ná Ndodá ra ngajni, que jehe Ndo onohé Ndo que jaha ra rrogondaha ra cain cosa yá.

³¹ Pero cain tiempo ditticaon ra cain tti ttetonha Ndo, co jamé sayehe ra cain cosa jihi.

Cosa rentte que rrochonda na ngajni

(Mt. 6.19-21)

³² 'Xaonha ra jaha ra xo inchin colecona, ixin masqui tsjeha ra pero Ndodá na que ttjen ngajni, jehe Ndo rinao Ndo rrochjá ra Ndo tti jehe Ndo ttetonha Ndo ngajni.

³³ Ncheçji ra cain cosa que chonda ra co ttjenguijna ra tti chojni que rrogondehe; jañá nchechjian ra bolsé tomi que ðonhi tiempo sichje, rroçho que ngajni rrochonda ra cosa icha rentte co cosa mé ðonhi tiempo tsjexin, ixin nttiha xichehe sijiha xa ni cochí sinchexantteha.

³⁴ Ixin ngain lugar tti jaha ra rrochonda ra cosá ra icha importante para ixin jaha ra, cai nttiha sehe ansean ra.

Chonda que sontte na listo

³⁵ Dintte ra listo, co ttjiho ra cuidado que lampara ra que sacaon cain tiempo.

³⁶ Dintte ra inchin ninchehe ða que techonhe na xinajní na tsixin xa de ngain tti cottehe. Ixin ninchehe ða mé dintte na listo para tsonxiré na puerté nchia are singa xa puerta.

³⁷ Anto çhjoin para ixin tti ninchehe ða que are tsí xinajní na, jehe na tatetsjehe na; atto seguro tti janha rrindattjo ra, que mismo xinajni mé tsaoxin xa cinturoen xa jian co tsintte xa na ngain mesa. Co jehe xa tsequia xa comida que sine na.

³⁸ Masqui jehe xinajni mé tsí xa ngosine ttie o are ndoyo, co ninchehe ðé xa tatetsjehe na, anto çhjoin para ixin ninchehe ða mé.

³⁹ ðaxaon ra cosa jihi, que si xinajní ná nchia rroconohe xa quehe hora rroquí xichehe are ttie, xinajni mé rroquejoaha xa para rrocançhjangaha xa xichehe rroguixinhi xa rroqué xa.

⁴⁰ Jaha ra cai dintte ra listo; ixin janha, tti Xí que joixin de ngajni, sihi iná are jaha ra ni rroðaxaonha ra ixin sihi.

Ná tti ninchehe xa jian, co ná tti ninchehe xa jianha

(Mt. 24.45-51)

⁴¹ Cottimeja Pedro joanchiangui ngain Jesús co ndačo:

—¿Acoín ejemplo jihu para ixin janho na, ani para ixin cainxin chojni?

⁴² Jesús ndačo:

—Xaxaon ra quensen tti nchehe xa que ditticaon jian co ttinxin jian tti jiquininxin sinchehe. Mé tti nchehe xa que xinajní rrochjé xa xa de rrochjé tti sine cain ninchehe xé xinajní mé.

⁴³ Anto chjoin para ixin tti nchehe xa que are tsí xinajní, jehe jinchehe inchin vitonhe.

⁴⁴ Ndoa tti rrondattjo ra que xinajni mé rrondačo xa ngain tti nchehe xa mé que jehe senda cain cosa que chonda xa.

⁴⁵ Pero si tti nchehe xa mé sinchesattehe xinchehe xé xinajni mé conixin nchimozé xa, co sehe sine co sihi co rrocoan;

⁴⁶ cottimeja xinajní tsí xa ngain ná nchanho co ngain ná hora que ni jehe noeha, co sinchecastigá xa anto soji inchin tti castigo que sayé cain chojni que ditticaonha Dios.

⁴⁷ Tti nchehe xa que onohe quehe rinao xinajní, pero rinaoha nchehe mé co ncheha inchin tti tte-tonha xa, tti nchehe xa mé anto soji sicaon.

⁴⁸ Pero tti nchehe xa que noeha quehe rinao xinajní, co nchehe cosa que jiquininxin castigo, nchehe xa mé icha sojiha sicaon. Tti chojni que dayé icha tsje, rroxanchiehe icha tsje, ixin jehe chonda icha responsabilidad.

Causexin Jesús chjeyaxin chojni
(Mt. 10.34-36)

⁴⁹ Janha joihi inchin ná xohi ngataha nontte para sinttaxante tti xonhi xé co sinttajian tti jian para ixin Dios. ¡Co janha rrojinaho que orroga-caon xohi mé!

⁵⁰ Chonda que atto tangui tsonna, co mé inchin janha siguittexin na ngain cosa tangui. Co janha anto feo tonona hasta tsoenja cain jihi.

⁵¹ Jaha ra puede xaxaon ra que ixin janha joihi para que chojni sicon chó na contento ngataha nontte jihi. Janha rrindattjo ra que nahi, ixin chojni toñaohé chó na jai ixin joihi janha.

⁵² De jai pa ndaha naho chojni ngain ná nchia rrochjeya na de ixin causananxin janha; ní na sitticaon na na janha, co yó na sitticaonha na na; o yó na sitticaon na na janha, co ní na sitticaonha na na.

⁵³ Ixin de causananxin janha, ná ndodaha rroningaconhe ndo xenhe ndo, co ná chjan rroningaconhe xan ndodé xan. Ná jannaha rroningaconhe jan nchichjehe jan, co xannché rroningaconhe xan janné xan. Ná jannchaha rroningaconhe jan nchideindehe jan, co nchideinda rroningaconhe ncha jannché ncha.

QueXén jí tiempo
(Mt. 16.1-4; Mr. 8.11-13)

⁵⁴ Cai ndacho Jesús ngain chojni:

—Are jaha ra dicon ra que ttjoi chinxin ttjoi tti diataonxin nchanho, jaha ra ndacho ra que ixin otsí chin, co jamé ndoa tonhe.

⁵⁵ Co are tjaxin chintto no sur, jaha ra ndacho ra que sania soa, co ndoa jamé tonhe.

⁵⁶ ¡Jaha ra ncheha ra tti ndačo ra! Jaha ra noha ra datsoenhe ra quehe tsonhe de ngajni co ngataha nontte, ¿co quedonda čhoča datsoan ra tti tsonhe ngain tiempo que te ra jai?

Tsjehe ra quexén nchehe ra para itsoñaoha ra ngain tti chojni que ningaconha ra
(Mt. 5.25-26)

⁵⁷ ¿Quedonda ttinchieha ra jaha ra mismo cain cosa jian?

⁵⁸ Si ná chojni sičo jie para ixin jaha co tsjiho jaha ngain xijuez, icha jian de ngatjao nttiha tjao chó ra de ixin quexén tsonhe para que jehe itsjioha ngain xijuez. Ixin si nahi, xijuez rrondache xa xipolicía para tsiaxinha xa.

⁵⁹ Co janha rrindattjo que čhoča sačhjexin de nttiha hasta que jaha tsengaja hna cainxin tomi que jaha rrica.

13

Chonda ra que tsentoxinhi ra vidá ra

¹ Ngain rato mé nttiha vintteconchienhe canxion chojni ngain Jesús co coequín na ixin Pilato nagoenxon canxion xí de ngain regioen Galilea mero ngain rato que jehe xa tedoen xa coxigo para tedanjo xa ngain Dios. Co nttiha vinttji jní xí mé, tti vinttji jní coxígo.

² Co Jesús ndačo ngain tti chojni que tettequín mé:

—¿Axxaon jaha ra que jamé vintteconhe xí tehe ixin icha jianha jehe xa que cain chojni ngain nacioen xa?

³ Janha rrindattjo ra que jeha jamé. Co si jaha ra tsentoxinha ra vidá ra, cain ra ndasitján almá ra.

⁴ ¿O ani xaxaon jaha ra que tti dieciocho chojni que ndavenhe are vetsingatja na tti torre de Siloé, ani nimé icha jianha na que cain chojni que vintte Jerusalén?

⁵ Janha rrindattjo ra que jeha jamé. Co si jaha ra tsentoxinha ra vidá ra, cainxin ra ndasitján almá ra.

Ejemploe tti nttahigo que danjoha ttochjoin

⁶ Cottimeja Jesús coín na ejemplo jihi:

—Ná xí vechonda xa ná nttahigo ngataon jnguihi xa co cjoí xa joitsjehe xa si vanjo nttá ttochjoin, pero xonhi ttochjoin vittja xa ngagaha nttá.

⁷ Cottimeja ndačo xa ngain tti xí que jinda jngui mé: “Tsjexinxin, janha oní nano ttjhi dicjé ttochjoin ngain nttá jihi, co ni ná nttiha dittjaha ttochjoin ngain nttá. Tončhinji nttá: ¿quedonda xá sehe nttá ngataha jnguihna co xonhi ttochjoin danjo nttá?”

⁸ Pero tti xí que jinda jngui mé ndačo: “Soixin, xá ttinttohe nttá iná nano jihi. Janha sinttandanguia nttá jinche co tsingonguia nttá abono.

⁹ Conixin jamé puede osanjo nttá ttochjoin, pero si nahi, cottimeja tončhinji nttá.”

Are Jesús joinchexingamehe ná nčhí ngain tti nchanho que nchejogaha ni

¹⁰ Ná nttiha, ngain tti nchanho que nchejogaha ni, Jesús tajinchecoenhe chojni de ixin Dios ngain ná nihngo.

¹¹ Co nttiha vehe ná nčí que venihi ncha ovechonda dieciocho nano. Ná espíritu jianha ndad-inchechatto ncha, co jehe ncha ichoha vaxendoa ncha.

¹² Co are Jesús vicon nčí jiji, jehe ndačo ngain ncha:

—Jaha oxingamaha de ixin tti chin que joarichonda.

¹³ Cottimeja jehe coín rá ngataha nčí mé, co ngain rato mé jehe ncha xendoa ncha co coexinhi ncha joinchecoanxinhi ncha Dios.

¹⁴ Pero xittetonha ngain nihngo mé coñao xa ixin Jesús joinchexingamehe nčí mé mero ngain tti nchanho que nchejogaha ni. Mexinxin jehe xí mé ndačo xa ngain cain chojni que te nttiha:

—Semana chonda incjaon nchanho tti jiquininxin doan xa; ngain nchanho mé sihi ra para que tsoxoanha ra co nahi ngain nchanho que nchejogaha ni.

¹⁵ Cottimeja Jesús ndačo ngain xí mé:

—Jaha ra ncheha ra tti ndačo ra, ixin çhonja de jaha ra, çatonxindangueha ra coxinttaha ra o colochoha ra para ttjiho ra va diguihi va jinda nchanho que nchejogaha ni?

¹⁶ Co nčí jiji que jehe ncha razé Abraham ncha, co Satanás diquia ncha conixin chin jiji ochonda dieciocho nano, çapoco janha chondaha que tsonxindangá ncha de ixin chin yá ngain nchanho que nchejogaha ni?

¹⁷ Are Jesús ndačo jiji, cainxin chojni que ningaconhe anto cosoé na; co icha chojni anto ché na are vaguicon na milagro anto importante que Jesús vanchehe.

*Ejemplo ná tsé que dinhi mostaza**(Mt. 13.31-32; Mr. 4.30-32)*¹⁸ Cottimeja ndačo Jesús:

—¿Quehe cosa nchao sinttacaninxin tti ttetonha Dios?

¹⁹ Mé inchin tsehe ná ca que dinhi mostaza que ttenga ná xí ngain jnguihi xa. Co ca mé dangui ca inchin ná nttá jie, que hasta conttoa que tjaganga nchechjian va caqué va ngagaha rama.

*Ejemplo levadura**(Mt. 13.33)*²⁰ Cai ndačo Jesús:

—¿Quehe cosa nchao sinttacaninxin tti ttetonha Dios?

²¹ Mé inchin levadura que ta ngain hariné niot-tja co nchehe xa hasta nchegatjoe nchoho.

*Tti puerta jno**(Mt. 7.13-14, 21-23)*

²² Are sacjan Jesús para Jerusalén, jehe joinchecoenhe chojni de ixin Dios ngain rajna co ngain rajnanchjan que vatto.

²³ Co vehe ná chojni que joanchiangui ngain Jesús co ndačo:

—¿Ajeho nchion chojni tti rrochonda iná vida nroaxin?

Co Jesús ndačo:

²⁴ —Nchehe ra de que dixinxin ra ngain puerta jno, ixin rrindattjo ra que tsje chojni sino na sixinxin na nttiha pero choha.

²⁵ Co are tti nchiandoha singattjen co tsejé puerta, cottimeja jaha ra xo sittoha ra ndoja, singa ra puerta co rrondačo ra: “Soixin, danttjena ni

ra puerta.” Pero jehe rrondačo: “Janha nonaha quettinó joixin jaha ra.”

²⁶ Cottimeja jaha ra tsexinhi ra rrondačo ra: “Janha na tti joine na co vihi na nganji soixin, co soixin tti joinchecoanna ra de ixin Dios ngá nttiha de ngain rajnana na.”

²⁷ Pero jehe rrondačo nganji ra: “Janha oten-dattjo ra que nonaha ttinó joixin ra. Sattjixin ra de nganji na, xo nchehe ra jianha.”

²⁸ Nttiha jaha ra rrotsjanga ra co sinttetaon neno ra are sicon ra que Abraham, Isaac, Jacob, conixin cain profeta tate na ngajni tti ttetonha Dios, co jaha ra Dios tsančhjandaha ra para sintte ra nttiha.

²⁹ Ixin are mé tsixin chojni de cainxin parte de nontte; de ngain tti čhinxin nchanho, co de ngain tti diataonxin nchanho, co de ngain norte co de ngain sur para sintte na sine na ngain mesa de ngain lugar que ttetonha Dios.

³⁰ Are mé tsje chojni que jai jeha importante na, pero are mé jehe na nisintte icha importante; co cain chojni que jai tonohé na ixin anto importante, are mé jehe na jeha importante na.

Jesús tsjanga por ixin Jerusalén
(Mt. 23.37-39)

³¹ Ngain nchanho mé vinttecji canxion xifariseo co vinttendačo xa ngain Jesús:

—Sattjixin de nttihi, ixin rey Herodes rinao na-soenxon soixin.

³² Pero Jesús ndačo ngain xa:

—Ttji ra co ndache ra xí mañoso mé, que jai co ndoe sinttaha sigue senguixin espíritu jianha de

ngaxinhi cuerpoe chojni, co sinttaxingamá chojni nihi, co rejngui otsjena xana.

³³ Pero janha chonda que sinttaha sigue nttiana jai co ndoe co rejngui, ixin cain profeta denxin de ngain Jerusalén.

³⁴ ¡Jaha ciudad de Jerusalén, jaha tti nadoenxon cain profeta co taxin xo tti chojni que ttiaho joajné Dios que jehe rroanha nganji! ¡Janha anto tsje nttiha joinaho rrogatse chojnia inchin cochia datse va xenhe va ngangui nenehe va, pero jaha choha!

³⁵ Mexinxin tsjexin ra; nchiandoi ra ndasittohe nchia; co rrondattjo ra que irrocjanha ra sicon ni ra hasta que tsjija nchanho que are jaha ra rrondaço ra: “Anto jian tti joí de ngain nombré Dios.”

14

Are Jesús joinchexingamehe ná xí que veninxin chicjan

¹ Ná nchanho que nchejogaha ni, Jesús cjoijine ngain nchiandoha ná xittetonha ngain xifariseo, co are mé icha xifariseo tatetsayehe xa Jesús.

² Cai ngattoxon con Jesús tají ná xí que veninxin xa de chicjan.

³ Cottimeja Jesús joanchiangui ngain ximaestroey conixin ngain xifariseo:

—¿Ají joachaxin sinchexingamehe ni ná chojni nihi ngain nchanho que nchejogaha ni o ani nahi?

⁴ Pero jehe xa tavinttetencoaxa. Cottimeja Jesús catte tti nihi mé, joinchexingamehe co ndaço ngain ixin satsji jehe tti nihi mé.

⁵ Co ndaĉho Jesús ngain xifariseo:

—¿Quexehe de jaha ra, si ná colochoha ra o ná coxinttaha ra setsingá va ná pozo, asantsjeha ra va rato mé masqui nchanho que nchejogaha ni?

⁶ Co cain jehe xa ĉhoĉha ndaĉho xa ni ná palabra ngain Jesús.

Chojni que ttji tti tottehe na

⁷ Are vicon Jesús ixin cainxin chojni que cjoï ngain tti cottehe na puro ttinchieho na nttaxintaon icha importante ngain mesa, jehe ndache na janhi:

⁸ —Are ná chojni rrondattjo que tsji ngain ná quiai tti tsottehe na, dariha ngain lugar importante, ixin puede siji iná chojni icha importante que jaha.

⁹ Co tti ndattjo para cjoï jaha conixin jehe tti icha importante mé, nchao siji co rrondattjo jaha: “Danjo lugar que rrichonda ngain iná chojni jihi.” Cottimeja jaha chonda que satsjixin de ntthiha conixin joasoaxin para sigarihi ngain tti nttaxintaon icha importanteha.

¹⁰ Mexinxin, are ná chojni rrondattjo que jaha tsji ná quiai, jaha darihi tti lugar icha importanteha, para que are tsí tti ndattjo ixin jaha cjoï ngain quiai mé, jehe nchao rrondattjo: “Amigo, jaha datto ngain iná lugar icha importante.” Jamé jaha tsosayaha ngattoxon con cain chojni que te ngain mesa ntthiha.

¹¹ Ixin tti chojni que ģaxaon ixin jehe anto importante, chojni mé tsonohe ixin jehe ģonhi rentte; co tti chojni que ģaxaon ixin jehe ģonhi rentte, chojni mé icha tsorentte.

12 Cai ndaĉho Jesus ngain tti xı que coetonhe Jesus para que Jesus cjoı ngain quiai me:

—Jaha are tsın na vandango ttetoenja jeha xi-amigoa, ni jeoha xancho, ni jeoha niparientea, ni jeoha nivecinoa que chonda tsje tomi, ixin cain chojni jihi nchao tsın na ina vandangoe na co tsetonha na jaha para que tsji sinttecoho na co jame jehe na otsoncjanaha na tti jehe na joine na ngain vandangoa.

13 Mexinxin are jaha tsın na vandango, cai tte-tonhe chojni noa, co tti chojni que choha ttingui, co tti chojni rrengo, co tti chojni chejo.

14 Co jame Dios sinttanchaon jaha, ixin are rroxechon cain chojni que joinchehe jian, Dios tsjengaha hna jaha ixin jaha joanjo joine tti chojni que choha tsjengaha hna jaha.

Ejemploe tti sena que Dios sanjo ngajni

15 Are vinttequinhi na jihi na de tti nite ngain mesa ndaĉho ngain Jesus:

—Anto hjoin para ixin tti chojni que sine niot-tja nttiha ngain lugar tti ttetonha Dios.

16 Cottimeja Jesus ndaĉho ngain chojni me:

—Na xı coın xa na vandango anto jie, co co-tonha xa para joiguitonhe anto tsje chojni para rrocji na rrojine na.

17 Co are ocainxin vehe listo, xı me rroanha xa na tti nchehe xe xa para joiquetonhe cain chojni me ixin onchao jı cain cosa, onchao tsı na para sijine na.

18 Pero cain chojni me coexinhi na ndaĉho na ixin choha tsji na. Tti saho ndaĉho: “Najoexincoa coehna na nontte, co chonda que tsji sitysa nontte

mé; janha nttatsanha ñao que nchetjañana na ixin tsjinha na.”

¹⁹ Iná ndačo: “Janha ocoehna naho yunta de coxinttá, co tsji para sicon si nchao tsaon va; mexinxin nttatsanha ñao nchetjañana na ixin tsjinha na.”

²⁰ Co iná ndačo: “Janha najoexincoa cottena, co mexinxin čoha tsjin na.”

²¹ Are tti nchehe xa mé cjan, ndačo cain jihi ngain xinajní. Cottimeja jehe xinajni mé coñao xa co ndačo xa ngain jehe tti nchehe xa mé: “Jaicoa ttji ngain cain nttiha yeye co ngain nttiha nchinnchin de ngain ciudad jihi co sicohna nttihi chojni noa co tti čoha ttingui, co tti rrengo, co tti chejo.”

²² Nchion después jehe tti nchehe xa mé ndačo: “Ojointtaha inchin soixin coetonna, co ján xa jí icha lugar.”

²³ Jehe xinajni mé ndačo xa ngain tti nchehe xé xa: “Ttji ngá nttiha yeye co ngain nttiha nchinnchin de ngandehe ciudad jihi co ndache icha chojni que tsí na, para que rrocaon nchiania.

²⁴ Ixin janha rinaoha sixinhi ni ná de tti chojni que janha coetoan rroquí icha saho para rrojine na.”

Tti tangui que tonhe ni are ditticaon ni Jesucristo

²⁵ Anto tsje chojni rroé na Jesús; co jehe ngaria co ndačo ngain na:

²⁶ —Si čonja ra rinao ra sitticaon ni ra janha para cainxin tiempo, chonda ra que icha sinoo ni ra janha que ndodá ra, o janná ra, o čiha ra, o xanha ra, o xanchó ra, co cai hasta icha que

vidá ra. Tti chojni que sincheha jamé čhoha sehe chojnina.

²⁷ Jañá tti chojni que sanjoha vidé de ixin causananxin janha, chojni mé čhoha sehe chojnina.

²⁸ Si čhonja de jaha ra sino ra sinchechjian ra ná nchia anto noi, ¿apoco jeha saho rrořaxaon ra quejanhi tomi tsonchjianxin nchia mé, para que tsonoha ra achonda ra cain tomi para tsjexinxin tsonchjian nchia mé?

²⁹ Ixin si nahi, puede jeho coín ra base co ndajoexin tomia ra co ijoexinha joinchechjian ra nchia mé. Cottimeja cain chojni que sicon tsexinhi na tsjanao ra na jaha ra,

³⁰ co jehe ni mé rrondacho: “Xí jiha coexinxin xa joinchechjian xa nchia co joeha xa.”

³¹ O si čhonja rey chonda que rrořanguí guerra ngain iná rey, ¿apoco jeha saho rrořaxaon si nchao conixin tte mil soldado rrochoenxin tti iná rey que tsiaho veinte mil soldado?

³² Co si rey mé tsonohe que tsixinha, jehe rrorroanha canxion chojní para que sicao na joajna ngain tti iná rey are jehe joí řa icjion para que itsetoha.

³³ Jañá, cai si čhonja de jaha ra tsinttoeha ra cain tti chonda ra, čhoha sintte ra chojnina.

Are xijntta ndarroccjan simple

(Mt. 5.13; Mr. 9.50)

³⁴ Xijntta jehe jian, pero si ndarroccjan simple, ¿queřen rrocjan sonda iná?

³⁵ Mé ixonhi řé ni para jinche ni para ngain montoe abono, sino que mé dingo jañao. Jaha ra řo ttinxin ra, ttinhi ra jian.

15

Ejemploe tti coleco que diguitján (Mt. 18.10-14)

¹ Cain xicobrador de impuesto co xí que nchehe cosa jianha vintteconchienne xa ngaca Jesús para vinttequinhi xa tti jindačo Jesús,

² co mexinxin xifariseo co ximaestroe ley feo nichja xa de ixin Jesús, co ndačo xa:

—Xí jihi nchehe xa caso cain chojni que ncheha jian co jinecaho xa na.

³ Cottimeja Jesús coinhi xa ejemplo jihi:

⁴—¿Quexehe de jaha ra, si chonda ra cien coleco, co sinchetján ra ná va, atsinttoeha ra tti noventa y nueve va ngataon jngui co tsji ra sicjé ra tti co ndavitján, hasta que sinchija ra va?

⁵ Co are dinchí ra va, jaha ra chaha ra co tame ra va ngataha nttachán ra

⁶ co are daso ra nchiandoi ra, datse ra xiamigoa ra co nivecinoa ra co ndache ra na: “Jai sontte na contento ixin ovittja tti coleco que jointtatján.”

⁷ Janha rrindattjo ra, que xajeho jañá ngajni cai, Dios conixin cain ángel icha ché ngain ná chojni que jinchehe jianha are jehe ttentoxinhi vidé, que ngain tti noventa y nueve chojni jian que chojni mé rrongondeha na tsentoxinhi na vidé na.

Ejemploe tti tomi que ditján

⁸ Co cai iná ejemplo. Ná nchí chonda tte tomi de plata co joinchetján ncha ná tomi mé. ¿Quehe nchehe ncha? Jehe ncha nchegacaon ncha ná lámpara para ttjexin ncha tomi mé ngoixin ngaxinhi nchia co danjo ncha ngoixin ngaxinhi nchia hasta que dittja ncha tomi mé.

⁹ Co are dittja ncha tomi mé, jehe ncha dirroé ncha cain nchiamigué ncha conixin cain nchiveciné ncha co ndacho ncha ngain cain nchí mé: “Janché sontte na contento ixin janha ovittja tti tomi que jointtatján.”

¹⁰ Janha rrindattjo ra que xajeho jamé ngajni cai ixin ché cain ángel de Dios are ná chojni que jinchehe jianha ttetonxinhi vidé.

Ejemploe tti ná chjan que sacjoixin de ngain nindoha

¹¹ Jesús ndacho cai:

—Ná xí vechonda xa yó xenhe xa xanxí,

¹² co tti xan icha nchín ndacho xan ngain ndodé xan: “Padre, chjana tti herencia que jiquinixin na janha.” Cottimeja jehe ndo conchjeyehe ndo cayoi chjan mé herencié xan.

¹³ Tsjeha nchanho después, jehe tti xan icha nchín mé joinchecji xan tti nontte que vittoehe xan. Cottimeja conixin tomi mé sacjoixin xan cjin ngain iná nación; nttiha joinchexinxin xan cain tomí xan de ngain nchí co de ngain icha cosa jianha.

¹⁴ Co are ondajoehe xan cain tomi mé, anto ndacochjonga tti joine na ngain nación mé, co jehe xan anto vaguenhe xan jintta.

¹⁵ Cottimeja sajoiganchia xan xa ngain ná xinajni de ngain nación mé, co xinajni mé joanjo xa xa. Coetonhe xa jehe xan sajoiquingaria xan cocochi ngataon jnguihi xa.

¹⁶ Co jehe xan anto vaguenhe xan jintta, hasta que jehe xan joinao xan rrojine xan ná tipo de

raja que dinhi algarroba que vajine cocochi, pero xonhi chojni vachjé xan cosa mé.

¹⁷ Cottimeja xaxaon xan co ndačo xan: “¡Anto tsje ninchehe xa chonda ndodana! ¡Co jehe na chonda na tti jine na hasta xehe, co nttihi janha ndasenxin na jintta!

¹⁸ Icha jian janha sarrocjan na tti jí ndodana co rrondattjan ndo: Padre, janha jianha jointtaha ngain Dios co nganji soixin.

¹⁹ Janha ijiquininxinha na sinhi na xanha soixin; jehó dayehna na inchin ná de ninchehe xá.”

²⁰ Co jamé joinchehe xan; coá xan nttiha para sacjan xan ngain nchiandoha ndodé xan.

‘Xa icjion joihi xan vicon ndodé xan que jitonchienhe xan, jehe ndo coiaconoehe ndo xan. Co coinga ndo cjoí ndo vichoexin ndo xan ngatja nttiha co cjoá ndo xan co coetoxin ndo xan.

²¹ Cottimeja jehe xan ndačo xan ngain ndodé xan: “Padre, janha jianha jointtaha ngain Dios co nganji soixin; janha ijiquininxinha na sinhi na xanha soixin.”

²² Pero jehe ndodé xan ndačo ndo ngain ninchehe xé ndo: “Jaca sicohna ra tti lontto icha jian co ttentoxinna ra xanhna jihi; co cai ttengaha ra ná cochianingo dedoe xan, co nchecjanga ra xan jian tteroa.

²³ Sicó ra tti coxinttachjan que jointtanttao co doenhe ra va. ¡Sontte na co sontte na contento!

²⁴ Ixin xanhna jihi ondavenhe xan de ngattoxon con na, co jai cjan xechon xan. Ondavitján xan co xa cjan na jonttó na xan.” Co coexinhi na joinchexjian na comida para joine na.

25' Co are mé tti xansaho ngataon jngui jí xan. Co are ocjan xan co jói xan chiaon nchia, coinhi xan són co coinhi xan ixin tette na.

26 Cottimeja vayé xan ná de tti ninchehe xa que te nttiha para joanchianguihi xan quehe jí nttiha.

27 Jehe tti nchehe xa mé ndačo: “Jói xanchó, co ndodá coetonha ndo venhe tti coxinttachjan que cjonttao ixin jói xanchó co xonhi tti nihi xan.”

28 Pero tti xansaho mé coñao xan, co ixin čoha xan vixinhi xan nchia, jehe ndodé xan chonda ndo que vačhe ndo para joinchetsenhe ndo ñao xan ixin rroguixinhi xan nchia.

29 Co jehe xan ndačo xan ngain ndodé xan: “Soixin noha quejanhi nano janha rrinttaha xa nganji, co cainxin tiempo janha vitticanho cain tti ttetonna na, pero soixin xonhi tiempo chjaha ni ná cochivatochjan para rrogonhe rrojinequina xiamigona.

30 Pero jai jói xanha jiji, que joinchexincoa xan tomia de ngain nčí que nhecji cuerpoe, co jai soixin gonhe para ixin jehe xan tti coxinttachjan jitjonttao.”

31 Cottimeja ndodaha mé ndačo ndo ngain xan: “Hijo, jaha cainxin tiempo rrihi nganji na, co cainxin cosa que chonda janha, mé cosá jaha.

32 Pero jai atto jiquininxin tsín ná vandango co sontte na contento, ixin xanchó que inchin ondavenhe xan, pero para ixin ján na jai cjan xechon xan. Co jehe xan ondavitján xan, pero para ixin ján na jai jonttó na xan.”

16

Ejemploe ná xivaquetonha ngain ná rancho

¹ Jesús ndaĉho cai ngain tti chojni que vacao:

—Vehe ná xí rico que vechonda xa ná xivaquetonha ngain ranchoe xa pero cjoí na joindache na xinajni mé que ixin xinchehe ħa mé jinchexincoa xa tomí xinajni.

² Cottimeja xinajni mé vayé xa jehe tti nchehe ħa mé co ndache xa: “¿Aco ndoa tti joindachjenji na chojni de ixin jaha que ixin rritena na? Ndachjenji na queċén jí cuenta co quejanhi ħa jaha joexin, ixin jaha isincheha sigue tsetonha ngain ħana.”

³ Cottimeja tti vaquetonha mé ħaxaon: “¿Queċén sinttaha jai ixin xinajnina irrochjanaha xa ħa sinttaha? Janha itsangaha na para sinttaha ħa ngataon jngui, co chjana joasoaxin para sanchiagaha.

⁴ Onona queċén sinttaha para rrochonda amigo tti sayehna ngain nchiandoha are janha iċonhi ħa rrochonda.”

⁵ Cottimeja tti vaquetonha mé vayé cada chojni que teca ngain xinajní. Ngain tti saho joanchianguihi: “¿Jaha, quejanhi rrica ngain xinajnina?”

⁶ Co jehe ndaĉho: “Janha rrica ngain xa cien barril de aceite de oliva.” Jehe tti vaquetonha mé ndaĉho: “Ntitihi jí nota tti jitaxin. Ttinchje co jaca nchechjian iná nota jeho de cincuenta barril.”

⁷ Después, jehe tti vaquetonha mé joanchiangui ngain iná de tti jica ngain xinajni mé: “Co jaha, ¿quejanhi rrica ngain xinajnina?” Co jehe ndaĉho: “Cien medida de trigo.” Cottimeja jehe tti vaquetonha mé ndaĉho: “Ntitihi jí nota tti jitaxin. Jaha ttinchje co jaca nchechjian iná nota que setaxin jeho ochenta medida.”

8 Co jehe xinajni mé joatsoan xa que jehe tti vaquetonha ngain xé xa mé atto listo vehe para xaxaon quexén joinchehe. Ixin chojni que ditti-caonha ngain Dios icha daca para nchehe na cosa jianha, co chojni que ditticaon ngain Dios icha yao para nchehe na cosa jian.

9 Janha rritetonha ra, que ttjenguijna ra icha chojni conixin tomia ra para que chojni mé sintte amigoa ra. Co are ondatsjexin tomia ra nttihi ngataha nontte sehe quensen sayaha ra nttiha ngajni.

10 Tti chojni que dicao cuidado are tsjeha chonda, cai sicao cuidado are rrochonda tsje; co tti chojni que dicaoha cuidado are tsjeha chonda, cai sicaoha cuidado are rrochonda tsje.

11 Mexinxin si jaha ra ttjioha ra cuidado ngain tti tomi que jaha ra chonda ra ngataha nontte jianha jihi, ¿quensen rrochonda confianza nganji ra para sayehe ra tti icha rentte que jí ngajni?

12 Si jaha ra ttjioha ra cuidado ngain cosé iná chojni, Dios rrochjaha ra cosa que jiquininxin ra.

13 Xonhi ninchehe xa nchao sinchehe xé yó xinajni ngain nacoa tiempo, ixin icha sinao ná xinajni co rroningaconhe iná xinajni, o icha sitticaon ngain ná xinajni co ngain iná xa isincheha caso. Jañá cai choha sinao ni tomi co sinao ni Dios ngain nacoa tiempo.

14 Xifariseo anto vaquiaconhe xa tomi, co jehe xa tatettinhi xa cain jihi, co cjoanoa xa Jesús.

15 Cottimeja Jesús ndacho ngain xa:

—Jaha ra para ngattoxon con chojni nchehe ra que ixin atto jian ra, pero Dios chonxin ngain

ansean ra. Ixin tti tonohé chojni que anto importante cosa que jehe chonda, Dios ncheha caso ngain cosa mé.

Ley que vayé Moisés co tti ttetonha Dios

¹⁶ Hasta ngain tiempo que Juan, tti vancheguite chojni, joindache chojni de ixin Dios, ley que vayé Moisés conixin cain tti dindačo cain profeté Dios vechonda joachaxin para vaquetonhe chojni. Desde ngain tiempo mé para ndahi nchenohe na chojni tti jian joajna de ixin quexén ttetonha Dios ngain ansén chojni. Co tsje chojni anto rinao na rrochonda na parte ngain tti ttetonha Dios.

¹⁷ Pero masqui jamé icha tanguiha sitján ngaini co nontte, que tsoenha inchin jitaxin cainxin ngain ley mé.

*Jesús ndačo de ixin xí que dachjendehe čhihi
(Mt. 19.1-12; Mr. 10.1-12)*

¹⁸ Si ná xí sačhjendehe xa nčičihi xa co secáo xa iná nčí, xí mé jianha sinchehe xa ixin xí mé inchin xí que jicao ná nčí que jeha nčičihi xa. Co tti xí que después decao ná nčí que digachjendehe nča xixihi nča, xí mé cai jianha nchehe xa ixin jehe inchin xí que joantsjehe iná xí nčičihi xa.

Tti xí rico conixin Lázaro

¹⁹ Vehe ná xí rico que vaguengá xa joxon lonto rentte, co cain nchanho vaquín xa jie vandango.

²⁰ Cai vehe ná xí noa que vinhi Lázaro que vechonda xa anto tton ngain cuerpoe xa co tavaguehe xa ngandanguí nchiandoha jehe xirrico mé,

²¹ ixin jehe xinoa jihi joinao xa rrojine xa tti vaxexin vane jehe xirrico mé. Co hasta conia vaconchienne para vagoni va tton que vechonda xa ngain cuerpoe xa.

²² Ná nchanho tti xinoa mé ndavenhe co ángel de Dios sajoicao para joiguehe ngain tti jí Abraham ngain tti lugar tti ttji cain chojni jian. Cai tti rico mé ndavenhe co cjoavá na.

²³ Co are tti rico mé vetan tangui ngain infierno, jehe tsjehe para noi, co de cjin viconxin Abraham conixin Lázaro.

²⁴ Cottimeja jehe tti rico mé coyao co ndačo: “Padre Abraham, nttatsanha ñao ttiacoanoana na janha, co rroanha Lázaro para que sinchetjao masqui jeho con dedoe conixin jinda, co tsí sinchetjao neje na janha, ixin anto tangui tonna ngatte xohi jihi.”

²⁵ Pero Abraham ndačo ngain tti rico mé: “Hijo, xaxaon que jaha anto jian joarihi ngoi tiempo que jaha joarichon ngataha nontte, co Lázaro anto tangui conhe are jehe vechon nttiha. Jai jehe dayé consuelo nttihi co jaha rridetan tangui jaxon.

²⁶ Co cai jí ná tsaga anto nihnga ngayá na janha na co jaha ra. Mexinxin tti chojni que te nttihi que rinao siji para tti te ra, čhoha siji; co tti chojni que te yá čhoha tsí na nttihi tti te janha na.”

²⁷ Cottimeja ndačo tti rico mé: “Mexinxin padre Abraham, nttatsanha ñao que rroanha Lázaro para ngain nchiandoha ndodana

²⁸ tti te naho xanchian xanxí, para que sinchenohe xan quexén sinchehe xan para que jamé jehe xan tsiha xan nttihi ngain lugar jihi tti

detan ni tangui.”

²⁹ Pero Abraham ndačo ngain tti rico mé: “Xanchó chonda xan tti xón tti jitaxin tti dicjin Moisés co tti dicjin cain profeta. Si jehe xan sinchehe xan caso tti ndačo xón mé, jehe xan sijiha xa yá tti rrihi jaha.”

³⁰ Jehe tti rico mé ndačo: “Ján, padre Abraham, pero si ná chojni que ondavenhe co rrocjan tsji siquetonhe xan, ján jehe xan tsentoxinhi xan vidé xan.”

³¹ Pero Abraham ndačo ngain: “Si rinaoha xan sinchehe xan caso tti diquetonha Moisés, co tti dindačo cain profeta, cai sitticaonha xan are sicon xan ná tti ondavenhe rroxechon iná.”

17

Tti sinchenchehe ni cosa jianha

(Mt. 18.6-7, 21-22; Mr. 9.42)

¹ Jesús ndačo ngain tti chojni que vacao:

—Ngataha nontte jiji cain tiempo sehe cosa que sinchenchehe chojni tti jianha, pero janto tangui tsonhe tti chojni que sincheyehe iná chojni para sinchehe jamé!

² Icha jian si chojni mé rroguexhianito ná xochin ttosin co rroguetsingangui ndachaon, que sinchecanttjen chojni tehe ngain cosa jianha.

³ Tjiho ra cuidado jaha ra.

’Si ná chojni que ditticaon nganji na janha sinchehe jianha nganji jaha, nchesattehe; co si tsentoxinhi vidé, nchetjañehe.

⁴ Masqui chojni mé yáto nttiha sinchehe jianha nganji jaha ngain nacoa nchanho, co yáto nttiha

tsí sindattjo: “Irrocjanha na sinttaha jamé”, jaha chonda que sinchetjañehe.

Tti joachaxin que chonda chojni que ditticaon Dios

⁵ Co cain representanté Jesucristo ndačo na ngain Jesús:

—Ttjenguijna ni ra para que sitticanho na icha nganji.

⁶ Cottimeja Jesús ndačo ngain na:

—Si tti ditticaon ra jiexin rroguhe inchin ná tsehe ca dinhi mostaza, jaha ra nchao rrondache ra nttasicómoro jiha: “Jaha dačhjenguixin de yá, co sadixenga ngangui ndachaon”, co nttá yá rrojinchehe nta jamé.

Tti jiquinixin nchehe ná tti nchehe xa

⁷ Si ná de jaha ra chonda ra ná tti nchehe xa co ttixin de ngataon jngui después de joigueca yunta o joiquingaria coleco ngoixin nchanho, ¿apoco ndache ra: “xacoí darihi jintte”?

⁸ Nahi, jaha ra ndačoha ra jamé, sino que ndache ra tti nchehe xa mé: “Nchechjianna tti sine, co darihi listo sicohna cain tti sinaho are janha rrine co rridihi. Cottimeja jaha nchao sintte co sihi.”

⁹ ¿Co apoco jaha ra ndačo ra ngain tti nchehe xa mé: “Dio rrotsjengaha hna”? Nahi, ixin jehe jehojoinchehe tti jaha coetonhe jehe.

¹⁰ Jamé jaha ra cai, are tsjexin sinchehe ra cain tti ttetonha Dios, chonda ra que rrondačo ra: “Ján na ninchehe xa que xonhi rentte, ixin jointtoho na jehojoinchehe tti jaha coetonhe jehe.”

Are Jesús joinchexingamehe tte chojni que vintechonda lepra

¹¹ Are Jesús joinchehe sigue viajé para Jerusalén, jehe vatto ngain regioen Samaria co Galilea.

¹² Are joihi na chiaon ngain ná rajna, ngandehé rajna mé te tte xí que teninxin chin lepra co joi-choenxin xa Jesús ngatja nttiha pero xa icjin de jehe tavinttengattjen xa

¹³ co vinttendačo xa sén:

—¡Jesús, Maestro, ttiaconoana ni ra janha na!

¹⁴ Are Jesús vicon cain xí mé jehe ndačo ngain xa:

—Sattji ra co dicjagohe ra xidána que ixonhi chin chonda ra.

Co are satettji xí mé, chinhi xa ndavitján chin.

¹⁵ Cottimeja ná de jehe xa are vicon xa que ixonhi chin jichonda xa, sacjan xa co coyao xa co joinchecoanxinhi xa Dios.

¹⁶ Co vettoxin nttajochjihi xa ngain Jesús, co visé xa hasta tti ngataha nontte, para que joanjo xa gracias ngain Jesús. Co xí mé Samaria nonttehe xa.

¹⁷ Cottimeja ndačo Jesús:

—¿Apoco jeha tte xí que xingamehe xa de ixin chinhi xa? ¿Quettinó te tti icha xí?

¹⁸ ¿Ajeho xí jihi que joixin iná nontte tti cjan para joinchecoanxinhi Dios?

¹⁹ Cottimeja ndačo Jesús ngain xí mé:

—Dingattjen co sattji; jaha ondaxingamaha ixin vitticaonna.

Quehe tsonhe icha saho que tsí tti Xí que joixin de ngajni

(Mt. 24.23-28, 36-41)

²⁰ Cain xifariseo joanchiangui xa ngain Jesús ixin quesa tsí tti ttetonha Dios, co Jesús ndačo ngain xa:

—Are tsí tti ttetonha Dios, mé jeha cosa que nchao sicon ni.

²¹ ĉoha rrondačo ni: “Nttihi jí”, o “Nojiha jí”, ixin tti ttetonha Dios ojí ngayaha ra.

²² Cottimeja ndačo ngain tti chojni que vacao:

—Tsí tiempo are jaha ra sino ra que janha, tti Xí que joixin de ngajni, sarihi nganji ra masqui nacoa nchanho, pero janha iĉoha sarihi nganji ra.

²³ Co masqui rrondattjo ra chojni que nttihi rrihi janha o nojiha rrihi, pero jaha ra ditticaonha ra tti jehe na rrondačo na, ni ttjiha ra tti jehe na rrondačo na.

²⁴ Ixin jañá inchin dicon ni xoí rayo de ná lado hasta iná lado de ngajni, jamé tsonhe ngain mero nchanho que janha, tti Xí que joixin de ngajni, sihi iná.

²⁵ Pero saho chonda que anto tangui tsonna co chojni de ngain tiempo jiji rrondačo na ixin janha xonhi rentte na.

²⁶ Inchin conhe ngain tiempo que vechon Noé, jamé tsonhe cai are janha, tti Xí que joixin de ngajni, sihi iná.

²⁷ Ngain tiempo que Noé vechon, xonhi chojni vitticaon ixin toin ndasitján mundo, mexinxin vanchehe na sigue vane na co vaguihi na co vacottehe na co vaganjo na xenhe na xannĉí para vacottehe xan hasta ngain tti nchanho que Noé vixinhi arca co joí jinda para ndagoen cainxin chojni.

28 Jamé conhe cai ngain tiempoe Lot. Are mé cain chojni vanchehe na sigue vajine na co vaguihi na, vaquehna na co vanhecji na, vanchehe na xa ngataon jngui co vanchechjian na nchia.

29 Pero are Lot vačhjexin de ngain ciudad de Sodoma, vingoxin xohi co azufre de ngajni, co ndagoen cainxin chojni nttiha.

30 Jamé sinchehe chojni sigue de rroxxaxaonha na de ixin Dios are janha, tti Xí que joixin de ngajni, sihi iná.

31 'Ngain nchanho mé si čhonja chojni sintte ngataha nchia noi, co chonda cosé ngaxinhi nchia mé, ni rrochjeha tiempo para sania sicá cosé. Co si čhonja chojni sintte ngataon jngui, rrochjeha na tiempo para rrocjan na nchiandoha na.

32 xaxaon ra quehe conhe čihi Lot.

33 Tti chojni que rinao xonhi tsonhe vidé, mé ndasinchetján vidé, pero tti chojni que sinchetján vidé, mé rrochonda iná vida naroa.

34 'Janha rrindattjo ra, que ngain ttie mé, si yó chojni tejoa ngataha nacoa saon, ná rrochonda iná vida naroxin co ná nahi.

35 Co ngain rato mé, si yó nčí tedaho nča, ná nča sayá nča co iná nča nahi.

36 Co si yó xí tenchehe xa xa ngataon jngui, ná xa ján sayá xa co iná xa nahi.

37 Are chojni coinhi jihi, joanchiangui na ngain Jesús co ndačo na:

—¿Quettinó tsoenxin cain jihi?

Co Jesús ndačo:

—Tti sarihi janha, nttiha rroxatte chojnina.

18

Ejemploe tti ná nčhiganha co ná xijuez jianha

¹ Jesús ndache tti chojni que vacao ná ejemplo para joinchecoenhe na ixin chonda na que sinchetsenhe na ñao Dios cain tiempo co chondaha na que soan na desanimado.

² Jehe ndačho ngain na:

—Ngain ná rajna vehe ná xijuez que vechondaha xa respeto ngain Dios, ni ndosenha xa de icha chojni.

³ Ngain rajna mé vehe ná nčhiganha cai que vacji nča ngain xijuez jihi para vaganchia nča jie para ixin tti chojni que vaquetocaho nča.

⁴ Anto sé co xijuez jihi čhoha xa joinchehe xa jie ngain nčí mé, pero después řaxaon xa: “Masqui janha chondaha respeto ngain Dios ni ndosenaha de icha chojni,

⁵ pero ixin nčhiganha jihi nchehe nča sigue nchemolestá na nča, janha tsjenguijna nča para que isincheha nča sigue tsí nča co ndatsjehe nča pacienciana.”

⁶ Co Jesús ndačho:

—Jihi tti ndačho xijuez jianha.

⁷ Co ¿apoco Dios tsjenguijnaha cain tti chojni que jehe coinchiehe que nchetsenhe na ñao jehe de nchanho co de ttie? ¿Apoco jehe tsončjenhe para tsjenguijna na?

⁸ Janha rrindattjo ra ixin jehe tsončjenha de tsjenguijna cain chojni mé. Pero are janha, tti Xí que joixin de ngajni, sihi iná, ¿ařa sittja chojni que ditticaon na janha nttihi ngataha nontte?

Ejemploe xifariseo co xicobrador de impuesto

⁹ Jesús ndačo iná ejemplo para ixin tti chojni que tonohé ixin jehó tti anto jian, co řaxaon na ixin icha chojni řonhi rentte. Jesús ndačo:

¹⁰ —Yó xí cjoí xa ngain nihngo icha importante para joinchecoanxinhí xa Dios. Ná xa fariseo xa, co iná xa cobrador de impuesto xa.

¹¹ Xifariseo mé tavengattjen xa joinchecoanxinhí xa Dios, co ndačo xa janhi: “Oh Dios, janha chjaha gracias ixin janha jeha inchin canxion chojni que jehe na chehe na, co nchehe na icha cosa jianha, co chonda na tsje nčí, co janha ni jeha inchin xicobrador de impuesto jihí.

¹² Janha tocjáño na yó nttiha ngain semana, co janha danjo para ixin soixin ná tti ttexin parte de cain tti janha dacha.”

¹³ Pero xicobrador de impuesto vittohe xa cjinxin, co jehe xa ninchin tsinha con xa para rrotsjehe xa ngajni, sino que řanguí xa tton pechoe xa co ndačo xa: “¡Oh Dios, nttatsanha ñao ttiaconoana na ixin janha anto jianha jointtaha!”

¹⁴ Cottimeja Jesús ndačo:

—Janha rrindattjo ra que are xicobrador de impuesto jihí sacjan xa nchiandoha xa, Dios ojoinchetjañehe xa cain tti jianha que jehe xa joinchehe xa, pero xifariseo nahi. Ixin tti chojni que tonohé que jehó tti icha jian, pero ngain tti nchanho que Dios sinchejuzguehe cain chojni, chojni mé řonhi rentte na, co tti chojni que jai tonohé que jehe řonhi rentte, are mé Dios sinchesayehe chojni mé.

*Jesús joinchençaon xannchinnchinchjan
(Mt. 19.13-15; Mr. 10.13-16)*

¹⁵ Cai tsje chojni vaquiaho na xannchinnchinchjenhe na ngain Jesús para que vacatte xan, pero are tti chojni que vacao Jesús vicon na jihi, coexinhi na joinchesattehe na tti chojni que vaquiaho xannchinnchinchjan mé.

¹⁶ Pero Jesús ndache xannchinnchinchjan mé ixin icha tsonchienhe xan ngain co Jesús ndačo ngain chojni que vacao:

—Tančhjanda ra que xannchinnchinchjan tsí xan nganji na janha, co cayacoenha ra xan ixin tti ttetonha Dios, mé para ixin tti chojni inchin jehe xannchinnchinchjan.

¹⁷ Atto ndoa tti rrindattjo ra que tti chojni que sitticaonha tti ttetonha Dios inchin ná xannchinchjan ditticaon xan tti ttetonhe xan nindoha xan, chojni mé xonhi tiempo rrochonda parte ngain tti ttetonha Dios.

*Ná xí rico cjoao xa Jesús
(Mt. 19.16-30; Mr. 10.17-31)*

¹⁸ Ná xí importante para ngain chojni judío joanchiangui xa ngain Jesús co ndačo xa:

—Maestro, soixin que anto jian, ¿quehe icha sinttaha janha para rrochonda iná vida naroaxin que xonhi tiempo tsjexin?

¹⁹ Jesús ndačo ngain xa:

—¿Quedonda ndačo jaha que janha jian na? xonhi iná tti jian, jeho nacoaxinxon, co mé Dios.

²⁰ Jaha onoha cain mandamiento de Dios que ndačo: “Ncheyeha čihi iná chojni, dantsjeha vidé iná chojni, tteha cosé iná chojni, nichjaha cosa ndoaha de iná chojni, co ttjiho respeto ngain ndodá co ngain janná.”

21 Jehe tti xí mé ndaĉho:

—Cain yá janha rrinttaha desde are ģa nĉhín na.

22 Are coinhi Jesús jihi, jehe ndaĉho ngain xa:

—Jaha ģa nĉhetján sinchehe nacoa cosa. Nĉhecji cain tti chonda co tonĉhjejehe chojni noa tomi; jamé ngajni jaha rrochonda cosa icha rentte. Cottimeja sihi para sacjin na tti janha sacji.

23 Pero are xí mé coinhi xa jihi, anto vechín xa ixin anto rico vehe xa.

24 Are vicon Jesús ixin anto vechín xa jehe ndaĉho:

—¡Atto tangui para que chojni rico rrochonda na parte ngain tti ttetonha Dios!

25 Icha tanguiha para ixin ná cocamello sattox-inhi va ttoechjenhe ná nttachiehe manta que para chojni rico rrochonda na parte ngain tti ttetonha Dios.

26 Co cain tti nicoinhi jihi ndaĉho na:

—Mexinxin, ¿quensen nĉhao rrochonda iná vida naroaxin remé?

27 Jesús ndaĉho ngain na:

—Tti ĉhoĉa sinchehe chojni, Dios nĉhao sinchehe.

28 Pedro ndaĉho ngain Jesús:

—Janha na cointtoa na cain tti joichonda na para que jai ĉĉjin na soixin.

29 Cottimeja Jesús ndaĉho:

—Atto ndoa tti rrindattjo ra que quexeho chojni que ttinttohe nĉchiandoha, o ndodé, o janné, o xanĉó, o ĉhihi, o xenhe para sindache icha chojni de ixin queĉén ttetonha Dios ngain ansén ni,

³⁰ chojni mé ngataha nontte nttihi sayé na anto icha tsje cosa, co ngain mundo que tsí sayé na vida naroxin que xonhi tiempo tsjexin.

Jesús cjan ndačo iná ixin jehe ndasenje
(Mt. 20.17-19; Mr. 10.32-34)

³¹ Jesús joantsjenda tti tteyó chojni que vacao co ndačo ngain na:

—Jai jaha ra onoha ra que satettjin na para Jerusalén. Nttiha tti tsoenxin cainxin tti dindačo cain profeta de ixin janha, tti Xí que joixin de ngajni.

³² Chojni nttiha sanjo na na janha ngain chojni que jeha judío co jehe na tsjanao na na, co feo rronichja na de ixin janha, co tsjatjo na na nttatté na.

³³ Sicaon na janha co después nasoenxon na na. Pero ngain nchanho ninxin janha rroxechon na.

³⁴ Jehé tti tteyó chojni que vacao Jesús xonhi coinxin na de ixin jihi, ni venoeha na de ixin tti ndačo Jesús, ixin para ixin jehe na jihi ná cosa que čoha coinxin na.

Are Jesús joinchexingamehe ná tti xí que čoha vaguicon de ngain Jericó
(Mt. 20.29-34; Mr. 10.46-52)

³⁵ Are Jesús conixin tti chojni que vacao ochiaon tediji na ciudad de Jericó, ná tti xí que čoha vaguicon tají ngandehé nttiha jidanchiagaha.

³⁶ Are jehe xa coinhi xa que nttiha tedatto tsje chojni, joanchiangui xa ixin quehe conhe.

³⁷ Icha chojni ndache xa na que ixin Jesús de Nazaret jidatto nonttiha.

³⁸ Cottimeja jehe xa ndačo xa sén:

—¡Jesús, tti razé David, co tti chonda joachaxin que vechonda rey David, ttiacnoana na janha!

³⁹ Tti chojni que tetaon nttiha joinchesattehe xa para que rrotencoá xa, pero jehe xa ndačo xa icha sén:

—¡Soixin, tti razé David, co tti chonda joachaxin que vechonda rey David, ttiacnoana na janha!

⁴⁰ Cottimeja Jesús tavengattjen co coetonha para que joiaho na ngain Jesús jehe tti vaguiconha mé. Co are ojoí ngaca Jesús, jehe Jesús joanchiangui ngain jehe tti vaguiconha mé co ndačo:

⁴¹ —¿Quehe rinao sinttaha janha nganji?

Jehe tti vaguiconha mé ndačo:

—Janha rinaho que nchao sicon.

⁴² Jesús ndačo:

—¡Ján, jaha onchao dicon! Jaha oxingamaha ixin vitticaon na janha.

⁴³ Ngain rato mé jehe tti vaguiconha mé onchao vicon, co sarroé tti sacjoi Jesús, co joinchecoanxinhi Dios. Co cain chojni que vicon jihi cai joinchecoanxinhi na Dios.

19

Are Jesús vetan Zaqueo

¹ Cottimeja Jesús conixin chojni que vacao ojoigaha na ciudad de Jericó co vattogaha na ciudad mé.

² Co nttiha vehe ná xí rico vinhi Zaqueo. Xí mé vaquetonha ngain cain xicobrador de impuesto,

³ co jehe Zaqueo joinao joatsoan Jesús. Pero čhoha vicon Zaqueo Jesús ixin anto tsje chojni tettji ngaca Jesús co Zaqueo atto nchín vehe.

⁴ Cottimeja jehe Zaqueo coinga vitaon nttiha, co para que nchao vicon Jesús, jehe Zaqueo coani ngagaha ná nttá dinhi sicómoro chiaon de tti vatto Jesús.

⁵ Are Jesús vatto nonttiha, jehe tsjehe para noi tti jí Zaqueo co ndaĉho:

—Zaqueo, jaicoa danianxin de yá ixin jai janha chonda que sittona nchiandoi.

⁶ Cottimeja Zaqueo jaicoa vanianxin de nttiha co anto ché ixin Jesús cjoí nchiandoha.

⁷ Are icha chojni vicon na jihi, cain na coexinhi na nichja na feo de ixin Jesús, co ndaĉho na que ixin Jesús cjoí joiguittohe ngain nchiandoha ná xí que jinchehe jianha.

⁸ Cottimeja Zaqueo vingattjen co ndaĉho ngain Jesús:

—Tsjexinxin, soixin, janha rrochjaha chojni noa ngosinenxin de cainxin cosa que janha rri-chonda. Co si ĉhonja chojni jointtayá para coehe tomí, janha tsoncjañá chojni mé nó nttiha icha tsje que tti janha coehe.

⁹ Jesús ndaĉho ngain Zaqueo:

—Jai Dios rroanha iná vida naroa ngain xí de nchia jihi. Co jehe xa razé Abraham xa cai.

¹⁰ Ixin janha, tti Xí que joixin de ngajni, joihi para joicjé co joichjaha vida naroa tti chojni que ondavitján de ngain cosa jianha.

Ejemplo tti tte tomi que anto rentte

¹¹ Are chojni ʒa tettinhi na Jesús jindaĉho cain cosa jihi, jehe ndaĉho ná ejemplo ngain na ixin jehe ochiaon jidiji ngain Jerusalén, co jehe na

ǵaxaon na que are Jesús siji ntthi, Dios rroquex-inhi rroquetonha ntthi ngataha nontte de ixin jehe Jesús.

¹² Mexinxin jehe ndačo ngain na:

—Vehe ná xí importante que sacjoi xa cjin ngain iná nación para joigayé xa joachaxin de sehe xa rey ngain nonttehe xa, co después cjan xa ngain nonttehe xa.

¹³ Saho de sacjoixin xa de ngain nonttehe xa jehe xa vayé xa tte de ninchehe ǵé xa para joanjo xa ngain cada na naná tomi que anto rentte, co ndačo xa ngain na: “Nchehe ra negocio conixin tomi jiji hasta que janha rrocjan na sihi.”

¹⁴ Pero chojni de ngain nonttehe xa ntthi va-coñaon na ngain xa, co rroanha na chojni para joicao na joajna jiji: “Rinaoha na que xí jiji sehe xa rey para ixin janha na.”

¹⁵ Pero jehe xa vayé xa joachaxin de vehe xa rey, co cjan xa para nonttehe xa. Co are jehe xa ongain nonttehe xa, vayé xa tti tte chojni que joinchegayé xa tomi para conohe xa quejanhi joacha na cada na.

¹⁶ Tti saho conchienne co ndačo: “Tti ná tomia que soixin chjana joacha tomi, itte tomi.”

¹⁷ Jehe rey mé ndačo: “Atto nchao jí; jaha atto jian ná ninchehe ǵa. Jaha cjo jian ninchehe ǵa de ngain tti tomi que chjaha masqui tsjeha, mexinxin jai janha rrochjaha joachaxin de tsetonhe tte rajna.”

¹⁸ Cottimeja conchienne iná co ndačo: “Tti ná tomia que soixin chjana joacha tomi, inaho tomi.”

¹⁹ Cai ngain chojni jiji ndačo rey mé: “Jaha tsetonhe naho rajna.”

²⁰ Cottimeja conchienne iná co ndačo: “Nttihi jí tomia que chjana soixin. Janha coenchjinha tomi ngá ná paníto

²¹ ixin janha xagonha soixin ixin soixin ná xí que atto soji de ngain ansén, que dantsjehe chojni tti soixin danjoha, co jamé tsinhi cosecha de tti soixin ttengaha.”

²² Cottimeja rey mé ndačo: “Jaha jianha ninchehe xa ixin jaho ndačo que ixin janha soji ansenna. Si onoha que janha soji na de ngain ansenna, co ixin dantsjá chojni tti janha danjoha co jamé janha ttjejo cosecha de tti janha ttengaha,

²³ mexinxin ¿quedonda joicanha jaha tomina ngain ná banco para que janha rrogayá tomina conixin tti rrogacha tomi are janha rrocjan na nchiania?”

²⁴ Co ndačo rey mé ngain tti chojni que te nttiha: “Dantsjehe ra xa tomi co danjo ra tomi ngain xí que chonda tte tomi.”

²⁵ Co jehe na ndačo na: “Pero chojni mé ochonda tti tte tomi.”

²⁶ Rey mé ndačo: “Janha rrondattjo ra que tti chojni que ochonda, sayé icha, pero tti chojni que xonhi chonda sachjehe hasta tti nchion que chonda.

²⁷ Co cain tti chojni que ningaonna, que mé joinaoha na para que janha rrogarihi rey ngain na, sicohna ra na nttihi co nadoenxon ra na ngat-toxon con janha.”

Are Jesús joigaha ciudad de Jerusalén

(Mt. 21.1-11; Mr. 11.1-11; Jn. 12.12-19)

²⁸ Después de ndačo Jesús cain jiji, jehe joinchehe sigue sacjoi para Jerusalén.

²⁹ Are ochian joiiji na ngain rajna Betfagé co Betania, chiaon ngain tti jnanchjan que dinhi Nt-taolivo, Jesús rroanha yó de tti chojni que vacao,
³⁰ co jehe ndačo ngain tti yó chojni mé:

—Ttji ra ngain rajnanchjan que jí chiaon jiha, co are saso ra nttiha sinchí ra ná colochochjan jíchoa va nttiha que xa xonhi chojni diguinttetaha va. Tonxindanguehe ra va co sicó ra va.

³¹ Co si čhonja chojni sanchianguiha ra ixin quedonda tetonxindanguehe ra va, jaha ra ndačo ra que janha, tti chonda cain joachaxin, rrogondana va.

³² Jamé, savinttecji cayoi chojni mé, co jamé conhe inchin ndačo Jesús.

³³ Co are otetonxindanguehe na colochochjan mé, nicolochohe joanchiangui na co ndačo na:

—¿Quedonda tetonxindanguehe ra colochochjan yá?

³⁴ Tti yó chojni mé ndačo na:

—Ixin ximaestrona na sondehe xa va.

³⁵ Jamé sajoicao na va hasta tti ngain Jesús, co nttiha jehe na cjoajinhi na va tti manta que tetsá na co joinchetaha na Jesús jehe colochochjan mé.

³⁶ Are Jesús conchian para ngagaha ciudad de Jerusalén, chojni coingo na tti manta que tetsá na para coingachjetaha colochochjan mé.

³⁷ Co are ochian tediji na para sania na tti jnanchjan de Nttaolivo, cain chojni que terroé nttiha que vitticaon na Jesús, coexinhi na coyao na ixin anto ché na co joinchecoanxinhi na Dios de ixin anto tsje milagro vicon na joinchehe Jesús.

³⁸ Co ndačo na:

—¡Anto jian tti Rey que joí conixin nombré Dios!
¡Anto ĉhjoin tonohe cain ángel ngajni! ¡Gloria ngain Dios!

³⁹ Cottimeja canxion xifariseo que te nttiha ngayé chojni mé vinttendaĉho xa ngain Jesús:

—Maestro, nchesattehe chojnia tehe.

⁴⁰ Pero Jesús ndaĉho ngain xa:

—Janha rrondattjo ra que si chojni tehe rroten-coa na, ĉo tsoyao ĉo.

⁴¹ Are Jesús joiĉi chiaon de Jerusalén, are jehe vicon ciudad mé jehe tsjangaxin ciudad mé,

⁴² co ndaĉho ngain:

—¡Si chojni de nganĉi jaha rroquinxin na jai jehe tti joichjaha na tti ĉhjoin de ngain ansén na! Pero jai, mé tavema, co ĉhoha tsinxin na.

⁴³ Tsí nchanho anto tangui para ixin chojnia. Are mé chojni que ningaconhe na sinchechĉian na ttjarioho ngoixin ngandanĉi jaha, ciudad Jerusalén, co ngoixin ngandanĉi jaha sinttendanĉi na, co cain lado sixinttexin na ngain chojnia para soen na na.

⁴⁴ Co chojni que ningaconhe chojnia sacha ngain chojnia. Nasoenxon na cain chojni que te nganĉi, co tsinttoeha na nganĉi jaha ni ná ĉo ngataha iná ĉo. Jamé tsonhe ixin chojnia joincheha na caso tti rato que Dios joí joitsjehe na.

*Are Jesús joincheroa nihngo icha importante
(Mt. 21.12-17; Mr. 11.15-19; Jn. 2.13-22)*

⁴⁵ Cottimeja joixinhi Jesús nihngo icha importante co venguixin de nttiha cain chojni que tencheĉi co tettehna.

⁴⁶ Co ndaĉho ngain na:

—Ngain tti jitaxin Palabré Dios ndačho: “Nchiania para sinchecoanxinhi na Dios.” Pero jaha ra ndadinchechjian ra nchia cueva tti xatte tti chehe.

⁴⁷ Cain nchanho que Jesús vehe ngain Jerusalén, ngaxinhi nihngo mé vanchecoenxin chojni de ixin Dios. Pero cain xidána que vaquetonha ngain icha xidána, co cain ximaestroey ley, co cain xivaquetonha ngain ciudad mé cjoé xa quexén sinchehe xa para nasoenxon xa Jesús.

⁴⁸ Pero čhoha joinchehe xa jamé ixin cainxin chojni tatettinhi na tti jinichja Jesús.

20

Tti joachaxin que chonda Jesús (Mt. 21.23-27; Mr. 11.27-33)

¹ Ná nchanho Jesús tají ngaxinhi nihngo icha importante para jinchecoenhe chojni de ixin Dios, co jindache na tti jian joajna are vintteguiji canxion xidána que vaquetonha ngain icha xidána, canxion ximaestroey ley, co canxion xí que chonda joachaxin ngain nihngo mé.

² Co vinttendačho xa ngain Jesús:

—Ndachjenji ni ra quehe joachaxin chonda jaha para nchehe cain cosa jihi. ¿Quensen chjá joachaxin jihi?

³ Cottimeja ndačho Jesús ngain xa:

—Janha cai sanchianguiha ra ná cosa. Co rrondachjenji ni ra:

⁴ ¿Quensen rroanha Juan para joincheguite chojni? ¿A Dios o ani chojni?

⁵ Pero coexinhi xa joanchianguihi chó xa co ndačho xa:

—¿Quehe rrondačo na? Si rrondačo na que Dios tti rroanha Juan, jehe rrondattjo na: “¿Que-donda vitticaonha ra remé?”

⁶ Co si rrondačo na que chojni tti rroanha Juan, cainxin chojni nasoenson na ján na de ixin xo ixin jehe na chonda na seguro que Juan vanichja joajna que vagayé de ngain Dios.

⁷ Co jehe xa vinttendačo xa ixin noeha xa quensen rroanha Juan para joincheguitte chojni.

⁸ Cottimeja ndačo Jesús ngain xa:

—Cai janha rrondattjoha ra quehe joachaxin nttaxin janha cain cosa jihi.

Ejemploe ninchehe xa jianha

(Mt. 21.33-44; Mr. 12.1-11)

⁹ Cottimeja coexinhi Jesús nichjé chojni, co ndačo ngain na ejemplo jihi:

—Vehe ná xí que cjoenga xa ná jngui de nttauva co después joanjo xa nttattochjoin media ngain canxion tti nchehe xa co jehe xa sacjoixin xa de nttiha para tsje tiempo.

¹⁰ Co are ojoí tiempo de cosecha, jehe xa rroanha xa ná tti nchehe xé xa para joiganchia tti parte de cosecha que jiquininxin sayé tti xinajni mé. Pero jehe tti nicoá nttattochjoin media mé coaxin na tti nchehe xa mé nttá co vengui na co xonhi chjé na.

¹¹ Cottimeja xinajni mé rroanha xa iná tti nchehe xé xa pero cai tti nicoá nttattochjoin media nichja na feo ngain tti nchehe xa mé co coaxin na nttá co vengui na co xonhi chjé na.

¹² Xinajni mé cjan xa rroanha xa iná tti nchehe xa, pero cai joinchenihi na tti nchehe xa mé co vengui na co xonhi chjé na.

13 'Cottimeja xinajni mé nda'cho xa: “¿Quehe sinttaha? Janha rrorroanha tti xanhna que janha anto rinaho. Are jehe na sicon na xanhna jihi puede rrochonda na respeto ngain xan.”

14 Pero are jehe na vicon na xan, ndache chó na: “Xan jihi xan sayé ngoi nontte jihi inchin herencia, mexinxin nasoenxon na xan para que ján na sittoá na cain.”

15 Cottimeja joantsjegaxin na xan de nttauva mé co nagoenxon na xan.

Cottimeja joanchiangui Jesús ngain chojni co nda'cho:

—¿Quehe sinchehe xinajni mé ngain tti chojni que vittoehe jnguihi xa?

16 Jehe xa tsí xa co nasoenxon xa chojni mé co sanjo xa jnguihi xa ngain ojé chojni.

Are vinttequinhi chojni jihi, vinttenda'cho na:

—¡Que Dios sanjoha joachaxin yá!

17 Pero Jesús tsjehe ngain jehe na co nda'cho:

—Mexinxin, ¿quehe rro'cho tti jitaxin ngain Pal-abré Dios? Nttiha nda'cho:

Tti xo que joinchegondaha xittette nchia,

xo mé tti xo joiguehe icha importante.

18 Quexeho chojni que tsonntenguixin xo jihi, tsonchjian pedazo cuerpoe na. Co si xo jihi setsinga xo ngataha ná chojni, chojni mé rrocjan cuerpoe polvo.

Tti roxenga hna ngain impuesto

(Mt. 21.45-46; 22.15-22; Mr. 12.12-17)

19 Cainxin xidána que vaquetonha ngain icha xidána co ximaestroey ley nttiha joinao xa rrotse xa Jesús ngain rato mé ixin coinxin xa que ixin

ejemplo jiji rrocho de ixin jehe xa. Pero xagoen xa cain chojni.

²⁰ Mexinxin rroanha xa canxion xí que tsaya ngain Jesús co xí mé vanchehe xa que ixin jehe xa anto jian xa para que rrojinchenichja xa Jesús ná cosa nchaoha para nchao rrocjanguihi xa Jesús ngain xigobernador.

²¹ Mexinxin joanchiangui xa ngain Jesús co ndacho xa:

—Maestro, janha na nona na que soixin nichja co nchecoene chojni tti ndoa, co ncheha juzgado chojni rico oje que chojni noa, sino que soixin ndoa nchecoene na de ixin tti rinao Dios.

²² Ndachjenji ni ra: ¿Anchao jí tsjenga na hna impuesto ngain xiemperador, o ani nahi?

²³ Pero Jesús oconohe de tti jianha que jehe xa teŕaxaon xa de ixin jehe, co jehe ndacho ngain xa:

—¿Quedonda rinao ra sincheyana ni ra?

²⁴ Tjagohna ni ra ná tomi. ¿Quensen con jinganito jiji, co quensen nombré jitaxin jiji?

Jehe xa vinttendacho xa:

—Con xiemperador co nombré xa.

²⁵ Cottimeja ndacho Jesús ngain xa:

—Mexinxin chjehe ra xiemperador tti jiquininxin xa, co danjo ra ngain Dios tti jiquininxin sayé jehe.

²⁶ Co jamé choha joinchenichja xa Jesús ni ná cosa nchaoha; sino que vinttegoan xa admirado de ixin tti ndacho jehe co jamé ndavinttetencia xa.

Canxion chojni joanchiangui quexén rroxechon ni

(Mt. 22.23-33; Mr. 12.18-27)

²⁷ Después de cain jihu canxion xisaduceo vinttecji xa ngain Jesús. Xisaduceo vaguitticaon xa que chojni que ndadenhe irroxechonha na; mexinxin ndačo xa ngain Jesús:

²⁸ —Maestro, ley que vayé Moisés jitaxin que si ná xí ndadenhe xa co sittohe čihi xa co si xonhi chjan joichonda na, xichó xindavenhe chonda xa que secoa xa jehe nchiganha mé co rrochonda na chjan para que chjan mé sehe xan inchin xenhe tti ndavenhe.

²⁹ Nchao remé; vintte yáto xí, chó xa. Xisaho vecao xa nchičihi xa pero ndavenhe xa co xonhi chjan cointtohe xa.

³⁰ Xiyoxin vecao xa jehe nchiganha mé, pero cai ndavenhe xa co xonhi chjan cointtohe xa ngain nchiganha mé.

³¹ Cottimeja xinixin vecao xa jehe nchiganha mé pero xajeho jamé conhe xa. Co jamé hasta tti yatoxin xa ndavenhe xa cai co xonhi chjan cointtohe xa ngain nchiganha mé.

³² Co después ndavenhe nchiganha mé cai.

³³ Mexinxin are rroxechon na, ¿Quexehe de tti yáto xí mé sehe mero xixihi jehe nchí mé, ixin cain xa vinttecao xa nchí mé?

³⁴ Cottimeja ndačo Jesús ngain xa:

—Ngain mundo jihu, xí co nchí tottehe na.

³⁵ Pero tti chojni que tequinixin tsji para ngajni co rroxechonxin na de tti ndavenhe na, nttiha ni tsotteha na, ni sanjoha na xenhe na para tsottehe xan

³⁶ ixin nttiha ichoha ndasenhe na. Are mé sintte na inchin ángel de Dios co sintte na xenhe Dios ixin Dios tti sinchexechon na.

³⁷ Hasta ngain tti parte que coentaxin Moisés ixin vicon xohi ngagaha canchaha, jehe mismo jointtanoa na que ixin chojni que ndadenhe rroxechon na. Nttiha ndaço que Dios, Dios de Abraham, co Isaac, co Jacob.

³⁸ Pero Dios jeha Dios de nindadiguenhe, sino que Dios de tti nitechon. Co mé rroço que para ixin Dios cain chojni techon na.

³⁹ Cottimeja cainxin ximaestroe ley vinttendaço xa:

—Nchao ndaço, Maestro.

⁴⁰ Co icjanha xa joanchiangui xa icha ngain Jesús.

Tti dindaço David de ixin Jesucristo

(Mt. 22.41-46; Mr. 12.35-37)

⁴¹ Jesús ndaço ngain na:

—¿Quexén ndaçoixin chojni que ixin Cristo ná xanntí David?

⁴² Ixin David mismo dindaço janhi ngain libroe Salmo:

Tti Ttetonha cainxin cosa ndaço ngain tti Ttetonna janha:

“Darihi ngain lado jian na,

⁴³ hasta que janha sinttagacha jaha de ngain cain tti ningaçonha.”

⁴⁴ ¿Pero quexén que Cristo jehe ná xanntí David, si David mismo ndaço ixin Cristo tti Ttetonha ngain jehe?

Are Jesús joinchesattehe ximaestroe ley

(Mt. 23.1-36; Mr. 12.38-40; Lc. 11.37-54)

⁴⁵ Cainxin chojni nttiha tatettinhi na are Jesús ndaço janhi ngain tti chojni que vacao:

⁴⁶ —Ttjiho ra cuidado de ncheha ra inchin nchehe ximaestroey ley ixin jehe xa ncheħoxinhi xa ċhi ja xa conixin lontto icha jinjini, co rinao xa que chojni sanjo na joajna ngain xa conixin anto tsje respeto are ngain ndásin, co are ngaxinhi nihngo jehe xa ttjé xa tti nttaxintaon icha importante para dinttetaha xa, co are ttji xa dijine xa jehe xa rinao xa tti icha jian lugar ngain mesa.

⁴⁷ Cai dantsjehe xa nċhiganha nchiandoha nċha ixin ittixinha nċha ttjenga nċha hna contribución, co para ċonhi chojni rroħaxaon tti jianha que nchehe xa, jehe xa nchecoanxinhi xa Dios anto sé. Cain jehe xa xisayé icha soji castigo.

21

*Tomi que joanjo ná nċhiganha noa
(Mr. 12.41-44)*

¹ Ngain nihngo icha importante nttiha vicon Jesús queħén tettinttohe cain chojni rico tomi ngá cajé alcancia.

² Cai vicon Jesús ná nċhiganha noa que vancá nċha nttiha yó centavochjan.

³ Co ndaċho Jesús:

—Janha ndoa tti rrondattjo ra que nċhiganha noa jihi joanjo nċha icha tsje que cain chojni.

⁴ Ixin cain chojni danjo na tti xehe na, pero jehe nċha, masqui noa nċha, joanjo nċha cainxin tomi que jehe nċha jichonda nċha.

*Jesús ndaċho que rroxantte nihngo icha importante
(Mt. 24.1-2; Mr. 13.1-2)*

⁵ Canxion de tti chojni que vacao Jesús tetjao na de ixin nihngo icha importante co ixin anto čhjoin řo que diconchjian nihngo mé co de icha cosa que chojni diganjo na para ixin nihngo. Cottimeja Jesús ndačo ngain na:

⁶—Tsí nchanho que cain tti jaha ra tedicon ra yá rroxantte, co ni ná řo sittoeha ngataha iná řo.

*Tti tsonhe icha saho que mundo ndatsjexin
(Mt. 24.3-28; Mr. 13.3-23)*

⁷ Cottimeja joanchianguihi na Jesús co ndačo na:

—Maestro, ¿quesa siconhe jihi? ¿Quehe señal rrořago ixin cain cosa jihi osiconhe?

⁸ Jesús ndačo:

—Ttjiho ra cuidado que řonhi chojni sinttayaha ra. Ixin atto tsje chojni tsí co sinchegonda na nombrena rrondačo na: “Janha tti Cristo na”, co “Jai mero tiempo que mundo ndatsjexin.” Pero jaha ra ditticaonha ra mé.

⁹ Co are tsinhi ra ixin jí guerra co ixin tettetocaho chojni gobiernoe na, jaha ra řaonha ra ixin jihi chonda que tsonhe saho, pero řa jeha tiempo para ondatsjexin mundo.

¹⁰ Jesús joinchehe sigue ndačo ngain na:

—Ná nación tsetocaho iná nación, co ná región tsetocaho iná región.

¹¹ Tsje parte tsingui nontte anto soji, co sehe jintta co chin ngain tsje parte, co ngajni sicon ni cosa que sincheřaon ni, co anto tsje señal importante sicon ni.

¹² Pero saho de cain jihi, chojni rrotse ra na jaha ra co feo sinchehe na nganji ra. Tsjiho ra na para que soan ra juzgado ngain nihngo, co tsiaxinha ra

na ngain cárcel co tsjiho ra na ngain rey co ngain xigobernador de ixin causananxin janha.

¹³ Cain jihi rrochondaxin ra oportunidad de rronichja ra de ixin janha.

¹⁴ Co are tsonha ra mé, xaxaonha ra icha saho de ixin quexén rrondačo ra ngain cain tti tsjiho ra na.

¹⁵ Ixin janha tti rrochjaha ra palabra jian que rrondačo ra co sinttanoaha ra jian, para que ni ná chojni que ningaonha ra tsixinha na nganji ra, sino que jehe na sitticaon na tti jaha ra rrondačo ra.

¹⁶ Pero jaha ra hasta jeho ndodá ra, xanchó ra, niparientea ra, co xiamigoa ra; chojni mé sinttachianha ra na ngá rá niningaonha ra. Co nasoenxon na čhonja de jaha ra,

¹⁷ co ngoixin mundo rroningaonha ra chojni de ixin causananxin janha.

¹⁸ Pero masqui jamé, sitjanha ni ná xajá ra ixin vidá ra sehe seguro ngain Dios.

¹⁹ Si cainxin tiempo jaha ra seguro sitticaon ni ra, rrochonda ra iná vida naroaxin.

²⁰ 'Are sicon ra que ciudad de Jerusalén ngoixin sixindanji xisoldado, jaha ra onoha ra que are mé orroxante.

²¹ Mexinxin are mé tti chojni que te Judea rrochonda na que satsinga na para ngagaha jna. Co tti nite ngain ciudad de Jerusalén rrochonda na que satsingaxin na de ntthi. Co tti nisinte ngataon jngui are mé, rrochjaha na tiempo para rrocjan na ngain ciudad mé.

²² Ixin nchanho mé nchanho de castigo, are tsonhe cain tti jitaxin ngain Palabré Dios.

²³ ¡Anto tangui para ixin tti nčhí que sintteyá chjan ngain nchanho mé o tti rrochonda chjan que řa tetai xan! Ixin are mé atto tangui tsonhe chojni nttihi ngataha nontte, co mé ná castigo anto soji para ixin nación Israel jihi.

²⁴ Are mé čhonja chojni nasoexon na ngain guerra co icha de chojni mé rrotse na na co tsia na na co jamé sacao na na ngoixin región. Co chojni de iná nación sinchehe na inchin sinoa na ngain ciudad de Jerusalén hasta que tsjexin tti tiempo que sayé na joachaxin de sinchehe na jamé.

*Quexén tsí tti Xí que joixin de ngajni
(Mt. 24.29-35, 42-44; Mr. 13.24-37)*

²⁵ 'Cottimeja sehe señal ngain nchanho co ngain conittjao co ngain conotse. Co nttihi ngataha nontte cainxin chojni rrořaon na ixin anto soji sařoin ndachaon ixin anto soji rrocjamanguiataon chó nda.

²⁶ Chojni ndatsonttiehe na de ixin joařaon are rrořaxaon na ixin quehe siconhe ngain mundo jihi, ixin hasta cainxin cosa que jí ngajni rrořanga.

²⁷ Cottimeja sicon na na janha, tti Xí que joixin de ngajni, sihi are mé ngacjan ná ttjoì conixin joachaxin co gloria.

²⁸ Are tsexinhi tsonhe cain cosa jihi, jaha ra řo řa sinttechon ra, doan ra animado co tsjehe ra para ngajni ixin are mé janha atto toin sihi para tsjenguijna ra co isetanha ra cain cosa tangui mé.

²⁹ Cai ndačo Jesús ngain na ejemplo jihi:

—Āřaxaon ra ngain nttahigo, o quexeho nttá.

³⁰ Are sicon ra que oĉhinhi cachjenhe nttá, jaha ra mismo onoha ra que ojoiconchian tiempoe ĉhin.

³¹ Jamé cai are sicon ra que tsonhe cain cosa jihi, jaha ra onoha ra que osiconchian tiempo are siquetonha Dios nttihí ngataha nontte.

³² 'Janha ndoa tti rrindattjo ra que cain jihi tsonhe saho que ndasenhe chojni de ngain generación jihi.

³³ Masqui ngajni co nontte ndatsjexin, pero tti janha ndaĉhjan chonda que tsonhe.

³⁴ 'Ttjiho ra cuidado que tsojija ansean ra de ixin vicio, inchin tti rrocoan ra co cain problema de ngain vida jihi, para que ngain nchanho mé rroĉaonha ra

³⁵ inchin are coxigo ĉaon va are ngain trampa que anto daca dijé, ixin jañá tsí nchanho mé ngain cainxin chojni ngoixin mundo.

³⁶ Mexinxin jaha ra dintte ra listo, co cainxin tiempo nchecoanxinhi ra Dios para que ĉonhi tsonha ra de ngain cain cosa que siconhe, co para que are mé nchao tsonchienne ra nganji na janha, tti Xí que joixin de ngajni.

³⁷ Ngain tiempo jihi, are nchanho, Jesús vanchecoenhe chojni de ixin Dios ngain nihngo icha importante, co are ttie jehe savacji para vaguittohe ngagaha tti jnanchjan que dinhi Nttaolivo.

³⁸ Co cada nchanho ndoyo vaconchienne chojni ngain nihngo mé para vaquinhi na tti vandaĉo Jesús.

22

Are cjoao na quexén sinchehe na para rrotse na Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

¹ Co are Jesús x̄a tají nttiha ngain Jerusalén, ochiaon joí tti quiai que jine na niottja que chondaha levadura, co mé tti quiai que dinhi pascua.

² Ngain tiempo mé merocoa cain chojni anto vanchexoxinhi na tti vandačo Jesús. Mexinxin cain xidána que vaquetonha ngain icha xidána, co cain ximaestroe ley vañaon xa ngain cain chojni mé para que jehe xa nasoenxon xa Jesús; mexinxin jehe xa vacjé xa quexén sinchehe xa para tsjaya xa co chojni tsoñaoha na.

³ Cottimeja Satanás joixinhi ngain ansén Judas Iscariote, jehe ná de tti tteyó chojni que vacao Jesús.

⁴ Co Judas jiji cjoí joitsjehe xidána que vaquetonha ngain icha xidána, co xipolicié nihngo icha importante, para cjoao xa de ixin quexén jehe tsjago ttinó jí Jesús para sitse xa.

⁵ Cain jehe xa anto vintteché xa co ndačo xa ixin sanjo xa tomi ngain jehe Judas.

⁶ Co Judas vittoexin co ocoexinhi x̄axaon ixin quexén sinchehe para que sinchecienhe Jesús ngá rá xa are x̄onhi chojni sintte ngain Jesús.

*Are joinecaho Jesús tti tteyó chojni que vacao
(Mt. 26.17-29; Mr. 14.12-25; Jn. 13.21-30; 1 Co. 11.23-26)*

⁷ Are joí tti nchanho de quiai que dinhi pascua are vagoen na coleco para vaganjo na ngain Dios.

⁸ Ngain nchanho mé Jesús rroanha Pedro co Juan co jehe ndačo ngain na:

—Ttji ra dinchechjian ra tti sontte na ngain quiai pascua jihi.

⁹ Jehe na ndačo na ngain Jesús:

—¿Ttinó rinao sinttachjianxin na?

¹⁰ Jesús ndačo ngain na:

—Are jaha ra sigaha ra ciudad jihi, setan ra ná xí que jidicao ná nchíxa de jinda. Roehe ra xí mé hasta tti ngain nchia que jehe xa sixinhi xa

¹¹ co ndache ra tti nchiandoha nttiha: “Ximae-stro ndačo xa nganji: ¿Quettinó jí tti cuarto que jehe xa sinenxin xa ngain quiai pascua conixin tti tteyó chojni que xicao xa?

¹² Cottimeja jehe tti ndoha mé tsjagoha ra ná cuarto jie ngain piso yoxin que ojí listo. Nttiha nchechjianxin ra tti sontte na.

¹³ Cayoi chojni mé savinttecji na co vittja na cain inchin ndačo Jesús. Co nttiha joinchechjianxin na tti joinecaho na Jesús ngain quiai pascua.

¹⁴ Are ovittja hora para joine na, Jesús conixin tti tteyó representanté vintte na ngain mesa.

¹⁵ Cottimeja Jesús ndačo ngain na:

—¡Janha anto joinaho joine conixin jaha ra ngain quiai pascua jihi saho que janha ndasenne na!

¹⁶ Janha rrindattjo ra seguro que rrocjanha na sinttasayá quiai pascua hasta que cain tti rročo quiai jihi tsoenja ngain tti ttetonha Dios.

¹⁷ Cottimeja cóá ná vaso de vino co joanjo gracias ngain Dios, co ndačo ngain na:

—Dihi ra jihi co tonchjeyehe chó ra,

¹⁸ ixin janha irrocjanha na sihi vino hasta que tsija tti ttetonha Dios.

19 Después coá niottja co joanjo gracias ngain Dios, cottimeja váña nio co joanjo nio ngain jehe na co ndaĉho:

—Jihi rroĉho cuerpona janha que rroĉanjo para ndasenhe para tsjenguijna ra. Cain tiempo nchehe ra janhi para rroĉaxaonxin ni ra.

20 Cai jamé joinchehe conixin vaso de vino are ojoexin joine na co ndaĉho:

—Vaso jihi rroĉho tti trato naroxin que jnina sinchese gurá. Co jnina mé singo jni para que tsjenguijna ra.

21 'Pero jaxon rá tti xí que rrondache chojni queĉén para rrotse na na janha, rá xí mé nttihi jí ngataha mesa conixin rana janha.

22 Janha chonda que senhe na inchin jiquin-inxin, pero janto tangui tsonhe tti rrondache chojni queĉén para rrotse na na!

23 Cottimeja tti tteyó chojni que vacao Jesús coexinhi na joanchianguihi chó na ixin quexehe tti rrondache chojni queĉén para rrotse na Jesús.

Are joinchediscutí na ixin quensen sehe icha importante

24 Cottimeja joinchediscutí na ixin quexehe de jehe na tti sehe icha importante ngain tti ttetonha Dios.

25 Pero Jesús ndaĉho ngain na:

—Ngain mundo jihi, cain rey de cain nación, jehe ttetonha inchin jehe rinao, co cain xí que chonda cargo de ngain cain nación, dinhi xa xí que nchehe jian.

26 Pero jaha ra chondaha ra que sintte ra jamé, ixin tti sehe icha importante ngayaha ra, pero mé chonda que sehe inchin tti icha nchín. Co

tti tsetonha ngayaha ra, mé tti chonda que icha tsjenguijna ra.

²⁷ Ndachjenji ni ra, ¿quensen icha importante, a tti dehe jine ngain mesa, o ani tti nchehe xa que diquenhe jehe tti jine ngain mesa? Seguro jehe tti jí ngain mesa, mé tti icha importante. Pero janha rrihi nttihi ngayaha ra inchin ná tti nchehe xa.

²⁸ Jaha ra tti vintte ra cainxin tiempo nganji na janha are janha vetan tangui.

²⁹ Mexinxin janha rrichjaha ra ná joachaxin para que jaha ra tsetonha ra, jañá inchin joachaxin que chjana Ntodana janha,

³⁰ para que sintte ra co sihi ra ngain mesana nttiha tti janha ttetonha, co sintte ra ngain lugar de joachaxin para sinchejuzguehe ra tti tteyó grupoe chojni Israel.

Jesús ndačo que Pedro rrondačo ixin jehe chonxinha Jesús

(Mt. 26.31-35; Mr. 14.27-31; Jn. 13.36-38)

³¹ Ndačo Jesús cai:

—Simón, Simón, tsjenxin; Satanás danchia joachaxin para que tsontsjenga ra jaha ra como si rrocji ra trigo.

³² Pero janha rrinttatsán ñao Dios para ixin jaha, para que xonhi tiempo rrotjañaha tti jaha ditti-caon. Co jaha are sačhaha joaxaon, ttjenguijna icha chojni que ditticaon para que sitticaon na jian cainxin tiempo.

³³ Simón Pedro ndačo ngain Jesús:

—Janha rinaho tsji cain lugar conixin soixin, masqui siaxinna conixin soixin o hasta tti senxin soixin cai janha nttiha senxin na.

³⁴ Jesús ndačo ngain Pedro:

—Pedro, janha rrindattjo que jai mismo icha saho que rrotsje conttaxichia, jaha orrondačo ninxin nttiha que chonxinha na.

Are ojoí tiempo que Jesús tangui conhe

³⁵ Cottimeja Jesús joanchiangui ngain tti chojni que vacao co ndačo:

—Are janha coetonha ra para joindache ra chojni de ixin Dios, co ixin cjoioha ra ni bolsa, ni tomi, ni catte, ¿açonja gondaha ra?

Jehe na ndačo na:

—Nahi, xonhi.

³⁶ Cottimeja ndačo Jesús ngain na:

—Co jai jeha jamé, xo chonda ra bolsa, ttjiho ra, co cai tomi; co xo chondaha ra espada nhecji ra chamarrá ra para ttenanxin ra espada.

³⁷ Ixin janha rrindattjo ra que chonda que siconna janha inchin jitaxin Palabré Dios: “Jehe venhe inchin chojni que nchehe jianha.” Ixin cain tti jitaxin de ixin janha chonda que tsonhe.

³⁸ Cottimeja jehe na vinttendačo na:

—Nttihi jí yó espada.

Co Jesús ndačo:

—Conixin yao.

Are Jesús joinchetsenhe ñao Dios ngain Getsemani

(Mt. 26.36-46; Mr. 14.32-42)

³⁹ Cottimeja vaçhje Jesús co inchin costumbre que jehe vanchehe, jehe sacjoi para ngagaha tti jnanchjan de Nttaolivo, co rroé tti chojni que vacao.

⁴⁰ Co are ojoiji na nttiha, jehe ndačo ngain na:

—Nchetsenhe ra ñao Dios para que sitaha ra de sinchehe ra cosa jianha.

⁴¹ Cottimeja Jesús sacjoi nchion cjin de ngain na, inchin cjinxin ttixinhi ni de tja ni ná ʒo, co nttiha vettoxin nttajochjihi para joinchetsenhe ñao Dios.

⁴² Co jehe ndačo:

—Padre, si rinao, tančhjandaha na para que janha sattoha ngain tti anto tangui que tsonna, pero tsoenha inchin janha rinaho, sino que tsonhe inchin soixin rinao.

⁴³ Cottimeja joicononxin ná ángel de Dios ngain Jesús para que joinchesoji espiritue Jesús.

⁴⁴ Co ixin jehe icha tangui conohe ngain ansén, jehe icha jian joinchetsenhe ñao Dios co ndachjín cjan inchin jni, co yeye gota vinttji ngataha nontte.

⁴⁵ Co are joexin joinchetsenhe ñao Dios, vingatjen co cjoí ngain tti chojni que vacao; co jehe na otatejoa na ixin icoixinha na de joachjaon.

⁴⁶ Cottimeja jehe ndačo ngain na:

—¿Quedonda tatečhin ra? Dingattjen ra, co nchetsenhe ra ñao Dios para que sitaha ra de sinchehe ra cosa jianha.

Are tse na Jesús

(Mt. 26.47-56; Mr. 14.43-50; Jn. 18.2-11)

⁴⁷ Jesús ʒa jinichja jañá are ojoí anto tsje chojni. Tti vinhi Judas, jehe ná de tti tteyó chojni que vacao Jesús, jehe mé tti jitaon nttiha de cainxin chojni mé, co are ojoí, jehe conchienhe ngaca Jesús para coetoxin.

⁴⁸ Cottimeja Jesús ndačo ngain Judas:

—Judas ʒacoetoxin na para cjoago ixin janha tti Xí que joixin de ngajni?

49 Co tti icha chojni que vacao Jesús, are vicon na jiji, ndačo na ngain Jesús:

—¿Atsjaya na conixin espada?

50 Co ná de chojni mé joinchenihi ná xinchehe xé xidána icha importante, ixin cončhinjiji ná ndatsjoen xa lado jian xa.

51 Pero Jesús ndačo ngain tti chojni que vacao:
—Tančhjanda ra xa; conixin yao.

Cottimeja Jesús catte ndatsjoen xí mé co ndatsexin.

52 Cottimeja ndačo Jesús ngain cain xidána que vaquetonha ngain icha xidána, conixin ngain xipolicie nihngo icha importante, co ngain cain xittetonha ngain nihngo mé, tti xicjoi para sajoicao xa Jesús:

—¿Ajoih ra jirroehna ni ra conixin espada co nttá inchin janha rrocji ná tti chehe?

53 Cain nchanho are janha joarihi nganji ra ngain nihngo icha importante, jaha ra xonhi tiempo joinao ra rrotse ni ra. Pero jai hora jiji tti mero hora para sinchehe ra jiji, ixin Satanás tti jichonda joachaxin jaxon.

Pedro ndačo ixin jehe chonxinha Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

54 Cottimeja tse na Jesús, co sajoicao na para ngain nchiandoha xidána icha importante. Co Pedro cjinxin jirroexin.

55 Nttiha ngain patioe nchia mé cjoaga na ná xohi co nttiha tavinttendanji na xohi mé para xižohe na. Co cai Pedro nttiha tavehe ngayé na.

⁵⁶ Cottimeja ná n̄chimozé xidána mé, are vicon n̄cha que Pedro tajixīxohe ngandehe x̄ohi n̄ttiha tavetsjehe n̄cha jian co ndācho n̄cha:

—Cai xí j̄ihi vacao xa Jesús.

⁵⁷ Pero Pedro čhoha ndācho ndoa, co jehe ndācho:

—Janha chonxinha xí mé.

⁵⁸ Nchion después vicon ná xí, co xí mé ndācho xa ngain:

—Jaha cai ná de chojn̄i Jesús.

Pero Pedro ndācho:

—Nahi, janha jeha chojn̄i jehe.

⁵⁹ Inchin ná hora después iná xí x̄a cjan xa ndācho xa:

—Ján ndoa xí j̄ihi vacao xa Jesús, ixin jehe xa cai Galilea regioen xa.

⁶⁰ Cottimeja Pedro ndācho:

—Janha nonaha de quehe rrinichja jaha.

Ngain rato mé are Pedro x̄a jinichja jamé, otsje ná conttaxichia.

⁶¹ Cottimeja Jesús ngaria co tsjehe ngain Pedro, cottimeja Pedro x̄axaon ixin Jesús ondācho: “Saho que conttaxichia rrotsje va jai, jaha orrondācho ninxin n̄ttiha que chonxinha na janha.”

⁶² Cottimeja Pedro vačhjexin de n̄ttiha co anto tsjanga.

Are cjoanoa xa Jesús

(Mt. 26.67-68; Mr. 14.65)

⁶³ Xisoldado que tenda Jesús cjoanoa xa co x̄anguí xa n̄ttá.

⁶⁴ Jehe xa coejehe xa con Jesús co x̄anguí xa tton ngá con co ndācho xa ngain:

—¡Datsoenhe quensen goen!

65 Co ndačo xa icha cosa feo ngain.

Are Jesús ngain juzgadoe nihngo
(Mt. 26.59-66; Mr. 14.55-64; Jn. 18.19-24)

66 Co are ovingasán xatte cain xittetonha ngain nihngo, cain xidána que vaquetonha ngain icha xidána, co cain ximaestroe ley para sajoicao xa Jesús ngain juzgadoe nihngo. Nttiha joanchian-guixin xa Jesús, co ndačo xa:

67 —Nttihi ndachjenji ni ra, ¿ajaha tti Cristo?

Jehe ndačo ngain xa:

—Si rronhattjo ra que ján, sitticaonnaha ra.

68 Co si sanchianguiha ra ná cosa, jaha ra rrondachjenjiha ni ra, ni tsančhjandaha ni ra sat-sji.

69 Pero desde jai, janha, tti Xí que joixin de ngajni, osarihi ngain lado jian de Dios que chonda cainxin joachaxin.

70 Cottimeja cainxin xa joanchianguihi xa Jesús co ndačo xa:

—Mexinxin, ¿ajaha tti Xenhe Dios?

Jesús ndačo:

—Ján, janha inchin ndačo jaha ra mismo.

71 Cottimeja vinttendačo xa:

—¿Quedonda tsjé na icha chojni de testigo? Ján na mismo coinhi na tti jianha que ndačo xí jiji.

23

Jesús ngain Pilato
(Mt. 27.1-2, 11-14; Mr. 15.1-5; Jn. 18.28-38)

¹ Cottimeja cainxin xa vingattjen xa co sajoicao xa Jesús ngain Pilato.

² Nttiha coexinhi xa nichja xa tti jeha ndoa de ixin Jesús, co ndačo xa:

—Janha na vicon na que xí jihi jinchequeto xa chojnina na. Co ndačo xa que janha na chondaha na que tsjenga na hna impuesto ngain xiemperador romano, co cai ndačo xa que jehe xa tti Cristo, co mé rročo que jehe xa ná rey.

³ Cottimeja Pilato joanchiangui ngain Jesús:

—¿Ajaha tti Rey de chojni judío?

Jesús ndačo:

—Ján janha, jañá inchin jaha ndačo.

⁴ Cottimeja Pilato ndačo ngain xidána que vaquetonha ngain icha xidána, co ngain cain chojni que joinchechienhe Jesús nttiha:

—Janha xonhi cosa jianha dittjá xí jihi.

⁵ Pero cain jehe xa icha coyao xa co ndačo xa:

—Jehe xa joincheyehe xa chojni ngoixin Judea de ixin tti jehe xa nichja xa. Coexinxin xa ngain Galilea, co jai onttihi jinchehe xa jamé.

Jesús ngain Herodes

⁶ Are Pilato coinhi jihi, jehe joanchiangui ngain xa si Jesús joixin de ngain Galilea.

⁷ Co are vinttendačo xa que ján, Pilato sarroanha Jesús para ngain Herodes ixin mé tti vehe gobernador de ngain Galilea tiempo mé, co ngain conittjao mé nttiha vehe Herodes ngain ciudad de Jerusalén.

⁸ Are Herodes vicon Jesús, jehe anto ché ixin anto sé jehe jiřaxaon sicon Jesús ixin jehe coinhi vanichja chojni de ixin tti jian que vanchehe Jesús. Co jehe Herodes joinao rroguicon ná milagro que rrojinchehe Jesús.

⁹ Herodes anto tsje joanchiangui ngain Jesús pero Jesús xonhi ndačo.

¹⁰ Cai nttiha conchienne tsje xidána que vaquetonha ngain icha xidána co tsje ximaestroe ley para ndačo xa tsje cosa ndoaha de ixin Jesús ixin anto coñao xa.

¹¹ Cottimeja Herodes conixin cain xisoldadoe xaxaon xa que Jesús xonhi rentte, co para cjoanoa xa Jesús, joinchengá xa lontto čhjoin inchin lonttoe rey. Cottimeja Herodes rroanha Jesús para ngain Pilato iná.

¹² Ngain nchanho mé Pilato co Herodes vinttegoan amigo. Icha saho jehe na vaningaconhe chó na.

Are ndačo na ixin Jesús chonda que ndasenhe (Mt. 27.15-26; Mr. 15.6-15; Jn. 18.39—19.16)

¹³ Cottimeja Pilato vayé cain xidána que vaquetonha ngain icha xidána co cain xí que vechonda joachaxin ngain chojni judío, conixin icha chojni,

¹⁴ co ndačo ngain na:

—Jaha ra joicohna ra xí jihi, co ndačo ra ixin jinchequeto xa chojni, pero janha joanchianguia xa ngattoxon con ra, co ovicon ra que janha xonhi vittjá xa que ixin jehe xa jinchehe xa ná cosa jianha inchin jaha ra tjanguihi ra xa.

¹⁵ Cai Herodes sarroanna xí jihi iná, ixin jehe xa xonhi cosa jianha jica xa. Ovicon ra que xí jihi xonhi jianha dinchehe xa para que sequininxin ndasenhe xa.

¹⁶ Janha tsetonha soan xa castigado, cottimeja tsančjanda xa satsji xa.

17 Ngain quiai mé, Pilato vechonda costumbre de tančhjanda ná de tti tteaxinhi para sattji para que chojni judío icha vaché na.

18 Pero cainxin na coexinhi na coyao na co ndačo na:

—¡Dantsje xí yá para siguenhe xa co tančhjanda Barrabás satsji!

19 Co Barrabás jiji coiaxinhi na ngain cárcel ixin jehe joinchequeto chojni ngain ciudad de Jerusalén co ixin jehe nagoenxon chojni.

20 Pilato joinao rrocanchjanda Jesús, mexinxin jehe cjan ndačo ngain na iná,

21 pero jehe na icha vinttecoyao na sén co ndačo na:

—¡Nchecrucificá xa! ¡Nchecrucificá xa!

22 Ninxin nttiha ndačo Pilato ngain na:

—Mexinxin, ¿quehe cosa jianha joinchehe xí jiji? Janha xonhi cosa jianha dittjá xa para que sequininxin senhe xa. Janha tsetonha que soan xa castigado, cottimeja tsančhjanda xa satsji xa.

23 Pero jehe na vittoexinha na, co icha coyao na co joanchia na que ixin Pilato sinchecrucificá Jesús. Co anto vinttecoyao na jehe na conixin cain xidána que vaquetonha ngain icha xidána hasta que conhe inchin tti jehe na joinao na.

24 Pilato joinchehe inchin jehe na joinao na,

25 co jamé jehe coachjanda sacjoi jehe tti vehe ngaxinhi cárcel ixin joinchequeto chojni co nagoenxon chojni. Co jehe Pilato joanjo Jesús ngain na para que jehe na joinchehe na inchin joinao na ngain Jesús.

*Are joinchecrucificá na Jesús
(Mt. 27.32-44; Mr. 15.21-32; Jn. 19.17-27)*

²⁶ Are osatedicao xisoldado romano Jesús para joinchecrucificá xa, vetan xa ná xí de Cirene que vinhi Simón. Jehe Simón rato mé joigaha ciudad de Jerusalén. Co jehe xa tse xa Simón mé co joincheca xa crue Jesús co joincherroé xa Jesús.

²⁷ Co terroé anto tsje chojni, co tsje nčí que tetsjanga ncha co tetoyao ncha de ixin joachjaoen Jesús.

²⁸ Pero Jesús tsjehe ngain cain nčí mé co ndačo:

—Jaha ra xo nčí ra de ngain Jerusalén, tsjan-gaxinha ni ra janha, sino que de ixin jaha ra misma, co de ixin xanha ra.

²⁹ Ixin ojitonchiaon nchanho que chojni rrondačo na: “Anto čhjoin para ixin tti nčí que čhoja rrochonda ncha čhjan, tti nčí que xonhi čhjan joincheconcjihi, ni joinchecai.”

³⁰ Co are mé chojni tsexinhi na rrondačo na ngain tsje jna: “Dinttji ra ngataha janha na”; co rrondačo na ngain tsje jnanchjan: “Ttema ni ra.”

³¹ Ixin si janha inchin ná nttá que jichon co janhi nchehe na nganji na janha, ¿mé quehe sinchehe na nganji jaha ra, que jaha ra inchin tti nttaxema?

³² Cai nttiha tedicao xa yó xichehe para joigoen xa xichehe mé conixin Jesús.

³³ Are ojoiji na ngain tti lugar que dinhi Nt-talorojá Chojni, nttiha joinchecrucificá xa Jesús conixin jehe tti yó xichehe: ná xa ngain lado jian de Jesús, co iná xa ngain lado cjon.

³⁴ Co are otenchecrucificá xa Jesús jehe ndačo:

—Padre, nchetjañehe xí tehe ixin noeha xa quehe tenchehe xa.

Co cain xisoldado mé joantsje xa suerte para chjejehe xa lonttoe Jesús.

³⁵ Co tsje chojni cjoí na nttiha para vicon na, co cai cjoí tsje xí que vinttechonda joachaxin ngain chojni judío; cain xí mé cjoanoa xa Jesús co ndačo xa:

—Jehe nchao cjoenguijna icha chojni, pero jai si ndoa jehe tti Cristo tti Dios coinchiehe, socon na sanianxin de nganito cruz yá.

³⁶ Cai cain xisoldado nttiha cjoanoa xa Jesús; vintteconchienhe xa ngain cruz co joanjo xa vino san para vihi Jesús,

³⁷ co ndačo xa ngain:

—Si jaha tti Rey de chojni judío, danianxin de nganito cruz jaho.

³⁸ Co nttiha já cruz que vengano Jesús vehe ná xón que vetaxin ixin nguigoa griego, latín, co hebreo que ndačo: “Xí jihi tti Rey de chojni judío.”

³⁹ Ná de tti xichehe que tengano cruz nttiha, ndačo xa feo ngain Jesús:

—Si jaha tti Cristo, danianxin de nganito cruz co nchegania ni ra janha na cai.

⁴⁰ Pero tti xí iná joinchesattehe xa xicompañeroe xa co ndačo xa:

—¿Aägoenha Dios, jaha que rridatto ngain xajeho castigo?

⁴¹ Ján na jí razón que tedotan na tangui jihi ixin tettjenga na hna tti janha que jointtoho na, pero xí jihi xonhi cosa janha joinchehe xa.

⁴² Cottimeja ndačo xí mé ngain Jesús:

—Jesús, ðaxaon na janha are soixin tsexinhi tsetonha.

⁴³ Jesús ndaço:

—Janha seguro rrindattjo que desde jai jaha osarihi conixin janha nttiha ngajni.

Are ndavenhe Jesús

(Mt. 27.45-56; Mr. 15.33-41; Jn. 19.28-30)

⁴⁴ Are inchin ngosine nchanho, cottimeja ndaconaxin xehe ngoixin ngataha nontte nttiha, co mé conçhjenhe hasta ní hora tsocjin.

⁴⁵ Nchanho ndaconaxin xehe, co tti manta que vettoa ngaxinhi tti nihngo icha importante ndavichjenga ngosinenxin manta.

⁴⁶ Cottimeja Jesús coyao co ndaço:

—Padre, ngá rá tsín espirituna.

Co are jehe joexin ndaço jihi, jehe ndavenhe.

⁴⁷ Are vicon xicapitán romano ixin queñén conhe, jehe xa ðaon xa ngain Dios co ndaço xa:

—Ján, ndoa xí jihi ðonhi jianha jica xa ngattoxon con Dios.

⁴⁸ Cain chojni que te nttiha, are vicon na cain mé, savintteji na co ðanguí na pechoe na tton ixin anto coá na joachjaon.

⁴⁹ Co cain niamigoe Jesús, co cain nçhí que joixin desde Galilea para vacao ncha, cjinxin tavintte na para vicon na cain cosa jihi.

Are ðavá Jesús

(Mt. 27.57-61; Mr. 15.42-47; Jn. 19.38-42)

⁵⁰ Vehe ná xí jian de ngain ansén xa que vinhi xa José, co rajné xa Arimatea ngain regioen Judea. Xí mé ná xijuez ngain juzgadoe nihngo.

⁵¹ José jiji cai jichonhe tiempo are Dios sique-tonha ngataha nontte. Co jehe coñao de ixin tti joinchehe icha xijuez ngain Jesús.

⁵² Mexinxin jehe cjoí joitsjehe Pilato para joiganchiehe joachaxin ixin jehe sasicao cuerpoe Jesús.

⁵³ Co después de joinchegianxin cuerpoe Jesús de nganito cruz, jehe coensiha cuerpoe Jesús ná manta roa co joiquín cuerpo ngain ná cueva que odingue na ngadoho ná ttjao tti xa xonhi chojni diřavá.

⁵⁴ Mé cjoí tsocjin víspera de ngain tti nchanho que nchejogaha na.

⁵⁵ Tti cain nchí que joixin desde Galilea conixin Jesús cjoí ncha vintteguitsjehe ncha cueva mé, para vicon ncha quexén vittohe cuerpoe Jesús.

⁵⁶ Co are sacjan ncha para nchiandoha ncha, joinchexjian ncha perfume co pomada para cuerpoe Jesús; cottimeja ngain tti nchanho que nchejogaha na, jehe ncha vinttenchejogaha ncha cai inchin ttetonha ley que vayé Moisés.

24

Are xechon Jesús

(Mt. 28.1-10; Mr. 16.1-8; Jn. 20.1-10)

¹ Domingo, saho nchanho de semana, ndoyo, cain nchí mé cjan ncha ngain sepultura joicao ncha tti cain perfume que cointtecjan ncha, co icha nchí joicao chó ncha.

² Are vintteguiji ncha nttiha, vicon ncha tti xo que vejé sepultura mé ijihá xo nttiha.

³ Co jehe ncha vintteguixinhi ncha sepultura mé pero ivittjaha ncha cuerpoe Jesús.

⁴ Anto vintteñaon ncha co ni inoeha ncha quehe sinchehe ncha, are vicon ncha yó xí tatengattjen xa ngaca ncha tengá xa lonto tedaquima.

⁵ Co ixin jehe ncha anto vintteñaon ncha vintteguisé ncha hasta tti ngataha nontte, co jehe cayoi xí mé vinttendačo xa ngain ncha:

—¿Quedonda jaha ra tettjé ra ngain sepultura tti jichon jai?

⁶ Jehe icoha nttihi ixin jehe xechon. ãaxaon ra queñén ndattjo ra are jehe ãa vehe ngain Galilea.

⁷ Jehe ndačo que jehe, tti Xí que joixin de ngaini, chonda que sinchechienhe na ngá rá chojni jianha, co jehe na sinchecrucificá na, pero ngain nchanho ninxin jehe rroxechon.

⁸ Cottimeja ãaxaon cain nchí mé tti ndačo Jesús,

⁹ co después de cjanxin ncha de ngain sepultura, coequin ncha cain jahi ngain tti ttejngo chojni que vacao Jesús, co ngain icha chojni cai.

¹⁰ Co tti cain nchí que joicao joajna jahi ngain tti ttejngo chojni que vacao Jesús, cjoí María Magdalena, co Juana co iná María, janné Jacobo, co icanxin nchí.

¹¹ Pero tti chojni que vacao Jesús vitticaonha na tti ndačo cain nchí mé.

¹² Pero masqui jamé ãaxaon cain na, Pedro vaçhe co coinga cjoí ngain sepultura. Co are jehe tsjehe ngaxinhi sepultura, jehe vicon tti manta roa que vesia cuerpoe Jesús tají manta ná lado. Cottimeja sacjan para tti nchia co anto goan admirado de ixin quehe diconhe.

*Tti conhe are ngatja nttiha para Emaús
(Mr. 16.12-13)*

¹³ Ngain xajeho nchanho mé, yó de chojni que vitticaon Jesús satettji na ngain ná rajna dinhi Emaús, inchin ttejngo kilometro cjinxin de Jerusalén.

¹⁴ Tetjao na de ixin cain tti conhe Jesús.

¹⁵ Co are jehe na tetjao na mé, Jesús mismo conchienne ngaca na co sacjoi conixin jehe na.

¹⁶ Pero masqui vicon na que nttiha jittji Jesús, jehe na joatsoanha na, ixin inchin ná cosa caya-coen jmacon na para joatsoanha na Jesús daca.

¹⁷ Cottimeja Jesús joanchiangui ngain na co ndačo:

—¿Quehe tetjao ra jaxon que satettji ra ngain nttiha jihi? ¿Quedonda techinhi ra?

¹⁸ Ná de jehe na que vinhi Cleofas ndačo:

—Ngoixin mundo nohe chojni tti coenxin Jerusalén ngain nchanho tehe. ¿Apoco jaha masqui joixin nttiha noaha quehe conhe?

¹⁹ Cottimeja Jesús ndačo:

—¿Quehe conhe?

Co jehe na ndačo na:

—De ixin tti conhe Jesús de Nazaret, que jehe cjoí ná profeta jian ngattoxon con Dios co ngattoxon con cainxin chojni. Co jehe joichonda anto tsje joachaxin de ngain tti vanchehe co de ngain tti jehe vanichja.

²⁰ Co de ixin quexén cain xidána que tte-tonhe icha xidána co cain xittetonha nganji na joinchechienhe xa ngain chojni romano para goenxin na nganito cruz.

21 Janha na vařaxanho na que jehe tti rrochjé libertad chojni de ngain nación Israel. Co jai ochonda ní nchanho que jehe ndavenhe.

22 Masqui canxion nčhí que cai vacao jehe conixin janha na, nčhí mé joincheřaon na nča ixin vinttecji nča ndoyo ngain sepulturé jehe,

23 co ixin vittjaha nča cuerpoe Jesús, cjan nča ngain tti nchia que vintte na co ndachjenji na nča que ixin vintteguicon nča yó ángel que ndačo ngain nča que ixin Jesús jichon jai.

24 Cottimeja canxion de nicompañerona na cjo na ngain sepultura co vicon na nttiha jamé inchin ndačo nčhí que vinttecji saho, pero Jesús viconha na.

25 Cottimeja Jesús ndačo ngain cayoi xí mé:

—¡Atto ttinxinha ra jaha ra, co anto tetončjanha ra para sitticaon ra cain tti dindačo profeta!

26 ¿Apoco Cristo chondaha que rroconhe cain tti tangui jiji icha saho que vayé cain joachaxin que jiquinixin?

27 Cottimeja jehe coexinhi ndache na quehe rročo cain texto de ngain tti jitaxin Palabré Dios tti jinichja de ixin jehe Jesús; coexinxin de ngain libroe Moisés, co joinchehe sigue ngain libro que dicjin cain profeta.

28 Are joihi na ngain tti rajna que tettji na, Jesús joinchehe que jehe rrojinchehe sigue nttié.

29 Pero jehe na joinchetsenhe na ñao que sittohe ngain na, co ndačo na:

—Dittoha nttihi nganji na, ixin ondajitonaxin xehe.

Cottimeja Jesús joixinhi nchia mé para vittohe nttiha ngain na.

³⁰ Co are jehe otavehe ngain na ngain mesa coá niottja co joanjo gracias ngain Dios, cottimeja jehe cončhinji nio co joanjo nio ngain na.

³¹ Ngain rato mé, Dios vinttjian tti tecayacoen jmacon na, co jehe na joatsoan na que jehe Jesús; pero jehe anto daca ndavitján de ngattoxon con na.

³² Co ndache chó na:

—¿Ajeha conohe ansean na anto čhjoin are jehe nichja nganji na ngatja nttiha co jindattjo na de ixin tti jitaxin Palabré Dios?

³³ Cottimeja jehe na ixonhi chonhe na, sino que jaicoa coá na nttiha co sacjan na para Jerusalén. Nttiha vittjaxin na tti ttejngo chojni que vacao Jesús tate na cain na conixin icha nicompañeroe na.

³⁴ Co jehe na ndačo na ngain tti yó xí que joí:

—Ján, ndoa dixechon Jesús, ixin Pedro vicon.

³⁵ Cottimeja tti yó xí que nandá joí ndačo xa tti conhe ngatja nttiha, co quežén joatsoan xa Jesús are jehe cončhinji niottja.

Are Jesús xago ngain chojni que vacao

(Mt. 28.16-20; Mr. 16.14-18; Jn. 20.19-23)

³⁶ ŕa tetjao na de ixin jihi, are ŕago Jesús, joiguengattjen ngayé na co joanjo joajna ngain na co ndačo:

—Dayehe ra tti čhjoin que tsonohe ansean ra.

³⁷ Jehe na anto vintteŕaon na co ŕaxaon na ngain rato mé que jehe na tedicon na espirítue ná nindadiguenhe.

³⁸ Pero Jesús ndačo ngain na:

—¿Quedonda anto teñaon ra? ¿Quedonda ãa chondaha ra seguro ngain ansean ra de ixin janha?

³⁹ Tsjexin ra ngain rana co ngain rottena tti joinchenina na. Catte ni ra si rinao ra, co sicon ra que ján, janha. Ná espíritu chondaha nttao ni nttaloro inchin jaha ra tedicon ra que janha rrichonda jaxon.

⁴⁰ Are jehe ndačo jiji, jehe cjoago ngain na rá co rotté tti dijidoho clavo are ngainito cruz.

⁴¹ Pero ixin anto ché na co cai ãaon na hasta jehe na ãa čhoha vitticaon na ixin jehe mero nttiha, mexinxin Jesús ndačo ngain na:

—¿Achonda ra nttihi tti sine ni?

⁴² Cottimeja jehe na chjé na Jesús rioho copescado dichjan co rioho niottja de tsjén cormena.

⁴³ Co jehe tse mé co joine nttiha ngattoxon con na.

⁴⁴ Cottimeja ndačo ngain na:

—Tti janha conna, mé tti joindattjo ra are janha ãa joarihi nganji ra, que chonda que joiconhe cain tti jitaxin de ixin janha ngain ley que vayé Moisés co ngain cain libro que dicjin cain profeta co ngain salmo.

⁴⁵ Cottimeja jehe joinchequinxin na tti jitaxin ngain Palabré Dios,

⁴⁶ co ndačo ngain na:

—Janhi jitaxin ngain Palabré Dios que Cristo chonda que ndasenhe, co nchanho ninxin jehe chonda que rroxechon.

⁴⁷ Co de ixin nombré jehe icha chojni chonda que sinchenohe na chojni de cainxin nación ixin chonda na que tsentoxinhi na vidé na para que

cain tti jianha que tenchehe na nchao sitjañehe na. Co tsexinxin tsonohe chojni jamé desde ngain Jerusalén.

⁴⁸ Jaha ra tti testigo ra de cain cosa jiji.

⁴⁹ Co tsjexin ra, janha rrorroanha nganji ra Espíritu Santo tti ndačo Ndodana sanjo Ndo nganji ra. Pero tadintte ra nttihi ngain ciudad de Jerusalén hasta que sayeja ra tti joachaxin mé que tsixin de noi.

Are Jesús sacojín para ngajni

(Mr. 16.19-20)

⁵⁰ Cottimeja Jesús savačhjecaixin na de ngagaha ciudad co sacjoi na hasta rajna Betania, co nttiha jehe tsín rá noi para joinchençaon na.

⁵¹ Co are jehe mero jinchençaon na, jehe sacjoixin de ngayé na, co sacojín para ngajni.

⁵² Jehe na, después de joinchecoanxinhi na Jesús, sacjan na para Jerusalén, co anto ché na.

⁵³ Co cainxin tiempo jehe na vintte na ngain nihngo icha importante para vanchecoanxinhi na Dios. Amén.

Tti jian joajné Jesucristo **New Testament in Popoloca, San Marcos Tlalcoyalco**

copyright © 1982 Wycliffe Bible Translators, Inc.

Language: San Marcos Tlalcoyalco Popoloca (Popoloca, San Marcos Tlalcoyalco)

Translation by: Wycliffe Bible Translators, Inc.

Popoloca, Tlalcoyalco [pls], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Marcos Tlalcoyalco

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 18 Apr 2025 from source files
dated 29 Jan 2022

a23ba35e-b016-5f67-a705-694e460cf18a